

良山雜志

光緒丙申孟秋

里人張爾嘉署檢

艮山雜志卷一



里人翟灝輯



志地

杭州府城周三十五里有奇門十東凡五門東南曰侯潮曰望江正東曰清泰東北曰慶春曰艮山清一大

統志

隋開皇十一年移杭州治于錢塘柳浦西依山築城

太平寰宇記

方隋築城時吳山東南皆江西北尙鑿石爲棧道修七

類纂

艮山雜志卷一

一

唐景福三年蘇杭等州觀察處置使開國侯錢鏐率

十三都兵新築羅城自秦望山由夾城東互江干洎

錢唐湖霍山范浦凡七十里吳越備史

梁開平四年吳越王錢鏐定捍海塘基復建侯潮通

江等城門十國春秋

錢氏舊城東四門曰竹車南土北土保德乾道臨安志

寶德門在今艮山門外名勝志

按吳越時門未有侯潮通江等名十國春秋所

云蓋追稱之耳景福時築羅城周及范浦范浦

乃今五里塘地去艮山門祇里餘曹氏以寶德

在良山門外不僅以四門遞數知也寶與保恐以同音致訛郎氏七修類稿亦作寶德

宋紹興二十八年增築內城及東南之外城附于舊

城爲門凡十有三

萬縣杭州府志

城東七門曰便門候潮門保安門新門崇新門東青

門良山門

咸清臨安志

諸門內便門東青門良山門皆無甕城其餘阜門皆

造樓閣

夢梁錄

按良山門名始見自此

元旣取宋禁天下修城以示一統而內外城日爲居

良山雜志卷一

二

民所平至正十六年張氏據浙西五郡十九年發姑

蘇松江嘉興吳興及杭州民夫復築焉自良山門至

新門以東視舊拓開三里而絡菜市河於內自候潮

門則縮入二里而截鳳山於外門仍十有三東無便

門保安門北增天宗北新二門

成化杭州府志

浙江行中書省平章政事張士信言於太尉士誠請

出粟興築命郡守謝節考觀圖志度地植表視民力

高下田賦多寡授之丈尺以均其徭發四郡及一州

兩縣四隅之民更相作息以亟其成城之周六萬四

千二十丈厚視高加十丈而殺其上得厚四之三焉

舊城包山距河故南北長今則截鳳山於外絡市河於內故東西廣而廣輪適周爲門十有三上各建飛樓四楹而外爲瓮城門皆左右闢其艮山清波各爲月城環旋出入互爲屏蔽自候潮門步至東青門則平江守周仁治之艮山北新則松江通守謝禮推官馬玉麟治之總其役者謝節也

貢玩齋集

楊維禎築城杵歌羅城一百廿里長東藩恃此作

金湯舊基更展二四里莫剩西門一樹樟

東維子集

按咸瀆臨安志京城圖艮山門適當東北之隅倚萊市河爲濠門內少西卽白洋池其去今門

艮山雜志卷一

三

不甚遠也今三撥營屋舍之北尙有青石門梁迹在城蓋惟宋時門在河西元則移河東耳夏志謂元拓東城三里今此開所拓約僅半里再自今門沿城東至艮山約一里總之未及二里豈地勢廣袤有差夏但就其廣處言耶

明省城門爲十東城五門曰候潮曰永昌曰清泰曰慶春曰艮山凡城門各有二樓惟西城湧金門無月城止一樓

舊浙江通志

按永昌卽宋時所謂新門清泰卽崇新門國朝康熙五年又以永昌門易名望江今俗但呼

望江曰草橋門清泰曰螺螄門

杭州前衛百戶吳東昇善楷書憲宗時負重名杭城

十門皆其題額

兩浙名賢錄

杭城計九千八百五十三堞萬厯四十年每堞用魚

脊石板一片覆之堞每高六尺長一丈八尺艮山門

三百三十四堞共長六百零一丈二尺慶春門四百

六十堞共長八百二十八丈

湧幢小品

國朝順治十五年總督李率泰檄府增高女墻併二

為一

舊浙江通志

城濠東起永昌壩並清泰至慶春門中廣二十餘丈

艮山雜誌卷一

四

長一千丈九尺自慶春歷艮山廣三十餘丈迤北至

武林錢塘門止長二千六百二十三丈二尺

萬厯錢唐縣志

艮山門杭城東北第一門也俗呼壩子門

讀史方輿紀要

城東北隅有艮山故以名門門內有順應橋一名壩

子橋故俗呼壩子門

舊杭州府志

今艮山相傳元末築新城時累土為之艮山門則宋

時已稱舊志謂門因山名非是仁和舊志謂門位於

艮易艮為山或近之

杭州府志

吳一楨暮出艮山門口號背郭迢迢驛路長銀塘

春水浸漁梁行人馬上頻回首一片孤城挂夕陽

筠軒
詩存

厲鷄艮山門外晚眺吳天入時涼似水衿衣出門
三四里城郭遠山青半環分得濃光落漁市荒陂
繚繞行何求雲影水中凝不收蓬科誰與作都祭
陰森大樹堪蔽牛幾家叢薄徑微窄稚髦闖籬窺
過客椽欄散葉覆深井薜荔牽絲護欹壁喜聞田
水夜初滿不道瓠花朝更坼半虹忽墮橫一橋恰
當高處風刁騷四天萬綠染未銷峰尖黃鶴如可
招畫本髣髴臨山樵深林絕壩藏過雨山中茅屋
愁漂搖道旁日暮紛惆悵白荷欲語嬌相向斜倚

艮山雜志卷一

五

珠盤踏寒浪菰蒲低處見船行弭棹無人能一訪
我時小極因廢書消憂起病兩有餘但思臨平考
古蹟安得湯鎮謀村居 朝廷蠲租 詔寬大官

府勸農意樂胥攜孥亦可號蠶室息影頗願開蝸

廬試歌元豐歲連稔姓氏何必聞鄉閭

樊榭山房集

艮山門外沿城五六里漫爲平原土沃疇腴禾菽芄

茂蓋餘氣之散衍耳

西湖遊覽志

桑麥之盛惟東北郊外最濶田疇萬頃一望無際春
時桑林麥隴高下競秀風搖碧浪層層雨過綠陰繞
繞雉離春陽鳩呼朝雨竹籬茅舍閒以紅桃白李燕

紫鶯黃鶯日色相自多村家閒逸之想令人便忘俗

豔遵生
八箋

張鉉同張以道出遊近郊今辰天氣佳風光宛如
春園廬豈不樂景熟興未伸與客策蹇驢城東訪
幽人幽人本非約意往隨清真市小度啁哳秋郊
迴無塵楓林纈居前蔬畦翠橫陳煙濃山愈淡徐
步望更新田翁出荆扉笑揖似所親對坐俱不疑
一榻三烏巾胸中絕塵坌眼界空越秦紛紛癡濁
世等列生鬢噴青旗正飄搖小店恰與鄰相邀開
縹瓮橙梨共珍醕悠然會陶然此適屬隱淪我家

艮山雜志卷一

六

幸匪遠要辦來常頻平橋指歸途野嘯依叢筠湖南
集

孫德潤出郭步出東皋隔市塵青山高下欲迎人

汀花有意開何晚野草無名亦自春元詩選

金志章立夏日城東閒步柳颺輕絲埽綠蘋東風
猶似見殘春隔谿小蝶自成趣不語黃鸝空惱人
行情落花思酒瓊每從流水悟閒身城邊日暮多

飛絮亂點先生烏角巾江聲艸堂集

杭世駿東郭訪秋貰酒出煙郭沙河猶藕花雁行
天路濶漁艇水程賒秀嶂生涼雨高城隱暮霞稻

滕欣有歲閑憩野人家寄集

施安同作步履從幽討喧閒此地分溪光橫古堞

暝色入蕭雲黃蝶隨人至清砧何處聞東籬應有

約相與對斜曛舊雨齋集

艮山門東城上有望海樓俗呼跨海樓按明嘉靖三

十四年倭警督撫胡宗憲於清波門南城上築帶湖

樓東南城上築定南樓鳳山門西城上築襟江樓各

一座此望海樓當亦是時同築杭州府志

望海樓當城東北之隅下臨艮山樓內奉艮山福主

卽元時艮山上土穀廟神因廟廢奉此表孫炗張氏

艮山雜志卷一

七

園林記遡樓之始曰康熙乙丑中丞趙公士麟修葺

杭城並建此樓初名跨海尋易今名俗亦呼艮山樓

自記

景星杓重登望海樓望海樓前正夕陽重來登望

極蒼茫驚濤欲沒鹽官樹孤鶩斜飛越客檣扶策

自悲春漸老憑闌撫景意何長城頭吹落風前嘯

喚起啼鳥下女牆拘堂集

釋顯鵬艮山樓遠眺煙際羣峰出蒼然望有無雙

橋連古渡一水接平蕪樹影凌丹壑雞聲在玉壺

桑田曾幾變我欲問麻姑嘯翁村居以後詩

按白文公詩望海樓明照曙霞注云城東樓名望海則唐時望海樓原在杭城之東蘇文忠望海樓詩又有沙河燈火照山紅句今樓非唐宋故蹟而雄據東城下瞰沙河有與二公詩句合者

附郭 艮山在城東北隅一小土阜耳而山名之蓋亦地脈近海之所蟠結也

古今圖書集成職方典

湖上南山外邏自龍山沿江而東環沙河而包括露

骨於茅山艮山皆其護沙也

圖書編

艮山東麓南渡宸游看新綠處

歲寒堂集

艮山雜誌卷一

八

南宋時公卿往來迎餞於此山

仁和县志

山有地脈者當亘古不變今艮山曰就凌夷僅存丈許似未必爲地脈蟠結元人艮山神廟記云雉堞之餘築爲土臺可知此阜所由來也宋紹興時東北城門已具有艮山名者艮爲東北之卦門位東北命之曰艮兼山爲艮命之曰艮山不必實有山也後人泥而不化必求其山而此地適有此阜遂相從指實之耳咸淳志載諸山甚詳備未收艮山豈近在負郭且榜諸城門而獨爲闕略耶

自記

胡鎮五日登艮山城市喧闐甚尋幽到艮山林藏

金刹古蘇合石文斑桑圃沙田隔城濠野水環夕

陽人競渡彷彿汨羅灣

夢草堂稿

褚彤秋日偕徐峻田良山晚步出郭無多路微茫

見小山水乾沙正白霜落樹先斑野鳥寒仍浴柴

門曉尚關莫言無意趣終遜此林間

寶復堂稿

按褚彤字弓一唐僕射褚公後裔康熙初居沙

河堤側詩稿二卷吳嘯臺農祥爲序云其製作

多豐碩就矩矱有自命作者意亦城東一佳士

也後志人卷不及錄附其大略於此

諸壁發良山園林深鎖翠蒼閒花木幽深水一灣

良山雜志卷一

九

最愛佳名符妙理義經原說良爲山

硯香齋詩鈔

桑調元良山行行越城闔迺至良山下良山一何

卑顏基識者寡蘇碑猶可摹云此元時社彷彿寒

煙墟玲瓏兀廣廈煌煌三領軍陸離照鞏馬側懷

沈學錄書珉稱作者倏來四百年零落無片瓦繞

塢延藤蘿參天列松檟常恐時載移穹土平爲野

迢迢溯昔賢臨風涕一洒

敬甫集

趙信詩良山門外晚風尖玉輦低垂錦軟簾佳處

但從東麓望一方新綠畫春奩

南宋雜事詩

杭世駿良山野望霜根絡平疇宿草棲隴首邇郭

無故蹊臨河有苑柳駢肩歷荒坳局步陟高阜斷
碑澀蘇交野廟社公守洹陰羣動蟄遐覽萬象剖
噉雁求曹哀危葉辭柯陡清遊豈難續漫興亦云
偶夷途識歸樵延伫遂淹久道老集

吳錫麒同作尋幽出城隅清風醒塵堞東山榛莽
閒野燒一痕破當年社公祠寂寞古碑臥林寒木
葉仰見天宇大迢迢沙河流一支瀉其左牛羊

下來樵唱隔煙過前峰杳難卽數點青錯磨歸
歎踏斜陽冷鴉嘯箇箇勉居小稿

釋明乾遊良山朝出見良山暮歸見良山朝暮鎮

良山雜志卷一

十

相見未得遊其閒隔此衣帶水截流非無心今晨
杭一葦登陟蠲煩襟廣不滿十肘高不過數尋斷
碑不可讀宿草埋深深惆悵夕陽晚迴舟發長吟

二慙道人別錄

按愚輯是編統題曰良山雜志乃取易說卦義
以編中所見皆屬府治東北地也不然以皋亭
黃鶴臨平諸大山悉統以區區土阜不幾倒置
歟

元良山土神廟碑大德己亥紹興路儒學錄古杭沈

德新記并書佩文齋書畫譜

沈德章重建艮山廟碑記江浙杭爲巨鎮行省蒞軍分鎮者四翼益都府軍督爲上閩營之東北隅故有土臺上存一廟以祀土神而傳志無聞詢之耆舊則曰艮山廟也杭城周四十餘里爲門十有三其東北曰艮山以雉堞之餘築臺建廟因以名之今府營屯州城之東北閩治鎮府營之東北而神廟又居閩治之東北焉此說庸有可證其臺高廣不踰尋丈基圯霖潦室困風日每修輒毀至元戊子歲海宇會同武備多燬江南鎮戍歲久者輒易地以均遠近勞逸之勢以故軍府由蘇易杭營

艮山雜志卷一

十一

仍其舊達魯花赤昭勇拔都公監肅軍容萬戶輔國鄭公祐帥正師律副侯宣武李公孛蘭奚倅貳戎政協恭和衷諸閩視倣由是參佐協心偏裨聽命閱軍實繕器械練習以時卒無玩愒凡軍政有未便士情有未安者亟請於上而更張之乃闢閱場築射圃新鼓角樓又新安樂堂以至營房警鋪門鑰周墻馳道通渠除弊革陋緩急適宜如是者十有二年井然不紊居一日公務餘暇萬戶鄭公謂二公曰吾儕幸逢盛際四方來庭邊鄙不聳按甲寢兵以効守禦上安下和百廢粗興繫神之祐

後圃有廟頽圯失祀是一缺典盍撤而新之以答神貺二公曰然乃鳩工度材因臺爲基甃其旁使土不墊石其除使柱不顛前敞月臺下壘崇砌像貌供設丹雘黝聖咸稱其制成不終日而下無所擾廟後建數椽處浮屠以奉祀事并新其東南之三廟落成之日凡府軍之將士謁予請記之余謝不敏衆皆曰軍守分鎮有年士守紀律民安田里三帥德政昭不可泯而神之所以陰相而默佑之者亦不可誣也今斯廟鼎新則於治人事神之道兩得之矣盍志歲月以傳不朽子其何辭予曰諾

良山雜志卷一

三

謹泚筆以書於石時大德己亥孟秋前鄉貢進士紹興儒學錄古杭沈德章記并書鎮守杭州益都府軍達魯花赤口口口府立石

碑記

厲鶚同樂城聖幾游良山山高可二丈許蓋土阜也旁列古松三四晚風蕭然殘雪在地臥殘碑已中斷讀之不甚了了乃元良山土神廟碑廟不知毀於何時作詩紀之皋亭雪未消數峰粲可數城陰良其背有此山戴土牽拂無事朋共探風物古晚寒閉漁村斜陽入蔬圃疏松時一響似喜我輩撫徘徊去仍畱斷碑記祠宇惟存豬兒年髣髴辨

某甫斯人今安在闕世如過羽社翁一樽酒寂寞
罷歌舞明年梨花時再尋比韋杜沙河春水生看

客曳柔艣樊榭山房集

符之恆同作蒼蒼古城曲有山艮其背占斷地一
偏萃勝境無礙耽奇昔未收圖經空記載閒行爲
訪古不惜破蕪菜盤桓孤松前日淡光破碎回環
面諸山楓色羅其內觸目多佳情久立生遙慨斷
碑臥衰榛塵土蒙垢穢殘文剔薛讀往迹欣未昧
保障功不誣淒懷驚異代荒祠知何年寂寞流水
對神歟有廢興甯遜金石在椎拓共丁寧斯遊會

艮山雜誌卷一

三

當再更期能繕亭日坐挹青靄秋聲館吟稿

按沈文惟嘉靖仁和縣志具載乾隆乙丑余約
吳西林張謐明詣碑校之志所闕略凡三十六
字不同又十五字爬泥剔薛詳察殫究照碑別
錄一通所闕尙有碑尾三字當中斷處泐去難
復思惟以意揣之疑是督益都三字然未敢遽
補也沈名德章非德新碑字甚明額篆重建艮
山廟碑六字達魯花赤葉子奇草木子謂猶華
言荷花上壓口捺子也亦猶古言總轄之比元
史百官志上萬戶府管軍七千之上達魯花赤

一員萬戶一員副萬戶一員俱虎符世襲又世祖本紀杭州行省諸司府庫所在置四萬戶府益都府軍督其一也

艮山張氏自明龍池黃吾元理諸公相繼登嘉萬賢書聲稱藉藉山北數椽爲諸公藏修故業今子姓讀書談道于其閒有亭曰皆可亭西二臺植木芍藥於上殿春時芳豔三百本爲一邑花事之冠康熙乙丑城隅建望海樓士夫登樓者望見其棖棟之舊人物儀容之美莫不叩門欵洽述爲詩歌遂安毛先生山陰吳孝廉寶始倡也今年春四方之從事於此者疊

艮山雜志卷一

十四

迹駢肩贈言尤夥屏壁閒無隙可容於是擇其尤雅若干付裝潢聯以成軸

表孫烱張氏贈言小序

毛際可張園看花記康熙甲子三月八日看花張氏之園請余文爲記嗟乎客歲四月八日與錢子聖楨肩輿叩門時花事將闌又屆薄暮主人匆匆治具而別且訂今春之約余自戊戌釋褐幾三十年故園春事所見無幾況虎林都會之地非吾土乎酒酣因賦沁園春一闕有恐明春春色又在天涯之句其後秋八月與修兩浙通志至臘盡告竣而當事復委以重加校正之役遂淹滯至今不可

謂非天假之緣也乃爲之記記口出艮山門里許
風味修曠有山隱然起於平疇閒者曰艮山山臨
清涼河疏篷短棹汎汎有濠濮閒意上多桃杏雜
樹新綠如染隔岸菜花盛開布地作黃金色其外
皋亭諸峰明滅可數山麓爲張氏之居自其先公
三世皆售賢書出牧方州惠政翔洽至今稱望族
入門達左扉翠幙曲檻左右映帶下卽牡丹臺也
有玉樓春數百本繁英爛漫其大如盎香氣芬鬱
數十步外虎林牡丹以此園與柴氏家爲最然柴
氏託處城闈達官貴人名姬豔女絡繹相接憑闌

艮山雜誌卷一

五

徙倚未久已有欲促之去者唯此地人迹罕至卽
樵夫漁父追逐其閒耦俱無猜可以海鷗相狎而
魯望子宣網魚貰酒促膝評花一觴一詠似爲勝
之復念兩載花期先後相距一月而同遊聖楨流
寓江右未歸人生遇合之遲速友朋之聚散皆當
作如是觀又客歲舉杯斜陽深院而茲則細雨輕
晴顯晦倏異卽天時亦不能自主者況羅隱詩
云看到子孫能幾家乃張氏數百年來花前觴客
如一日子孫克守先業而不致失墜亦可以概推
而得之也

又癸亥春張魯望招飲牡丹花下賦沁園春策杖
東郊掩映園林遍植奇葩歎三旬風雨常淹客舍
千年姚魏更數君家密蕊爭妍繁枝弄影幾度屏
風燦曉霞徘徊久記門臨流水一徑微斜 主人
村釀頻賒喜網得鱸魚下箸佳正清陰油幙苦辭
投轄夕陽粉蝶忽聽吹笳白髮花前應慚不稱酒
醜醜顏暫自誇言歸矣恐明春春色又在天涯

吳濬哲丙寅春暮東郊張氏庭前牡丹盛開同人
咸集分賦二首春來桃李錦爲城搖颺春風百媚
生更羨洛陽開十里況逢北海飲千觥人遊勝地

良山雜志卷一

六

皆堪賞花遇詩狂倍有情日暮流連看未定夢魂
猶聽笑歌聲清涼河畔主人賢栽植名花近百年
畱客不須徵妙伎賦詩還許對真仙楊家姊妹新
妝豔陳氏亭臺結綺鮮舊日繁華都轉眼何如此
地獨芊緜

尤侗飲張園牡丹花下西陵景物最天斜況是名
園鬪麗華老去看花渾是夢春來把酒便爲家輕
風不用檀槽攪煖日偏宜蘇幕遮莫怪主人畱客
醉消醒恰有雨前茶

周銘牡丹歌我昔種花豐草莊魏家之紫姚家黃

楊妃指印西施舌猩紅鶴素燦成行每逢穀雨開
花日日蒸風煽香蕊鬱賞花騷客戴星來觴詠流
連遲月出新月溶溶浸綺筵客酣未肯放花眠強
出雪兒歌子夜紅輪又上碧闌干共祝此花歲歲
好狂生合拚偎花老一時計拙走天涯夢魂空向
花閒遶東風吹客到西陵紅桃白李卻滿城清涼
湖畔艮山麓張園花事倍崢嶸京兆風流負花癖
牡丹廣植連阡陌有臺不數沉香亭有詩不讓李
太白主人耽酒玉樓春愛花兼愛看花人陸續銀
瓶出旨酒誰來花下不醺醺吳儂不敢探金谷芳

艮山雜志卷一

七

菲入眼徒增惡爲憐寂寞故園花花開人別花頻

願以上並
墨蹟

邵錫榮李逸度招看張魯望齋牡丹萬簇錦雲不
飛去張家驚見牡丹開明年再約花間醉還與鄰

翁曳杖來就山
堂集

吳穎芳艮山張氏詩廬遠市如居野青廬擁一邱
鴨浮常避漿魚飽不驚鉤面郭夢絲蔽臨池雪影
流錢惟數榆莢居已勝蝸牛菰葉并州翦蘆花越
沼矛牀苔松檣溼布葉竹床柔小繫斜河艇前瞻
突起樓步鄰逢酒住過客作詩留文債乘等尾弦

歌促徧頭可誇吾臭味永結白雲儔臨江鄉人未刻詩

翟灝艮山村訪張謐明駢闐東郭市到市即幽居

熟望難尋路斜沿總隔渠奧區天設就老業祖畱

餘一畝能分賃從君學灌蔬無不宜齋未刻稿

按魯望名岱觀平生喜交游座客常滿尊酒不

空花時每典衣給客晚年饑粥不支豪氣不少

減雍正丁未歿年八十餘謐明其猶子名灝仁

和學諸生有詩名

艮山門有水門元絡菜市河於城內因設此以達其

下流舊杭州府志

艮山雜志卷一 支

水門之有樓者武林艮山而已舊浙江通志

張習孔再出艮山門輕風落葉蹴微波舉棹其如

蒼翠何絡緯欲殘蟬唱急照人秋堞夕陽多詒清堂集

孫琮將曉抵艮山門艮山門下河流長艮山門外

多漁商大船小船沿岸集高檣午夜燈猶張我舡

東來住其旁舡空酒斷心旁皇城門未啟雞未唱

征衫露冷凝巖霜殘月挂城僅十丈欲落不落光

微茫艮山官路通海昌皋亭臨平山蒼蒼漁人睡

盡漁火絕但聞蘆葦啼寒蟹窮民販鹽五更起十

百成隊趨踉蹌以鹽易米充飢腸若輩亂世宜豫

防曙星耿耿識天曉城頭煞鼓聲淒涼河空日出

客船散樹頭宿鳥俱飛翔

山曉閣詩

朱樟出艮山門口占未過吳蠶斷葉時愛游翻怪

出門遲春來筆硯忙如許才上孤舟便有詩八尺

漁舟賃往還白鷗飛過沈塘灣翦溪又入皋亭路

看煞堆青櫓後山

觀樹室集

菜市河南自新門外北沿城景隆觀後至章家橋菜

市橋壩子橋入泛洋湖轉北至德勝橋與運河合流

咸淳臨安志

東運河舊爲菜市河自東斷河頭北抵壩子橋出艮

艮山雜志卷一

九

水門

成化杭州府志

其源本通保安水門自宋築德壽而湮之故稱斷河

頭今自艮山水門溯流而上至斷河頭則止矣

西湖遊覽

志

宋時是河全屬城外倚爲城濠張氏築城絡河於內

惟餘其末流出艮山水門舊道注泛洋湖抵德勝壩

今道沿五里塘至東新關

自記

諸匡鼎夜聞東河榜歌東河水流雞鳴晨碧空雲

淨天無塵櫓聲啞入銀漢街鼓隆隆夜將半城

門水深叫箭催鳥啼向城城未開誰弄水聲歌水

調月墜竹窗鸞共嘯初聞似隔潯陽潮琵琶何處
風瀟瀟漸聽悠揚滿人耳柳岸眠鷗忽驚起休翻
子夜破青冥莫愁高樓夢未醒

說詩
堂集

諸壁發菜市河長河緣雉堞水色綠於藍岸柳迎
風弱汀蒲戰雨酣浣沙溪女穉結網罟師貪野景
平橋外孤舟繫石楠

硯香齋
詩鈔

按上塘河爲宋運河明改運道於北關外杭人
乃有以上塘爲東運河者若菜市河則未有東
運河之稱惟以鹽橋河在西俗呼西河而以此
呼東河耳自夏志誤載後之論者遂每認上塘

良山雜志卷一

辛

菜市爲一河如田汝成云上塘河地宜菜因曰
菜市河李旻云城東菜市河從臨平湖來入良
山水門源流倒置尙因謬施疏濬其貽害不恭
大乎考各舊志上塘源自天宗餘杭二門合諸
河水至德勝橋爲運河菜市河源自新門過壩
子橋泛洋湖合於運河明屬二水自德勝壩以
下方爲上塘運河良山水門內外及五里塘一
帶皆菜市河水也今各依道分別詮載

順濟妃廟在良山門外神本莆田林氏女數著靈異
宣和五年賜順濟廟額紹興二十六年封靈惠夫人

紹熙三年改靈惠妃慶元四年加助順敕曰古以女神列祀典者若湘水之二妃北阪之陳寶西宮之少女南嶽之夫人以至丁婦滕姑亦皆廟食夫生不出于閨門而死乃祠於百世此其義烈有過人者矣靈惠妃宅於白湖福此閩粵兩陽稍愆靡所不應朕惟望舒耀魄其名月妃川祗波靜其名江妃爾之封爵旣曰妃矣增錫美號被之輪奐崇大褒顯凡以爲民尙體異恩以永厥祀累封至嘉熙三年爲靈惠助順嘉應英烈良山有祠自商份感夢始開禧寶慶一再創建咸淳臨安志

良山雜志卷一

三

宋嘉熙三年潮搗月塘至良山祠若有限而退加封

嘉應英烈妃中山傳

丁伯桂廟記神莆陽湄洲林氏女少能言人禍福歿廟祀之號通賢神女或曰龍女也莆臨海有堆元祐丙寅夜現光氣環堆之人一夕同夢曰我湄洲神女也宜館我於是有祠曰聖堆宣和壬寅給事路公允迪載書使高麗中流震風八舟沈溺獨公所乘神降於檣獲安濟明年奏於朝錫廟額曰順濟紹興丙子以郊典封靈惠夫人逾年江口又有祠祠立二年海寇憑陵効靈空中風掄而去州

上厥事加封昭應其年白湖童邵一夕夢神指爲
祠處於是白湖又有祠時疫神降且曰去湖丈許
脈有甘泉我爲郡民續命於天飲斯泉者立痊掘
泥坎甘泉湧出請者絡繹朝飲夕愈甃爲井號聖
泉郡以聞加封崇福越十有九年福興都巡檢使
姜特立捕寇遙禱響應上其事加封善利淳熙甲
辰民苗葛侯郭禱之丁未旱朱侯端學禱之庚戌
夏旱趙侯彥勵禱之隨禱隨答累其狀聞於兩朝
易爵以妃號惠靈慶元戊午甌閩列郡苦雨莆三
邑有請於神獲開霽歲事以豐朝家調發閩禺舟

艮山雜誌卷一

三

師平大奚寇神著厥靈霧瘴四塞我明彼晦一掃
而滅開禧丙寅虜寇淮甸郡遣戍兵載神香火以
行一戰花鑿鎮再戰紫金山三戰解合肥之圍神
以身現雲中著旗幟軍士勇張凱奏以還莆之水
市朔風彌旬南舟不至神爲反風人免艱食海寇
入境將掠鄉井神爲膠舟悉就擒獲積此靈貺郡
國部使者陸續奏聞慶元四年加助順之號嘉定
元年加顯衛之號十年加英烈之號威德無窮典
寶有限不極不止神雖莆人所福徧宇內故凡朝
迎夕送以神爲心回南簸北以神爲信邊防里捍

以神爲命商販者不問食貨之低昂惟神人之聽
莆人戶祠之若鄉若里悉有祠所謂湄洲聖堆白
湖江口特其大者爾神之祠不獨盛於莆閩廣江
浙淮甸皆祠也京畿良山之祠舊傳監丞商公份
尉崇德日感夢而建祠臨江滸前有石橋經久摧
剝一日里人取涼於橋坐者滿地忽有白馬自廟
突出人悉駭散橋隨圯無一陷者人知神之爲也
開禧年開始建殿閣地褊且陋觀瞻未稱歲在丁
亥某調郡陛辭偶叨畱行因白夕郎陳公卓割餐
錢爲倡貽書鄉之持麾節者咸遣助鄉之士友與

良山雜志卷一

三

都人知敬神者竭力効奔走不避寒暑隨豐儉捐
金錢次冬首役移舊殿閣前架正殿越春殿成又
次年門樓廊廡成塑繪丹雘几案帷闌簾楮軒檻
聞者爭施規撫粗備云云戊子之夏後殿雷震電
掣龍爪西楹而翔莆白湖祠亦告斯瑞且同其時
又一夕鼓作雷聲轟轟而鳴豈非先兆歟祠成鄉
人合詞諭某爲述顛末姑取前後金石所紀編次
之庶來者有考云

咸清臨
安志

劉克莊泛舟六絕句之一雖沈璧馬計安施倏忽
桑田變渺瀰說與神通君記取潮頭不到良山祠

後村集

按元至元中以妃護海運有奇應加封天妃
國朝康熙二十二年以助克澎湖加封天后編
列祀典杭城內外舊有祀廟凡四潛志特以慶
元敕文載此廟下疑南宋時專列此廟於祀典
也劉後村詩所云卽傳信錄所載嘉熙三年事
事在丁氏作記後故記中未詳潛志已載其封
號而不述其事未免闕失矣今自元展東城廟
適當水門東偏殿宇已多截爲城基僅存庫屋
數椽復爲市廛所隔出入城人罕有過而問者

良山雜誌卷一

一

選鋒步軍四寨在良山門外教場在聖妃廟東寨內
行在所錄

甘露亭在良山水門外康熙初耆舊募僧向各方收
埋遺骼建設道場於此鴻鳴草堂雜錄

戴清借西林甘露僧樓分韻八林懷自靜鬱翠古

松平地隔日月影晴攬風雨聲登樓愁已暮歸路

喜猶明夕借鄰僧榻心同雲水清南樓吟稿

良山門外市名青龍街俗稱沙田或以海沙之所漲

也嘉靖和縣志

北郭湖墅之稱當年無非湖水東城沙田之目近古

悉是江沙江湖故道猶可髣髴者焉神州古史考

沙田市在艮山弔橋北路通打鐵關其以沙田稱者瀕江沙田中所產瓜蔬肩販貿於此市也咸淳臨安志不載蓋自元末改城規菜市於城內賣菜者艱於候門始轉集此成市其時負郭地已成廛里久矣沙漲之說未足據白記

諸壁發沙田蛟門潮汐壓城穿傍郭人家絕可憐
一自菱雷雄萬弩至今耕鑿號沙田硯香齋詩鈔

陳張霽沙田市海際青來漸起塵肩摩踵接往來
頻市中不見吹簫客肆上誰爲賣藥人笑看蠅頭

艮山雜誌卷一

三

時逐逐愁聞蝸角較斷斷驚心往昔行吟事負販

曾經歷苦辛惜陰齋稿

戴清沙田曉市喧闐人語疊塵埃寒擁重門候曉
開一路滑冰過市上滿肩殘月照城隈野蔬園果
隨時價竹杖芒鞋接道來誰識風霜經歷盡日高

煖閣夢初回南樓吟稿

按今城內新橋西側爲青龍街沈志以沙田當之誤而其誤有因也沙田市自有街名曰申明街明初各鄉里皆有申明亭此亭最近郭蹟尤著因並以稱其街今里人獨傳呼之沈志載申

明亭頗詳而街書青龍蓋偶然筆誤耳茲以申明亭開說緣由並錄左方備考

申明亭洪武六年開設凡遇民間爭鬪及戶婚詞訟里老拘於此亭從宜剖理城內四所城外鄉村共一十二所又有旌善亭洪武八年開設凡民間孝子順孫義夫節婦受旌表者書於亭楣與申明並建

嘉靖仁和

縣志

宋餘杭門旁有水門二一日餘杭水門一日天宗水門城內諸河水皆由以達上下塘河元末以天宗改爲陸門一名小北門又增設北新門與故有之餘杭

良山雜誌卷一

三

水陸二門凡四明初以天宗北新閉塞祇留水陸門各一

仁和縣志

城中運河有二其一曰茅山河南抵龍山浙江開口而北出天宗門其一曰鹽橋河南至州前碧波亭下東台茆山河而北出餘杭天宗二門二河合於門外以北抵長河堰

蘇文忠公集澹河議狀

元胡長孺云趙忠惠公尹臨安計會城現口日食並藉北關天宗水門米船爲平糴倉於鹽橋北糴米歲六十萬石悉以賤價糶焉竟趙尹任十三載民忘饑

歲寒
堂集

杭民瓶無儲粟以列肆爲倉囤於是有借箸議開天
宗水門屯粟者夫城內壩外之地實高於河然不知
趙忠惠何以由之運米吾欲問之借箸者

萬麻錢塘縣志

天宗在宋時爲水門張士誠始改爲陸僅六年明省
十三門爲十門宜并天宗陸門塞矣故老傳明時湖
墅肩販有徑進小北門至中市者豈當時猶存小竇
抑傳之者誤歟

南湖紀聞

按宋時未有豬圈德勝二壩上下塘運河米舟
悉得由清湖閘抵泛洋湖以入天宗水門忠惠
事略無可疑聶氏不達古今之變冒昧詰之非

艮山雜誌卷一

三

也然二壩旣築欲更議復其舊談殊未容易耳

都鹽倉在艮山門外

咸淳臨安志

按施宿蘇詩注引杭州圖經謂都鹽倉在天宗
門裏據潛志此倉外別有一倉亦屬於鹽事所
在天宗門裏曰天宗倉夢梁錄與潛志同

臨安府養濟院二一在艮山門外初蘇文忠公守杭
嘗於城中創置病坊名曰安樂以僧主之仍請於朝
三年醫愈千人乞賜紫衣并度牒一道詔從之崇寧
元年八月詔諸路置安濟坊二年五月兩浙運司遂
援蘇公之說以請仍改病坊爲安濟紹興二年詔臨

安府置養濟院十三年十月又因臣僚請下錢塘仁和兩縣踏逐近城寺院充安濟坊籍定老疾貧乏不能自存及乞丐之人自十一月一日起支常平錢米每名日米一升錢十文小兒半之至次年二月終二十九年以後又屢降指揮展半月或再展乾道初遂展至四月終猶恐病者未愈至七月終食新方行住

支

咸淳臨安志

艮山門瓦在艮山門外

武林舊事市肆記

瓦舍者謂其來時瓦合去時瓦散之義易聚易散也頃者汴京最盛紹興間駐蹕杭城殿帥楊和王因軍

艮山雜誌卷一

三

士多西北人是以城內外翺立瓦舍招集妓樂以爲軍士暇日游戲之地今貴家子弟因此蕩游破敗尤甚於汴都也

夢梁錄

瓦子鉤闌南宋在臨安有二十三處其在城東者新開門外曰新門瓦崇新門外曰薦橋門瓦東清門外曰菜市瓦艮山門外曰艮山瓦今遺迹皆不可攷惟菜市橋瓦子巷其名猶存

東城雜記

按以上三蹟今皆未詳定所類記俟攷

泛洋湖在仁和縣之北天宗門外納城內清湖河鹽橋河小河又與城東外沙河菜市河相合

咸淳臨安志

天宗水門外大河古謂之泛洋湖正德年間其居民
啟土掘出一大船乃是泛海之舟規制甚異嘉靖仁
和縣志

白洋池舊傳與城外泛洋湖相貫注故都城紀勝夢

梁錄並稱白洋湖南湖
紀聞

由啟土出大船事觀之是湖在昔猶海水所溢也和仁

縣志

泛洋湖舊合餘杭天宗二水門所出之水由西轉北

下清湖三閘注德勝橋明初以豬圈壩遏截其流不

得與清湖通達乃自甘露亭東趨過施家橋與菜市

河渾合為一由五里塘出東新關注上塘其上流抱

良山雜誌卷一

完

城而西至豬圈壩則止長猶四五里廣僅里餘自記

邱峻北郭春泛背郭清流即泛洋暖風吹送往來

航漸開圖畫村村景雲水空濛第一鄉畫塢
集

按今施家覓渡橋閒沿岸四五里窪畦相屬人

煙寂寥度其形勢似亦舊湖水北溢之區又說

者謂城內白洋池本與此湖相通自宋定行都

城基始截為二由是論之則是湖之廣當宋以

前亦不亞其長之數矣若以邃古言則更有難

測者咸淳志稱西湖大佛石為秦皇泛海艤舟

處又稱秦詔息湖在仁和東北十八里此湖際

於二者之間名曰泛洋謂其通海似未可斥爲
浮誕

豬圈壩在武林門外明洪武三年建

浙江通志

先是有諸姓者善拳搏人號之爲諸拳後折節好義

擄爲此壩人因稱諸拳壩俗譌爲豬圈壩

仁和縣志

豬圈壩明初設有壩官一員宏治十八年八月裁見

明孝宗實錄其字實爲豬圈趙氏說乃輕信流俗妄

談之過

杭州府志

按此閒水道多所變遷實由於此壩之築不爲

舉出則上塘之古今殊源旣無由可明而菜市

良山雜誌卷一

三

河與五里塘亦無由可別故壩已不屬良方猶

舉列之

施家橋一名上堰橋泄泛洋湖水由五里塘出東新

關合上塘大河舊志一作司家

杭州府志

汪沆城東歸舟三杯卯酒解船行欵枕篷窗夢未

成獵獵忽驚魚斲過施家橋轉見高城

槐塘詩稿

翟濤施家橋獨行看桃閉戶先生引步難獨游風

味太清寒不爭粉蝶先時賞爲有林泉借客看春

色過橋連水澗好山圍眼放花寬胸中粉本天然

格隨意經行悉麗觀

錢江存稿

徐堂施家橋桃花萬樹桃開處行偕鷗鷺羣石橋
通綺陌茆屋鎖紅雲景好惟三月春過已二分祗
愁風雨惡溪畔落紛紛

藉豁古
堂集

按泛洋湖東西兩端舊有上下二堰萬厯杭州
府志云上堰在天宗門外下堰在餘杭橋側施
家橋近於上堰故一名上堰橋

施家橋東畔曠地爲河東村 國朝來居此者有韓

儀京楊博羣二人知名

自記

沈峻曾送韓儀京遷居河東村無從出郭謝繁喧
羨爾移家水竹園荷芡池邊宜待月棠梨花下好

良山雜誌卷一

三

傾尊近山煙雨迷春樹隔水漁樵入晚村覓渡橋
頭城不遠輕舟頻欲到君門

漣漪堂
遺稿

吳穎芳楊生破堂記洛陽城裏少年騎屋而窺巴

蜀江邊童子抱茅而去匪徒猷隘實畏漂搖不寓
鄭卿忽加毀館未逃魯相便已鑿坏嘉賓每慮於
陷牀惡客或聞其祝柱羊觸藩而不補雀穿屋以
頻來將秋而瑟瑟蕭蕭梁間落葉抵暮而熒熒熠
熠鄰室分燈瓦徧松苔壁多蝸篆冷於社稷清若
伽藍憂風憂雪者經年宜燠宜涼者無日較虞慶
之塗溼椽生未爲過矣擬孫僑之棖崩棟折不至

甚焉乃仍舊貫肇錫嘉名堂不虛稱譬之類猶冠
號破惟實著何妨谷以愚呼主人頂雨墊之中曳
雪穿之履原生之襟袖雖整羊陟之祇稠頗完腳
折茶鐙膝穿木榻簡似出於羽陵硯難全於雀瓦
卮無底而猶御甕雖漏而還陳幾雙蠟屐齒半折
於榻中一領羊裘毛盡銷于薪上其草也拔心不
死其樹也蠹節仍香菌縮桑拳匏枵松偃他物稱
是主人可知豈肯翱翔改壽陵餘子之步又逢遷
次授漢上半人之名藏垢納污含疣附贅皇甫謐
嘗苦羸軀趙邠卿屢行治命今者幽治泥垣大離

良山雜誌卷一

三

火宅入孔之室見堯於牆其於道既合其尖其於
身亦養吾棟已免高明鬼矚可稱虛白神來三畝
之居杜郎獨言寬於天下一區之宅楊氏不愧繼

其家風矣

西林
文稿

鷺鷥灘在良山門外河西

松壑詩
集註

王修玉鷺鷥灘鷺鷥灘上棹扁舟薄霧朝暉暗戍
樓千畝青黃臨渡口一峰蒼翠出城頭天寒鴻雁
排雲遠水落鯨魚上石游欲就蘆中問漁父釣竿

縣處忽驚鷗

松壑
集

覓渡橋一作滅渡泄泛洋湖水北抵德勝壩止其東

流過興福潮王橋出東新關

杭州府志

按施家覓渡二橋東西相去約四里釋正信桐溪講堂別錫有託名黃汝亨酬雪松滅渡橋成主行懺法詩蓋橋嘗於明崇禎初重建

天宗棧庫橋在陸家場北今名道塘橋

嘉靖仁和县志

行在贍軍激賞酒庫所大庫十三一日天宗庫清庫

在天宗門裏煮庫在餘杭門外上閘東

咸淳臨安志

按潛志橋道卷亦云天宗棧庫橋云在上閘東

陸家場前今道塘橋正與清湖閘東西相望沈氏所指稱不誤也但潛氏官寺卷大庫十三每

艮山雜誌卷一

三

僅一清一煮棧庫則惟碧香諸庫中之錢唐庫潘葑庫有之天宗未有棧庫橋道卷應屬偶譌宜從官寺卷改作天宗煮庫

眞如寺在覓渡橋西宋韓蘄王捨宅爲寺構重閣安奉金書大品般若經智度論於其上元至元二年燬

洪武十五年重建

武林梵志

韓蘄二有二花園一在塘南村西近德勝橋園內有秋霽堂堂面鑿池約十餘畝蓄養異色魚環植奇花異卉臨池構亭匾曰滌慮軒面有假山疊成巖壑其下有洞可容數人坐飲年久俱廢只遺奇石數塊近

爲富豪移去舊置石碑今沈埋土中時或露頂一在

梁婆橋北

武林野錄

五里塘在良山門尉司衙側

咸淳臨安志

自施家橋至東新關一帶直塘地長五里因以爲名宋時菜市河水西合於泛洋湖其北溢於五里塘者惟沙河餘波耳自明築會安壩而沙河截又築豬圈壩而泛洋湖反挾天宗門所出水東趨菜市河以並會於五里塘出東新關爲上塘河源河身深廣幾較倍於前矣婦說上塘河首受城內城東五河一湖最源大而流長豬圈壩築諸源皆阻僅餘清湖一水達

良山雜誌卷一

五

於德勝而德勝橋北又築石壩則清湖源復斷絕卽泛洋之自覓渡橋分注者亦絕今上塘所恃爲源者僅此五里塘一道而已

自記

章藻功陪海甯楊以哉司馬泛舟觀白蓮花序歲值歸餘月終幾望插奇峰於天際未辨陰晴引流水於門前不勞杖履少司馬楊公和傳說之鹽梅樂謝安之絲竹嘉賓晉接哺握唯三勝會招邀詠觴各一團欒明月興不淺於武昌披拂溫風飲且伺夫河朔斯時也理桂櫂而出東皋鼓蘭橈而臨北郭逶迤五里周折半灣翠影遙遮則鷺拳獨立

清流亂簇則鷗羽經翻色落水開香浮葉際出淤
泥而不染自在盈盈笑脂粉之無顏生來淡淡苟
鄰亭榭梨花將柳絮同清若近樓臺碧檻與朱闌
頓素太液池之妃子解語爲煩姑射山之仙人羣
居尤妙被風搖碧碎露冷紅銷驚過眼之韶光難
畱綺麗倏傷心於閨寂盡洗鉛華然後知形非歸
眞者不全而質近自然者爲貴也有若功名旣立
廟廊寄邱壑之情富貴都忘山水得琴尊之趣看
親人之魚鳥已等虛舟恐待公以夔龍尙資作楫
如藻功者集裳爲度窺鏡無光菡萏初舒遽隕美

艮山雜志卷一

三

人之涕芙蓉共泛幸陪長史之遊獲飽清芬頓銷
溽暑晴光微逗旣无折巾冒雨之嫌雲氣成陰不
作赤腳踏冰之想曲高白雪難和鏗鏘酌滿黃流
奚辭醕酌惟是載賡雅唱爭看似錦之花倘其欲
解宿醒應取如船之藕

思綺堂集

陶宗儀五里塘破屋三家市扁舟五里塘冷波浮
落照飢雀聚枯桑氛祲乾坤戚兵戈道路長漂流
無倚著何日定歸鄉

南村集

按集次此詩於西湖紀興後蓋元至正末南村
避兵僦杭時作也故其辭多傷感

顧之麟自五里塘至橫涇橋五里塘東有所思橫
涇橋外夕陽時舟中飯熟香先覺道上詩成景又
移送客乍迷花片片別家易遠水差差一官於我

渾閒事捩舵回頭轉自嗤

寸田詩稿

杭世駿泛舟五里塘支河繞郭路非遐五里沿洄
細漿划疊嶂漸青雲白白小桃未綻菜先花頽陽
破寺春塵暗野水荒陂小約斜不見市帘桃柳外
傾壺仍苦酒難賒

送老集

梁啟心冬日同樊榭竹田東郊閑泛風時村郭共
幽探人比閑鷗喜得三耽寂恰逢殊勝寺倦行又

艮山雜誌卷一

三

過偶畱菴扁舟茶竈寒初試小市河橋日半含歲
晚關心惟菜把舊曾學圃尙能諳

南香艸堂集

吳穎芳步五里塘投東山社樹含風動酒旗愛幽
足力勝他時通河放緯拳雙健曲岸迴篙舴艋遲
水夾煙叢頻改徑樹圍沙嘴別成籬爲尋宗炳青

霞客遠谷懷銘往賦詩

臨江鄉人詩

翟灝五里塘豬坊鴨舍短長橋暫出江鄉路不遙
記得往年曾借問白荷花外小停橈

無不宜齋稿

范浦鎮端拱元年置隸仁和縣

乾道臨安志

仁和縣四鎮曰臨平曰范浦曰江漲橋曰湯鎮

元豐九域

志

范浦鎮市去艮山門四里仁和尉司在焉地多芍藥冠於諸邑有早緋玉白綴露等名又有千葉白者土人尤貴之

咸淳臨安志

錢武肅於唐景福閒新築羅城周洎范浦卽此地也宋時去艮山門四里元末展城後約近二里矣唐崔國輔有宿范浦詩云月暗潮又落西陵渡暫停村煙江海霽風亂江星路轉定山遠塘連范浦橫鴟夷近何去空山臨滄溟詳詩語似浦在江濱倪氏神州古史攷因指錢塘范村爲古范浦與鎮在仁和五里

艮山雜誌卷一

三

塘者不合愚謂兩地本不相同其同名則相因也浙東商賈渡浙多先萃聚范村再由范村泛裏外沙河沿東城過艮山門於五里塘爲懋遷處故其兩端同以范浦爲名如城北湖州市因湖州物貨彙集卽以名市西北餘杭塘因餘杭縣舟楫往來卽以名塘皆自宋以來傳呼如此范浦鎮亦猶是耳

自記

周紫芝馬上觀道旁賣芍藥口占沙河簾幕近蒼葱芍藥絲頭十里風誰道昇平本無象江都花是

舊時紅

太倉梯米集

按沙河道旁近於范浦與潛志范浦多芍藥語

合因錄之

仁和縣尉司在良山門外范浦鎮市紹興元年正月

尉高公泰建

咸淳臨安志

建隆三年每縣置尉一員在主簿之下凡縣不置主

簿則尉兼之中興沿邊諸縣閒以武臣為尉並帶巡

捉私茶鹽礬亦或文武通差

宋史職官志

仁和縣尉司元仍宋舊治

成化杭州府志

宋仁和尉可攷者高公公泰外大觀時有程公邁見

汪藻浮溪集又艾公晟作大觀本艸序見文獻通考

靖康時有陸公棠見陸游渭南集紹興中有芮公暉

良山雜誌卷一

三

見宋史本紀列傳德祐時有梁公棟見胡迺作其詩

集序元尉可攷者至正時有俞公元見楊維禎東維

子集諸公多有事蹟可書芮公尤卓

自記

呂祖謙哭芮公十詩之一際野塵埃撲面來萬人

蟻聚撥難開手中杓柄无多少蟄盡飢腸十月雷

自注云公初為仁和尉歲荒殍者滿野區處賑恤

各有調理 東萊集

按北宋尉司本皆治州縣城外高公泰特重建

廨宇耳如錢塘尉治錢塘門外仁宗時已因仙

尉之稱噪著而潛志謂隆興尉施溫舒建可比

照也元定仁和爲上縣置達魯花赤及尹丞簿尉各一員典史二員時猶尉與典史各置明初始不置尉以其職俾典史兼之蓋自北宋至元末尉司衙悉在五里塘也

紹興十一年五月守臣俞侯奏府城之外南北相距三十里人煙繁盛各比一邑乞置城南北左右廂差親民資序京朝官主管本廂公事從之乃置城南左廂於嘉會門外城北右廂於餘杭門外又分城外地爲四壁東南壁隸於左廂西北壁隸於右廂其東壁東至螺螄橋接連茶漕界西至崇新門外南北兩口

良山雜誌卷一

三

禁城南至眾惠橋北至無星橋接連仁和尉司界

臨安志

按元史地理志至元十四年以宋設杭州廂壁爲四隅錄事司泰定二年并爲左右二錄事司楊維禎撰陶煜墓志謂其降杭州東北錄事典史卽此

無星橋在良山門外尉司衙前

咸清臨安志

昔居民有俞姓者因日上星後因愈故建橋以無星

名

嘉靖仁和县志

無星橋卽今所謂俞家橋沈志云俞姓人建是也橋

在會安壩側沙河柳林開水由此橋注五里塘自記

紹興剋置禁衛諸軍額管七萬三千人共六十一寨

後軍馬軍二寨在無星橋北浙江水軍額一萬人共

十寨一在無星橋北行在所錄

楊相橋在五里塘宏乾道開仁和縣尉為首募橋再

造并即修五里塘以北礮文鈔修

釋居簡城東楊相橋再造并修五里塘募疏橋名

楊相如子產濟人之心事屬梅仙試相如題柱之

手春至甘棠夾道秋來潢潦無垠咫尺長安淹回

半路欲展扶顛之力平步青雲要知駕險之功橫

艮山雜志卷一

四

陳砥柱北礮文鈔

按宋時五里塘一帶咸淳志載橋凡十有一而

楊相橋未與豈自再造後別改名歟

抽解竹木場又名木稅場隸轉運司凡八所一在范

浦柵醋庫隸臨安府凡十二所一曰范浦醋庫在仁

和尉司衙側咸淳臨安志

行人橋在城東五里塘盧家雪窖南咸淳臨安志

雪窖宋紹興時藏冰窖也周應合景定建康志有雪

窖四所與倉場藥局等並載臨安志僅附見橋道卷

者尋以無冰可收廢置也自記

二浙少冰雪紹興壬子車駕在錢唐是冬天寒屢雪
冰厚數寸北人遂窖藏之燒地作窖臨安府委諸縣
皆藏明年五月天中節天適晴暑供奉行宮有司大
獲犒賞其後錢唐無冰可收時韓世忠在鎮江率以
舟載至行在晝夜牽挽謂之進冰船雞肋編

翟灝分詠城東古蹟得盧家雪窖城東五里塘雪
窖南宋說挂名因河梁圖經未專列地室例儲酒
茲豈儲以雪夙聆進雪表未覩儲雪訣清源雞肋
編旁引可資決紹興壬子冬行都天凜冽層冰積
數寸僑戶紛取挈燒地擬凌陰治窖納堅潔發之

艮山雜志卷一

四

槐暑時慶屆天中節藉手供奉官宸顏對充悅功
令率爲常九縣慎封闕典禮欲增修風土柰殊別
水澤腹稀堅寢廟薦仍缺轉飭建康軍十段遞挽
掣建康篇籍存雪窖四所揭名雪寶則冰義類自
昭析彼窖旣別營此窖應中輟惜墨潛君高已輟
不煩說尙有孤山陰逸蹟此駢埒緋衣荷鍤羣收
取值歲闋畱眼竹坡翁清吟供採擷盧家爾何輩
一姓轉忝竊卻欠詩人逢微聲待泯絕銷夏偶分
曹曠世慰遺軼無不宜齋未刻稿
看經院在范浦鎮河下周顯德四年錢氏建院前有

看經橋

咸淳臨安志

殊勝寺在良山門外三里建隆元年吳越王建元係

最勝寺治平二年改賜今額

咸淳臨安志

寺初爲瑞竹菴在今平江沙地中晉天福四年移五里塘東景州達和尚爲開山祖元初有圓明通應禪師名正因字壁歷歲飢施粥日活千人御史崔某薦入京見世祖稱旨賜號至元間寺燬於兵明洪武十五年僧大乘重建爲寺中興祖至本朝順治十六年不戒於火止畱白雲雲深二寮居舊有碑刻今亦以火燬不存

殊勝寺錄

良山雜志卷一

聖

梁啟心過殊勝廢寺可有金明照世無猶傳石晉紀祥初悟從天際聲聞入寺歷東來劫火餘滿地霜蕪迷祖塔一林風葉戰僧廬獨憐古礎方花在蘇蝕年年繡不如

南香草堂集

鮑家橋在五里塘東新橋側

咸淳臨安志

按今呼鮑婆橋橋下支港東北通全厦廟干墩村等處因亦設柵查驗俗謂之東小關五里塘水自東新關北注上塘河

外沙河南白竹車門北去繞城東過紅亭稅務前螺螄橋東至蔡湖橋與殿司前軍寨內河相合轉西至

遊奕寨橋前軍寨橋至無星橋與壩子橋河相合入
艮山河沿城泛洋湖水轉北至德勝橋與運河相合
舊志作外河城外既有裏沙河則此爲外沙河明矣

今有外沙巡檢司

咸淳臨安志

外沙河自永昌門繞城東北過永昌壩螺螄橋東至
蔡湖橋北連慶春艮山二門沿城轉西至會安壩下

艮山河入泛洋河轉北至德勝壩東與上塘運河相

合

成化杭州府志

沙河夏氏杭州府志載入錢唐今查三沙河首尾俱

在仁和縣故改入仁和

浙江通志

艮山雜志卷一

三

按潛氏所敘段落皆宋地名今里人多不知者
因並錄夏志備參潛云舊竹車門卽夏所云永
昌門今之望江門也紅亭稅務潛已自注云今
廢度其地當近永昌壩螺螄橋在舊崇新門今
清泰門外蔡湖橋在螺螄橋北殿司前軍寨潛
敘兩見質諸行在所錄前當爲螺螄橋東北之
馬步軍寨後則東青門之外步軍寨也遊奕寨
在崇新門以北其教場在東橫河蓋河自崇新
門北少環向西連接東西二橫河也宋時外沙
河道惟此處與今小別其餘悉同若無星橋乃

在五里塘尉司衙前壩子河良山河各志未有明文似壩子河卽後沙河良山河卽五里塘河蓋後沙惟以壩子橫截爲別宜得稱壩子河五里塘直對良山門宜得稱良山河也潛氏先言無星橋後言壩子河此間似有小誤夏志以河載錢唐蓋因承自唐書不思仁和之爲錢唐分縣

餘杭郡錢唐縣南五里有沙河塘咸通二年刺史崔彥曾開

唐書地理志

聞昔潮水衝擊至於奔逸入城勢莫能禦故開沙河

良山雜志卷一

畧

以決之河有三曰外沙中沙裏沙

施宿蘇詩注

景龍元年沙岸北漲地漸平坦州司馬李珣始開沙河

水陸成路事見杭州龍興寺圖經

演繁露

唐中宗景龍四年開沙河攷其時州之司馬乃宋璟也

七修類稿

按王應麟玉海亦如唐書所說演繁露但據釋氏圖經其州司馬姓名又與他籍不合論世者一當以正史爲信矣然白居易寄題餘杭郡樓有北郭沙隄尾句是長慶時已有沙河晏殊輿地記謂咸通二年刺史爲崔亮與唐書亦傳名

不同

沙河宋時居民甚稠碧瓦紅簷歌管不絕官長往往
游焉故蘇子瞻有雲煙湖寺家家境燈火沙河夜夜
春之句初蘇子瞻倅郡時過沙河意有所屬比來守
郡則其人已去矣故其詩云惆悵沙河十里春一番
花老一番新小樓依舊斜陽裏不見樓中垂手人蓋
亦杜樊川尋春較遲之慨也

游覽
志餘

蘇公詩屢及沙河不止此二端如惜花詩云沙河塘
上插花回醉倒不覺吳兒哈自注云錢塘吉祥寺花
爲第一王子清明賞會最盛夜歸沙河塘上觀者如

艮山雜志卷一

巽

山爾後無復繼也又望海樓晚景云沙河燈火照山
紅歌鼓喧呼語笑中爲問少年心在否角巾欹側鬢
如蓬又湖上夜歸云入城定何時賓客半在亡睡眠
忽驚矍鑿燈鬧河塘市人拍手笑狀如失林麀羅良
注河塘卽沙河塘也又和元素南鄉子詞云今夜送
歸燈火冷河塘墮淚羊公卻姓楊是知宋時沙河自
竹車門繞城東北訖餘杭門七八里閒燈火相接無
非繁盛之地故其風景足述一過再過流連贊歎不

自嫌其詞之複也

自記

鼉補之七述寶則璆琳珊瑚瑪瑙砮砮藥化之玉

火化之珠紅黃白綠磊落滿櫝北商東賈百金不
鬻沙河雨晴月照燈明席張案設左右煌熒遠而
望之奪人目睛雞肋集

陳淵初到臨安風際管絃朝病酒雲中樓閣夜焚
香十年一夢沙河路獨步春泥覺燕忙熙堂集

吳文英贈盧長笛調寄醉桃源沙河塘上舊游嬉
盧郎年少時一聲長笛月中吹和雲和雁飛驚物
換歎星移相看兩鬢絲斷腸吳苑艸萋萋倚樓人
未歸夢窗稿

按趙清獻抃已云河塘繁劇是杭州嗣後如王

艮山雜誌卷一

吳

蘆溪云行盡沙河塘上路夜深燈火識昇平楊
濟翁云金鞭爭道萬人看香塵冉冉沙河市姜
白石云沙河雲合無行處惆悵來游路已迷方
桐江云猶有沙河塘上路賣花聲作舊時春翟
存齋云沙河塘上路歧賒扶醉歸來日已斜合
東坡及无咎默堂夢窗等篇觀之疇昔沙河風
景自可想見

蒲宗孟遊虎邱書錢唐舊遊詩望見遠峰疑是街誤
尋歸路認花樓自注云石街南高峰勝處花樓沙河

勝處

吳郡志

白居易花樓望雪命宴賦詩連天際海白皚皚好
上高樓望一回何處更能分道路此時兼不認池
臺萬重雲樹山頭翠百尺花樓江畔開素壁聯題
分韻句紅爐巡飲煖寒杯冰鋪湖水銀爲面風捲
汀沙玉作堆絆惹舞人春艷曳勾留醉客夜徘徊
輸將虛白堂前鶴失卻樟亭驛後梅別有故情徧
憶得曾經窮苦照書來

長慶集

按是編所錄惟慶春艮山門外諸蹟餘悉畧焉
花樓據白公詩語似今望江門外不應預錄而
各舊志竝不知樓在沙河故未有掛名古蹟卷

艮山雜誌卷一

巽

者特表出之

後沙河在艮山門外壩子橋北

咸淳臨安志

南接城內運河北達蔡官人塘河

嘉靖仁和县志

此河卽外沙河之下流自城隅轉西過今會安壩注
五里塘初未建會安俞家兩壩時原有一大壩當將
西轉處橫截其流謂之壩子自壩以北別稱後沙河
或亦稱壩子河其水東分一支過永濟跨塘顧家三
橋轉北自鄭家麥莊橋至石斗門又自鄭家橋東過
彰嘉趙家橋轉東北過揚嘉白石寺橋至姚斗門二
斗門所以遙輔壩子功用均後沙蔡塘兩河之高下

者也自元末展拓城基以沙河爲濠而壩子廢外沙
後沙遂渾合爲一東出支河別爲俞家壩截出勢乃
與蔡塘河平二斗門亦以無用見廢自記

洪昇沙河寓居籬根連艸徑沙上啟柴門疊嶂青
三面垂楊綠半村花飛羈客淚春動別時魂澤雉
雙雙雉朝飛過短垣深巷斜通市高城近俛郊池
寒魚聚窟樹大鳥爭巢巖子哀時命劉生廣絕交
敢云吾不媿且任客相嘲稗畦集

厲鶚閑步東郊晚眺沙河雨多長禁足及此出郊
看風力暄猶勁天容霽始寬波神青櫟廟田祖白

良山雜志卷一

哭

茅壇詎學懷甄俗班春話好官村舍留人眼魚梁
枕水低林長其澄映雲細得端倪山影鳴榔遠蘆
根下拚齊聞心分物色坐待日平西

又雪後沙河寫望野橋俯川光微曛隱踈木餘雪
連平陰遙山自相屬逶迤入城隅寒色翳空曲離
離被沙草歷歷明村屋應有林棲子殘編時映竹
烟水抱一灣皓然行徑獨風閑魚不上槽鳴酒初

熟毋憂世士知清境非所逐樊謝山房集

金志章沙河泛舟晚歸同玉篴瓶城炁齋扁舟搖
蕩水雲間疏景蕭疎客意閒北郭晴光連睥睨臯

亭山翠露孱顏歲豐農事登場早日落樵歌縱櫂
還習習林鴉紛接翅遙看月已映前灣

江聲草堂集

李汪洪沙河寫望蕭閒莎草徑迢遞夕陽痕破寺

鐘初響平沙鳥獨翻江空天與碧樹迴野難昏最

是耽幽客柴門靜不喧

東柯存稿

孫驥沙河匹影白於練天光靜欲分雙橋時蓄洩

千畝潤耕耘燈火明河岸風花漾水紋城頭芳草

色空翠落紛紛

晴川詩鈔

魏之琇沙河晚歸櫂聲鴉軋傍寒梅翠影蓬窗落

照開好是詩人歸去晚半山遙送入城來官河柳

良山雜志卷一

巽

影帶橫橋酒旆西風晚自搖燈火隔簾人隱約小

樓臨水坐吹簫

柳洲遺稿

翟振觀沙河水漲蓼灘沉碧杳無邊放眼沙河漾

野烟漫與江山邀酒盞閒隨蓑笠放漁船松梢雨

集溪紋合梅萼風高燕翅偏對榻最懷陶謝侶水

樓深坐引吟篇

西離存稿

按施宿云沙河有三曰外沙中沙裏沙中沙卽

前沙河裏沙卽後沙河耳宋有裏沙河堰在餘

杭門外仁和橋東餘杭門今改名武林其東正

後沙河也潛氏已載有此堰乃以城南跨浦橋

渾水開一帶爲裏沙河鉏鋤甚矣彼河更在外
沙之外貼近江流時因呼之爲貼沙河蓋自吳
越射潮隨沙移岸後續開故不在唐時三沙河
之列

五月沙河觀龍舟

約齋四并集

按約齋游賞之地悉距南湖半里此沙河當斷
屬後沙河

明初馬仲禎卜築沙河名一灣烟水止菴祥公贈以

詩

樊澗山房詩注

釋德祥一灣烟水爲馬仲禎題占得沙河水一灣

良山雜誌卷一

辛

此身能與狎鷗閑桃花斷岸無人到楊柳衡門盡
日關千里烟波歸老眼十年魂夢入鄉山扁舟西

塞山前路流水肥魚待爾還

桐嶼集

徐堂琴溪草堂賦得一灣烟水青瑤流繞舊迴塘

號灑新添瓜蔓長魚鳥久成歡樂國人家原住水

雲鄉城坳野艇偃芳艸岸曲空簷掛夕陽游賞有

餘吟未足過橋來扣讀書堂

藉谿古堂集

李睿同作一道明流幾里紆環環卻抱古城隅平
添梅雨鷗波濶靜寫雲林墨意粗幽翠陰長依野
艇軟紅塵遠隔菰蘆絕憐彎復彎中往詩侶能來

不待呼溪堂小集

按卽一灣二字知此是後沙河也祥公又嘗有送馬仲禎之潁州詩

艮山門外有會安壩洪武初置以豬上河之水讀史方輿

紀要

會安壩洪武五年建明一統志

壩置碑亭一座載奉旨車壩所用筏纜不許科民事設壩夫三十名宏治十八年工部水利郎中臧鳳因地僻事簡奉准裁革二十二名只存八名閘一座名清涼閘夫二名舊竝豬圈壩官帶管自裁割後受德

艮山雜記卷一

三

勝壩官帶管嘉靖仁和縣志

按洪武以前未有此壩沙河水建甌直瀉何所爲樽節乎上游之必有壩子觀此益信

清波菴在艮山門外建自錢氏築塘捍潮時歲久圯明天啟間僧智專重建縉紳洪瞻祖錢受益黃堯勳其助成之智專字無學本貢陽軍職爲人言端履實精奉法戒嗣法自賢開拓菴基稱大悲殿司諫屠粹忠許以先隴大樟施與樟忽無風自仆時人咸异之粹忠爲撰靈樟記仁和縣志

張丹送吳梅梁入道序世之學儒者不言怪論語

曰子不語怪夫世非無怪夫子特不語耳然而獐羊楛矢之辨左史傳其事則亦未嘗不語也至于馬遷班固蔚宗之徒往往摭拾異聞以傳之史策如漢高蛇化光武冰合等事可不謂怪乎若夫釋氏固言怪之教也佛生地湧金蓮花自捧雙足是花怪也榴生兩肘是樹怪也雙雀巢肩是鳥怪也其身長一丈六尺是形怪也珠眉月面雲眸雪齒是相怪也而其設論曰峭緊草鞋是怪子言機大白牛車是怪子言法阿耨多羅三藐三菩提乃無上上等覺是怪子言性以至山河大地有也而謂

良山雜記卷一

五

之無地獄變相無也而謂之有彼無之而非怪也吾友梅梁氏將學于佛來謂予言良山門外沙河圩有庵曰清波明時西蜀僧焚修數傳至徒均知清淨爲教里人生歡喜心以室卑陋將復拓建缺少左梁謀於沙田屠氏有屠生生者許以墳界外樟樹一株僧不可問其故曰汝族衆多也于是告之族皆允諾僧又不可曰吾無力以伐此也生生強之僧戲曰除非仗天神力樹自眠倒然後可已而夜三鼓樹拉然崩里中皆驚于是蓋成而吾學佛之意決予曰是真可怪也已夫斯僧也未知產

于何時始也寸寸而長日日而積且雨露也而濡
日月也而榮春秋繁露以老其幹也而堅天時地
力叢叢靄靄盤結塊磊枝條翹竦或者尪偻腫
謂之水病木氣在皮皮不焦爍終不槁落是可怪
一也其或蛇虺以爲窟乎螻蟻以爲穴乎急飗暴
雨以披其枝乎鳥糞蟲沫以損其精乎雷劈火灼
以碎其體乎若者未免乎累久之乃仆今適與時
會是可怪二也求之古者率多奇異如桃梗與土
偶語老桑與龜語叢木神與人卜乾陵柏之文理
多有菩薩雲氣狀桂州月夜有笛聲發于桂樹中

良山雜志卷一

三

李固行柳樹下聞彈指聲曰吾柳神九烈君已用
柳汁染子衣科第無疑果驗王德祖家林檎樹生
癭癭破得一孩兒名曰梵志蓋菩薩示化也斯樹
也豈果有神以相默助者乎是可怪三也且也吳
氏以縱橫浩瀚之才二十年以來吳楚幽薊數千
餘里跋涉奔走陸則豺虎以爲羣水則鯨魚以爲
侶晝夜反覆無一食而安于口平于心無所遇于
世而世亦莫知其才也已矣年已五十矣不得已
而逃于禪矣今而後吳君將冠毘羅之帽被縑素
之衣不飲酒不茹肉日誦蓮華經朝暮鐘鼓手持

摩尼珠口中喃喃不休見者莫不驚以爲怪也吳君儒行者也而忽貌爲釋雖予亦以爲怪也前之未釋乎心今則釋乎心而并釋乎貌前此之不怪者乃真所以爲怪而今此之怪者乃其不必怪者也是真可以語怪矣因爲序

秦亭集

洪瞻祖贈庵主無學良山門東清波瀟清波瀟畔清波菴茲菴由來七百載云是錢王所建龕宋元暨明歷三古桑滄變遷今非故鐘魚寂靜棟宇摧曾得殘磚與斷礎無師來自清涼山蛾眉衲子曹溪禪覺王指點因緣路杖錫翩翩到此間團瓢初

良山雜誌卷一

番

結僧徒集法會宏開資願力談經屢致役旱龍說法真堪點頑石經營締構禪宇成花幢草席一時新廣長妙舌宣義諦梵唄風飄四野聞菴前菴後桑麻綠沙河水碧流寒玉客來揮塵共談禪釅茶百瓊猶未足

仁和縣志

景星杓清波菴納涼遇雨短櫂連塘入門襟一水開高僧留茗待深竹送涼來未漾波心月已聲池上雷余懷在濠濮安得夜浮盃

初堂集

釋超達清波菴訪戒輪師以夙慕清波勝聊爲策杖游故交情自洽新句遠相投月照高齋靜泉流曲

澗幽坐來深夜後蕭瑟轉宜秋柏菴詩草

釋明乾懷清波禪院燈火沙河岸多年不復行人

烟攬樹色禪閣納溪聲手種花成畝師傳偈在簾

何時得歸去十笏老吾生二憨道人別錄

按自清波瀟北西至今艮山下河身約廣二十

丈宋時壩子揣形勢當設于此處

柳林間在艮山門外嘉靖仁和县志

會安壩內有清涼柳林二閘泄沙河水入五里塘一

帶沈氏運河議略

閘址在吳氏別業後現為市廛所侵水道多淤塞自記

艮山雜誌卷一 壘

吳穎芳柳林閑居靜憩北窗下良日開幽經煩言

悉擺落直換書精英稍倦起觀化明河抱秋城山

峰插遙岸到門流水聲波魚觸舟躍田鶴逐人鳴

綢繆淨名旨動靜恬性情萬象自覺現千累由長

生優閑葆蹇拙誰歎翼高名

又柳林前後野步蟬翼輕紗拍綽風赤亭紅榭兩

相逢平波雁宕迎潮緩深柳鶯簧喚酒濃一碧暗

通凡幾汶晚晴相賽有諸峯樓前危睇非前度魚

鎖生衣翠戶重臨鄉人江詩

自柳林以東至清涼閘行旅從出草塘新塘要路河

堤偏近田畛日益頽廢晦雨夕行者難之康熙五十八年里人共興義役築爲石堤長六十四丈立巨青石爲闕命之日清涼堤自記

吳穎芳沙河隄晚歸豁豁攬秋爽寥寥澄暮思水聲清落處雲朶白凝時戴月眠漁父滄波舞鴨兒家人歸特晚腹笑老來癡臨江鄉人未刻詩

蔡源清涼堤晚眺短衣仄帽舊詩徒高咏澄川興不孤野岸夕陽漁晒網寒泉落木雁銜蘆人烟負

郭遙堪數山脊臨秋淨可暮入暮西風吹鬢影河

梁歸去瘦藤扶西半齋焚餘草

良山雜誌卷一

美

清涼閘在良山門外臨江鄉八圖清涼橋下雍正七年總督李衛委仁和知縣重怡曾重修浙江通志

俞家壩在良山門外清涼閘側元未展城廢宋時壩

子兩沙河水勢高下無所節限明初乃設會安俞家

二壩一以界其北流一以界其東流前志祇載會安

不載俞家是闕失也杭州府志

溜水橋在清涼閘北有南北二橋閘水自二橋下東過楊墅轉北入蔡塘河不通舟楫水聲清洽可聽有似琴瑟故前輩稱之日琴溪亦稱村日東泉第一村

白記

姚大呂溜水橋沈翁宅看菊略徇橫溪小隱家當
門老樹亦查牙如何蘆白楓黃後猶見猩紅五月
花來游正是菊花天瘦影相看態亦妍一種秋心
消未得西風吹上畫檐前憑誰巧手護花盜三百
團桑寄一枝身在畫圖渾不覺夕陽影裏立多時

白河
詩鈔

元屠存博故居在溜水橋存博名約號月汀與嘉興
顧伯玉文琛同里白廷玉珽張仲實樸陳無逸康祖
其結吟社剡源戴帥初表元爲撰城東唱和序裔孫
肇邵當康熙初棲隱舊屋振其風雅著亦有詩集問

良山雜誌卷一

七

世自
記

戴表元城東唱和小序余少時學詩誦夫子之說
曰可以興可以觀可以怨易知也至于可以羣而
難之有老先生教余他日當自解此非可以言語
悟也蓋自弱冠出游至于今間歷三紀平生所遇
從延接貴賤浮沉賢愚離散無慮千數至是而始
畧知夫交之難而猶未知羣之難也非羣之道難
于交而交之可致不如羣之不可致也交之羣莫
盛于杭于是歲在大德戊戌嘉興顧伯玉客至杭
東城杭之賢而文者皆與之游而屠存博白廷玉

以歲晏立春前一日過廬清談劇飲甚適既少倦
卽相與循關坳步江臯眺太伯錢鏐之荒墟弔陶
朱子胥之遺跡意色蒼莽襟神飛竦退而存博遂
先成古詩二韵六言五章以紀其事既而廷玉有
和廷玉旣和人別爲詩而張仲實陳無逸諸賢又
皆有和詩遂不可勝紀其氣如椒蘭之交襲而郁
也其音如簫鐘之迭居而不亂也其數如針芥磁
鐵之不相違而相入也噫嘻美哉宜羣矣哉余也
山野土木之人無能預於茲集而知舊憐其流離
每不踈外辱以小序見命不敢固辭私心亦喜交

良山雜誌卷一

美

道之有羣而詩學之少驗也而爲同業者願之因

附繫其頌歎云

剡源文集

徐介過屠肇邵書舍小飲城郭晴雲照水涯平橋
曲徑到君家何妨小築依荒蔓祇爲閒階看落花
把袂漸驚頭鬢老相思那隔道途賒故人無恙能
頻聚且倒清尊送歲華

狷菴遺稿

師古齋前明遺老李逸度遯跡所也逸度號遂初老
人所存詩有前後梅花二百咏

自記

李逸度詠梅百首自序昔在丁亥余自金陵徙錢
塘僦居良山沙河間崇墉在門清流遶岸野陌參

差卉木羅布良足娛也寒暑推遷忽忽四十載曩
所棲寓窗扉半壞垣壁盡傾內外洞然心跡轉曠
每憶前賢三日不舉火十年不製衣肘露踵決杖
藜行歌又或置身異域渴飲雪飢吞蝗大節凜然
炳垂史冊而余艱苦備嘗及今毛髮種種身世所
歷境遇頗殊憂從中來能無嘯嘆百首者何乃乙
丑翫梅作也元日逢春中庭獨坐偶思古今咏梅
各什興趣溢發就茲結撰雖情鍾花樹亦非無意
旨可遡焉蓋余夙勵勁節百折不回老涉冰淵惟
恐隕墜時于風雪之下對彼梅林羨其貞潔是詩

艮山雜志卷一

堯

所載或詳述于卽事或追敘夫平生滄桑陵谷都
付遊嬉悒鬱牢騷盡歸虛澹澹旬之間率爾成帙
竄削屢經寫錄始定仰希往哲近質素交託嘉樹
以抒懷藉芳林而遣興西陵羈客老尙潔身南國
孤臣窮餘傲骨當不同枯木朽株湮沒塵沙已也
才本踈拙不受律拘句皆五言多從古體敢望高
華詎免朴率世有知我者當尋求于聲調之外可
耳

又詠百梅律自序丙寅正月中旬默坐空齋幽懷
抑鬱不覺憮然日斯何時也窗前寂寂曾不見梅

花競發向余一吐氤氳生氣乎春待梅乎梅待春乎較之乙丑元日能無遲暮之慨乎梅乎梅乎殆氣機有未至者乎余嘗平居自言曰善知機者能藏其機而不洩運其機而不滯是以巢父得之而標其潔老聃得之而守其雌伊呂得之而大其用良平得之而利其施余雖蒙昧庶乎危得之而勵其操尙豁其襟期我非梅也有時乎梅卽爲我梅非我也有時乎我亦爲梅臭味迴合人物莫分形影相親今昔無間遂于翫對之餘復撰七言近體百首余羈棲武林郭外四十年今春秋七十有三

良山雜誌卷一

卒

矣老態何堪孤踪徒託感古賢之難企慨時事之轉非凡詩所述雖篇篇有梅多借梅寫心猶夫陶公諸詠篇篇有酒蓋寄酒爲迹者也至于字句工拙聲調合離風格之雅俗正變媿非詞人率皆安作又奚論焉夫機固事會所關亦時會所值也梅乎梅乎遲遲有待其仍在斯春乎倘能斂而積之達地氣于幽遐翕而張之迴天心于冥漠則時會旣至事會乘之梅僅宇宙間一小卉耳于余何有哉仲夏之月霖雨初霽情懷調暢搦管忻然輒成短引敢以示諸故人兼用自慰云爾

胡介師古齋咏梅詩序余曩有渚中翫梅諸短律
遂初老人見而悅之今茲春孟出其所作咏梅百
首示余則皆五言古體也時物關情事跡雜見幽
趣逸致豪氣壯懷紙上筆端含吐隱躍詩可以觀
于此益信矣夫陵谷變遷宇宙反覆士子軀體倖
存骨態不知幾換老人夙紆青紫分莅方隅禍患
相仍潔身養晦遂爾長辭故都遠徙吾郡羈棲郊
郭之間偃仰河橋之側刀圭託業紱綬如忘屣履
勞形田園何在歸心徒切生計轉艱破壁頽簷蕭
條伏處歷境若斯亦云酷矣老人囊空盜竭談笑

良山雜誌卷一

空

自如鬚髮皤然顏同少壯當出入閭閻時人有以
里塾師田舍翁目之者酬對頗歡了弗介意自非
達識曠襟當不能擺脫于勢分之外也先朝耆舊
所見無多挾貴簡傲賢者未免若夫姓名久變匿
跡埋光謙抑溫和退比韋布僅于老人一遇之耳
余故置詩弗詳論爲畧道其隱居品概若此辭無
溢美識者察諸

楊墅廟在溜水橋東祀岳鄂王部將楊侯再興相傳
廟建於宋景定時歷元明來禱賽之盛他祠廟無比
擬者有別廟分建良山村自記

張灝楊侯別廟記杭城東艮山之陽有楊威武侯別廟康熙中自楊墅分建歲既久棟椽腐桷乾隆某甲子里人士相率新之堂門庭廡視舊悉有加落成礮石來謁余文昭侯靈異謹案宋史侯諱再興紹興二年歸岳忠武爲裨將以三百騎與金兵十二萬戰小商橋殺二千餘人萬戶等百人侯戰死焚屍得箭鏃二升嗚呼侯未有專閫之寄一以身許國遂奮不自顧單軍血戰一以敵千所殺過當至于勢盡力竭負重傷而死侯之忠義不誠薄日月動風雷哉天地間惟此忠義之氣流行不息

耳若侯者其氣必不隨百物漸盡其能警動威靈以錫羨斯民乃理之固然蚩蚩之民亦惟忠義之感不謀而同油油焉嚮風于于焉奔命競欲尸而祝之更不恤鳩工庀材之煩人情太抵然也自宋紹興迄今六百五十有餘禩矣國祚三遷而侯祀不改故廟在楊墅者相傳卽侯子弟所寓居遐邇禱賽踵充塞于門至不容別廟之建由以起數十年來駿奔亦無虛日今更易湫隘爲爽塏兩里間薨棲相望歌舞之聲屬于途而侯之默相斯民功用益以赫著向謂非忠義之氣貫人心其能翕協

輿情彌久而彌篤有如是耶某託侯祠下世邀侯
貺不敢忘侯德謹泚筆誌此匪徒備邑里掌故將
俾後之勵忠義者有可效焉

景星杓艮山楊墅傳爲楊將軍故宅廟在焉爲賦
此作僂力中原丈二受商橋血戰分捐軀沙場不
返銀胡鞞大將竟摧金僕姑祀典千秋存故宅忠
魂終古傍行都裹尸得遂平生志老死徒慚小丈
夫

均堂集

天仙廟在楊墅東

自記

陳張霽楊墅天仙二土穀祠合詛非忠無君非孝

艮山雜志卷一

奎

無親忠與孝非世所宜廟食者乎杭郡艮山門東
有楊墅廟世傳其神爲岳家將以拒戰死攷之於
史有楊再興者與金人戰歿收其尸得箭鏃二升
蓋其人矣不數十步又有土穀祠額曰天仙廟問
其神乃世所謂賣身葬父之董永也嗚呼方楊君
志吞金虜血戰突圍其精靈固足千古乃董君哀
痛悱惻至能感動仙女豈蘇子所謂天之有定有
未定歟楊君死不烈禍不酷不足以表其奇董君
非得槐陰事以神其迹則亦不著一則成其爲忠
一則成其爲孝其道一而已矣然楊君集矢于骨

史之說信而有徵至天仙降事近于不經而世多傳之今廟貌巍峩相望里人世祀不絕此可見忠孝之感人心而迹之顯晦平奇皆可不論也因歌之曰艮山之東二廟巍隆赫然其貌巋然其宮里翁祭賽敬禮攸同英爽昭格有感必通董君以孝楊君以忠惟忠斯顯惟孝斯崇田夫村婦白叟黃童無有遠邇啟曠振聳君父至重恒性降衷千秋萬禩共仰高風

借陰齋稿

洪圖廣寓閩中覩山水之樂懷高世志因舉家披荆于杭州艮山門外結精舍名曰伴雲謂如雲之無心

艮山雜誌卷一

齋

出岫也洪法名興弼戒律精嚴有龐居士風

舊浙江通志

菴在楊墅廟東北隅今爲尼僧所居菴前有池其水不雜鹵脉清甘如山泉儲藏經數月味不變汲取者不遠數里名雪根泉

自記

黃桂雪根泉結茅塵市外半月卻當門身許雲爲伴泉將雪作根澄光空佛性餘澤潤江村我藉煩

襟滌長須貯石尊

砥菴詩稿

吳穎芳借徐南徐了誠叔皇甫澧源翟西離伴雲菴品泉得匏宇野汲苦瀉鹵所居江海交茗飲畧無取聊以佐厨庖伴雲前有池泉脉浮珠泡去家

千餘步命傭齋器匏取汲澆舌本幸免木強嘲諸
公冀一嘗偕向松門敲對客爲挹注半銚開春苞
能傳三登法火劑善所教啜之嘆勝絕咸謂弟虎
跑斯池味誠佳久棄郭外郊從無上客問亦缺圖
經鈔物理有顯晦賞鑒徒混淆虛名衆爭詡僻處
世多拋徘徊未能去西日頽林梢

又重過伴雲菴已觸旃檀氣猶紆幾折籬池光受
花影石角避藤枝存沒朋箋在遷流歲籥遲金容

現微笑笑我鬢添絲

臨江鄉人詩

徐堂伴雲菴品泉得嘗字出郭未一里蕭條已成

良山雜誌卷一

奎

鄉平野望彌遠洒面風且涼尋泉投細路細路紆
不長好藉木上座踏破蔓草荒清磬散林樾茅檐
隱青桑菴師勤待客清癯如休糧摘茗枳籬外汲
泉清池旁乾柴掃落葉活火分佛香一飲復再飲
熟惱消肺腸絕類沉潛士所喜名不彰幸託桑苎
翁引挈得飽嘗賦詩慶其遭調水吾將常

藉谿古堂集

翟振伴雲菴品泉得白字秋郊耳目曠疎林動涼
吹追隨素心侶發興知有自同抱玉川癖遠踏布
金地幽響歇孤磬長烟曳青穗方池湛檻泉僻陋
古無誌未邀品水錄誰問卓錫地主人敬愛客春

芽厲珍秘鼎沸蟹眼繁甌傾霞腳膩微含趙州禪
味外有餘味娓娓資元譚寥寥斷塵思羣公大雅
才各蘊林泉志盜犯水厄嘲不作酪奴嗜相從漱

清流逍遙謝人事

西離
存稿

法音菴在良山門外俞家橋東明天啟四年僧嶽明
建大參翁汝進題額嶽明俗姓黃兄御史黃尊素捐
助之俗又稱黃菴

仁和
縣志

吳氏更樓里翁吳鈞建爲鄉鄰守望之所西自沙河
隄過東嶽行祠抵此有路北轉走馬塘如曲尺形俗
呼轉塘頭吳翁孫穎芳今士林所稱西林隱君也改

良山雜志卷一

套

名爲曲尺村

自
記

厲鶚秋日過吳西林郊居二首相對吳居士清風
自滿襟迢迢黃卷事寂寂白雲心瑤瑟一以泛素
塵無復侵誰傳寡女怨彌使古情深幽意紛無數
起行平野間秋陰在深樹風氣滿空山寺古尋僧
去村遙冒雨還君家饒鳥雀能賞此時閒

樊榭山
房集

姚大呂同樊榭竹田過吳西林郊居次韻郊居惟
所適一逕淨煩襟相見易彌日坐來滋隱心虛堂
容鳥息古榻任苔侵向晚清音起蕭蕭落葉深同
游得緩步幽隱在林間孤寺寒依水空城遠接山

人行隨樹轉雨歇見僧還身外能無事相看獨汝

閒

白沙詩鈔

吳穎芳厲翁樊榭借施竹田姚白沙過舍客意適
林野柴扉聚素襟飯遲花飽眼談淺瑟傳心荒遠
秋先得紛埃事不侵飄蕭門外葉餘興綠蘿深迎
暮咽寒蟬穿松入竹間訪秋吟過寺拚雨坐看山
深樹學車接長汀掠網還不離城市遠隨意水雲

閒

臨江鄉人詩

永濟橋俞家壩東第一橋也舊未有壩時沙河水自
此東出統爲後沙河

杭州府志

良山雜誌卷一

七

瑞像院舊在城內瀆熙十四年僧明祖因夢白衣大
士遂建佛宇成之日東楹現蓮花居民異之祈禱者
趨焉瀆祐五年移請今額

咸清臨安志

永濟菴在良山門外舊名瑞像後爲潮圯明萬曆壬

子僧智學重建更名永濟

仁和县志

釋元信偕潛齋訪永濟菴主霜落林塘葉盡斑打
魚人亂藕菱灣菴乘有伴常時過身賴無家到處
頑細路斜穿桑柘裏淺廬多在町畦間開門相見

還相笑各似依稀舊日顏

贅菴前塵集

漢蕭相國祠在良山門外賜額靈護

咸清臨安志

永濟橋西南半里許有曰廟所祀漢蕭相國也說者謂今艮山門內別有蕭相國廟乃宋時舊祠此蓋元展城後祠小民以禱賽不便分建情似有之自記

張颯蕭鄴侯祠逐鹿乘時早從龍擇主真薦賢功浩大轉餉事艱辛儉約師干石謙恭保一身微君

匡濟力漢業豈能新

雪巖集

草塘自慶春門外新塘之嚴家街北過跨塘橋出走馬塘長三里前人品題辨利院著其四勝其爲詩什

一曰春草塘卽草塘舊名而取節于謝公詩句辨利院志

陸敏樹草塘春望北眺層巒南聽潮閑塘春煖綠

艮山雜誌卷一

突

莎驕風光未盡遮楊柳天半雲飛鳥路遙胥山後集

許峻標草塘晚步草塘微雨歇散步豁幽襟秋柳

有餘翠晚蟬多斷吟人家迷野色潭水半雲陰林

外疏鐘響悠然起道心牧犢吟

楊博羣閑行草塘至新塘書所見草塘南接新塘

路荒蘚萋萋一道斜白竹傾筐收柏子黃藤小箔

曬綿花茅茨寂寂村中店機杼深深隰外家更有

些微可人處碧油窗內露紅紗偶留小草

釋明翹閑步草塘幾里橫塘遠市譁秋風蔽蔽穆

桐花林梢幽鳥啼殘雨空外孤鴻點落霞一塢烟

痕山寺遠半溪水影鈞舟斜桑麻雞犬閑中趣共

說桃源路不賒

楚水詩鈔

孫金鉉草塘春雨曉雨聲初歇迴塘草色深雲低
山失翠花落樹添陰蓑笠荷鋤老飛鳴聒渚禽耽
茲荒率味獨立自成吟

釋心廣草塘春雨江上雨瀟瀟林塘愈寂寥鷗邊
漁艇歇鶯外酒旗飄寒食分榆火春風散柳條平
疇千頃綠未惜竹梢遙

沈時中春草塘閒步調寄浣溪紗杏葉參差菜甲
齊雲移村路滑耕犁綠裙腰展水痕低空眼著花

良山雜誌卷一

九

難定色禪心隨絮不霑泥春來一任錦成蹊

以上辨利

院舊志

辯利尼院淳熙八年建原係慶庵嘉泰元年移請今

額

咸淳臨安志

辯利院在艮山門外草塘之右宋淳熙間建名慶庵
嘉泰間改額明天啟丙寅融如法師重建法嗣永宣
閉關其中院內有井名生生泉井畔有桑阜亭故俗

呼井亭菴

仁和縣志

院爲宋淳熙辛丑德寶禪師建嘉泰辛酉訥法師上
請辯利講院額辯利者義取元奘亡身求法四辯利

人之語明隆慶時居民見院後池中發光涸池出石
幢一座文刻創建年月知爲古刹其謀興復迎請融
如法師居此萃集施供殿宇聿新里稱祇樹林曾儀
部鳳儀題復古辯利講院額尋融師錫游諸方弟子
植松門山以誌歸期旣而刻期來歸胡通政直因又
題摩松林額

院志

吳太冲復古辯利講院碑記辯利講院稱古者何
創久也一名慶菴者何原始也一名祇樹林者何
近名也曷見其創久也宋嘉泰中納法師因德賢
禪師法席而廣之請於朝賜額曰辨利講院院之

良山雜誌卷一

半

所由來也久也曷爲乎又原始也院故有滌月池
明隆慶中院僧及里人見池中發光怪涸水得石
柱文云皇宋淳熙八年歲在辛丑德賢禪師建名
慶菴嘉泰元年訥法師請額辯利講院是歲季秋
上浣吉日監院比丘智永立并識由是知院固有
始名也曷爲乎復有近名也院歷年久漸荒地余
念名利無主自爾鞠爲茂草爰偕同志禮請融如
大師來主道場師得源於桐溪雪松法師傳燈闡
教大振法席不數年殿宇以新僧室以廣其法教
之盛不遜鷲嶺祇園余嘗題聯贈之云祇樹園中

花作雨恒河沙上地爲金遂亦名祇樹林也夫杭郡寺刹往往介在湖湄山麓間紫騮青雀雜沓游觀頗多囂境院處郡城東北郊三里新塘之後草塘之間長林豐草桑麻雞犬連家比戶皆於耕織外無他事不啻武陵桃花源大雄聖人知必於是化現吾謂融法師不必定以三拳一指布衲米價廣度羣迷第於定慧下少施法力使草塘內外農有餘粟女有餘布便是無上上乘師點首曰豈唯草塘願俛闔郡豈唯闔郡願俛天下嗟乎夫是之謂慈悲夫是之謂大慈大悲也哉彼德訥二公行

良山雜誌卷一

圭

且讓師出一頭地矣爰記而勒之石

吳樹虛辨利講院志序杭州東郭外寺刹以十數菴院以千數草塘之辨利講院名獨超出一切按其形勝構居因果殊勝處其西月塘水陸峙其南崇福踞其北而白石寶界崇善等遙列其東諸寺自崇福而外皆敝寺殘僧香火鮮繼地存而已矣辨利權輿于宋世迨今千年不爲不古重興于明季融如法師名僧代出烜赫者百數十載不爲無人時久則佛安其故天龍八部道場神之所久護故值洪武僧院歸併之令夏時正成化府志此院

晏然名列不并他寺豈非爲其佛依之久刹不可
毀歟得人則刹竿高表道風之所薰扇遠近紳衿
檀信力克護持故石幢預爲發光祥鍾賢哲豈非
以其冥冥中力有振興之者而人胥應兆以生歟
院建初成 國朝初盛院僧卽撰小志一卷乾隆
十五年住持瑞峰師以其稟付翟進士晴江乞爲
整輯樹虛向與瑞師往來得讀其成本而十餘年
來不無舊事得諸記憶參以見聞乃抒愚臆繼爲
增訂綜成三卷錄竟而歸之瑞師是志也叙其古
所以示來今傳其人所以式後起紀其跡所以著
庶遠近之公論也

良山雜誌卷一

三

盛事載其詞所以輔道力郭外寺以十數菴院以
千數而辨利特先有志三輯成編卽此而知辨利
之名之超出一切非樹虛一人之私言也紳衿士
庶遠近之公論也
又觀音畫像記大士圖像聚自石倉吳志上先生
後人不能守入于王氏質庫適王茨檐曾祥館王
氏見而歡喜以修脯資償其值得十餘軸及見聖
因寺貫休尊者所畫大士變相寤寢不能忘拜請
梁編修設林杭編修墓浦作緣于寺主焚虛上人
供此像誓言生世一日留一日王氏死則歸寺恐

有違言二宰官任之此軸遂留王家續是凡遇名
筆一一購求知交遠近寄與者甚多久之共得六
十餘軸淡墨濃彩小身巨製石刻鍼繡無所不備
矣茨檐沒貫公之畫復歸聖因主僧獻之 天
子御筆作贊及書心經乃爲摹刻于石而其餘之
像少致散佚丁龍泓先生寄札於僕委作募疏勸
諸清信久無應者壬午之春翟西離居士與白金
二十五兩請此五十五軸又續得施者七軸歸于
福善精舍春秋有期張像齋供偕同志修大悲懺
法三日福善監院謂是寶貴名筆慮其竊失不允

良山雜志卷一

三

藏弃而癸未冬月西離病逝臨危囑付樹虛移貯
辯利講院蓋辯利與福善同一支屬在彼在此無
分同異與初心喜捨並非相違是以樹虛敬諾如
囑而行遂于甲申春仲歸之辨利春秋一如福善
故事而續有增添 御題石刻貫公之畫亦得

一幅迄今乙酉秋月檢之共有六十七軸念是尊
像經三通儒之手年閱近百卒歸于辯利清淨寶
地遷轉因緣不可量度豈非大士卓卓威神夙緣
住此不期至而自至者與西離初心以百八軸足
願樹虛老矣將來之滿願與否何可期必唯是歸

依之宿心亡友勤拳之委託苟能延喘一年供張
禮拜不敢少懈一期以期盡爲畢願乃叙其原委
顛末以告後來供養者

沈光珏題贈院主融如法師詩春色郊圻滿言尋
方外盟蒹葭迷野渡烟火背山城徑僻紅塵遠門
閒白鶴迎高禪曾卓錫宏願獨披荆廣殿凌雲起
沈碑出水輕團蒲三昧境鐘磬六時聲花散香林
淨雲依定石明孫枝印西祖白足重名卿粉榜輝
煌署瑤篇次第賡幽溪源浩渺龍樹法嶠嶸靜悟
燈華徹清談塵尾橫是緣毫不挂隨境澹無營洗

艮山雜誌卷一

七

鉢月在手煎茶雲滿鑑便成多寶地不媿法龍名
何日依香社終身斷俗情偶先投坐具心跡已雙
清

李逸度過摩松精舍初地恣幽尋桑麻深復深塵
埃遊子貌冰雪老僧心斜日明松徑清風生竹林
憑軒傾耳處鐘磬雜秋砧

黃埤雨後過草塘井亭僧舍東臯新雨後停履訪
精藍殘滴收花徑清光漾月潭坐聽童子偈笑領
老僧談妙理原無我觀空覺自慚

唐淵讀書辨利僧舍祇樹林中舊講堂短筵從補

絳陰涼法天已不陳三瓦養道猶堪置一牀泉布
有權甘斂跡研田無稅且鋤荒寺居獨夜成蕭索
不省崔生有報章

厲鶚偕龍泓西林遊辨利講院分韻野外寡人事
閑房坐灑然清流隱喬木秋色淨諸天蟲鳥知時
冷衣裳覺地偏幽居喜鄰近歸傍藥苗田

丁敬同作日脚逗松頂同過松下門房開青豆小
牆接古苔昏晚磬韻尤渺秋蟲語不煩坐來成小
劫未覺石闌溫

吳樹虛同作新霽愜幽尋林間寄賞心雨痕昏蘚

良山雜志卷一

妻

榻日影碎花陰詩老青藤杖禪公白氎襟不妨元
義外擁鼻洛生吟

楊元度由草塘投井亭菴尙彬上人爲設櫻筍之
金偈仄少人行春田問耦耕麥苗先柳色松頂聚
溪聲斷港漁榔入孤村酒旆迎籬圍喬木見近訪
室羅城投心二十年一笑話先緣與飲上池水因
參玉板禪窗光花弄雪暝色鳥衝烟指點如如住
都合宿疾捐

翟濤辨利院梵放與琢公茶話竹樹圍菴綠幾層
憇人亭畔井華澄十年耳但聞清梵此日身親見

老僧敲田煮茶松作響貫華說偈鳥來鷹深知世
外幽棲好抽腳塵中愧未能

徐堂摩松院訪瑞法師不遇綠桑影裏復拖筇溪
友園翁次第逢踏破養成苔蘚路來尋無定水雲
蹤紅黃炫眼有秋草蒼翠撲衣存一松落日空亭
延伫久遠林幾杵動烟鐘

茅德棻小步辨利院佳日到秋多香臺負手過閒
情花傳粉古意井無波霽色留高榻雲光隱碧蘿
曲廊徐步屨只恐損庭莎

釋貫月辨利院題壁蔽郭桑麻十里疏摩松古院

良山雜誌卷一

七

最清虛樹紅霜白迢迢夜蟋蟀堂前說梵書

釋明翹贈摩松主人二首結宇東皋外風烟到此
分開軒招野鶴移榻就閑雲堦草滋新雨籬花媚
夕曛一函茅屋下世事不相聞莎齋依古井無事
到衡門響戛風枝午涼生水竹繁疏泉通曲檻招
鶴下閒軒林磬聲初度頻驚入定猿

按院志一卷康熙元年秋胡通政直撰非院僧
筆所錄幢刻及雜詩文多賴以留其拾遺好古
之心今不可沒也乾隆十二年某益以所聞分
成一卷三十年吳處士又益以法系規約觀音

畫像因緣十餘年來造訪留咏爲三卷益臻美
備幢刻謂請額自訥法師而潛氏志列辨利于
尼院卷中蓋初本講院當咸淳時曾爲尼所居
耳

明隆慶二年五月二十一日日將暮院後池中發光
見者駭異洎其池得石幢長四尺青色七稜刻云皇
宋淳熙八年歲在辛丑德賢禪師建名慶菴嘉泰元
年訥法師請額辨利講院是歲辛酉季秋上浣吉日
監院比丘智永立并識共五十字

院志

曾鳳儀紀石幢事談經開勝院琢石記前闡積水

艮山雜誌卷一

七

沉圭影祥光煥斗文探珠誰罔象捫字類鷲羣賴
得瓊椎力分明勒舊勳

同上

翟灝辨利院觀宋刻石幢詩苔痕鏽澀青入骨高
不抵身碣一櫺周遭七面蛟鼉文皇宋淳熙識年
月當時白雁東南來空王舊宅飛劫灰斯幢未置
藥叉守胡獨不充磨刀材惟物伏現盡如此周鼎
曾聞沉泗水葑須羸厖蛤聲荒二百餘年溷泥滓
幽奇欲出歎白毫夜深光燭檀林高村鄰貽聘元
珠現泗沒爭學洵河洶確然捫著重不舉百夫合
力挽邪許出水峻峻頑石頭相顧胡廬散如雨天

台老宿飛錫臨對此寶幢重球琳再前再被認書
勢證是前朝獅子林既新法席埽綦磷迎幢便作
三門鎮自明隆慶迄今茲屹立禪階山骨峻不見
南朝梵刹如排籤時移幾復留緇縑賢師訥師託
不朽載乘堪補咸涓潛吾儕好古耽奇癖但古無
須論筆畫好濡越紙捐登登藏待他年續金石不
宜齋稿

佛殿左爲貫華居右爲梅隱窩明天啟年間受我建
國朝康熙五十年乘質重修辨利院志
釋乘質梅隱窩傍病梅卑棲僅容膝小砌才一尋

艮山雜誌卷一

夷

主人尙貞素種梅伴孤吟臘尾至春首新香靜愔
愔有時月波浸更受雲片侵華光總自在令我清
塵襟坐得世外友靜窺天地心石鼎煮細火茗椀
隨深斟百憂不能擾三業長可任盛夏日色烈憔悴
嗟自今載蝨蠹葉盡綠枝如荆簪烟雨失顏色
舉眼空庭陰雖枯詎忍斫還冀來歲臨小抽粟粒
芽愛惜等玉金黃楊尙厄閨豈免升與沈藉爾娛
我老興懷寄綠音貫華小集
講堂之南爲香嚴精室陳徵君繼儒題額面臨滌月
池後因室外藝竹易額曰看竹軒辨利院志

羅宗堯題香巖精室春草閒房古客來生隱心鐘

魚歇幽響松竹接清音細雨茶烟濕微風花氣深

頃忘歸路遠吮墨復成吟

蘆江詩存

方竹坪在看竹軒前軒南池北翠葆隔其間座不孤

露水影泠泠最得佳致

辨利院志

釋成蠹摩松院咏方竹抱節更饒方骨榦有筠還

厲玉廉隅儘堪供養瞿曇種養就觚稜作杖扶

四今

陽吟稿

翟灝從辨利院乞方竹用韻譜竹戴凱之表厥類

六十方兄獨見遺顛倒置緩急甯師括竹萌佳種

良山雜誌卷一

堯

始收及謂言澧辰間聚族處卑濕孫枝厲廉隅折

旋禮仍執破觚甘露師平泉費采拾轉嫌圭角峻

要令滑不澀兩師公案在分道比騰螫吾師意和

會兩種備引汲左規而右矩方袍配圓笠相並骨

榦殊相交烟雨裏我來飽與參多身定出入心空

及弟子小園冀大集火速遣人迎開籬我鶴立

無不

宜齋稿

翟瀚同作猗玕昔惡圓文衍句百十怪爾世間人

毀方何太急稜稜勁直姿昔遭規削及胡復淨土

依時霑甘露濕託根長子孫纏緜免俘執繫余守

方鑿每好芳草拾願茲節角奇頓去雙眼澀歸家
掩書臥曲室類熊蟄空堦積敗葉并澗久不汲乃
乞分一枝巡檐伴吟笠此君首似肯梵筴等書裏
我仲擅辨才魔佛皆可入果能得師意良材一朝
集明晨窗櫺開攫攫玉身立

翟以權同作方竹好杖材得一勝他十我同衛公
好是處訪求急草塘摩松林此種羅致及并與眾
林筵鬱鬱翠先濕而獨表方棱如士守迂執家阮
喜弄藻牙慧我亦拾移種當高堦百卉盡羞澀春
暄集鳴鳥冬冷蔭藏蟄穢取芍帚埽洗用并華汲

良山雜誌卷一

平

想見高成林半檐蔽天笠細響行蟹沙澹香勝蘭
裏嗟予方頭生與世不相入頗謂得良伴同志更
招集玩賞開樽匏當筵觥事立

桑阜亭峙院前爲往來行人憇足之地四面桑柘陰
翳故名康熙己亥復新之里人許柱更其額曰慶豐

辯利
院志

袁賡詩空亭銜落照濃綠護招提榭笠圓同覆椽
鞅倦可棲晴空看鶴返深樹有蟬嘯指點前驅路
津梁未必迷

孫金鉉詩道旁亭子古橫檻坐花南看樹迷歸路

聞鐘叩佛庵偶思蓮社約得伴老僧談蠶事村村
急青桑摘滿籃

屠裘鯢詩閑亭初日映高林勞我游蹤託嘯吟蘭
若香厨通井汲桑門銀榜掛檐陰輪蹄且作投開
想歲月徒牽過客心苔繡石闌頻徙倚秋郊幾處
動寒碁

金旃詩桑阜亭邊眺望深地連蘭若結松陰只今
白社頻來往坐愛清涼日半沈

釋岳常詩十畝桑陰外前賢構此亭井華浮蟹眼
松格作龍形鳥毳輕於絮鼃衣綠似萍誰爲主亭

良山雜志卷一

全

叟老衲戶長扁

釋智珏詩夾徑蟬嘶曲脊桑短亭暫憩晚風涼趙
州公案休提起借與茶甌自在嘗

生生泉院門外古井也味頗甘冽經亢旱不竭

金旃詩涓涓石乳滲寒沙鹿鹿銀牀繫綆斜冷煖
自知消息透有緣人喫趙州茶

釋覺宗詩古甃深千尺源頭度遠村龍靈沙眼活
土厚碧泉溫水品誰能續茶經好細論匏尊如不

惜當與滌塵昏

原注師構亭施
茶以飲行者

釋能潛詩疏鑿知何代流長歲月深清能照佛骨

冷可滌塵襟
澗鉢月光碎
浮瓜暑氣沈
院鐘侵曉動
相和轆轤音

釋成葵詩
流派清還遠
淵源淨復深
誰言井中水
卽是道人心

釋智珏詩
深泓澄碧蘚
闌遮日夕牽
瓶泛乳華應
是桐溪通遠脉
一方波及野人家

院後唐園周以枳落中鑿大池貯功德水日滌月池院師夜從定起經行池邊若值月現中天水波如綺滌月之言中含證義

袁廣詩
祇園園畔沼
風細縠紋生
僧定月初上
萍

艮山雜志卷一

全

開水自明凝眸堪喻旨
倚檻獨移情
竹柏交橫處
游魚了不驚

楊奐詩
定起經行地
冰輪印碧池
漫愁雲影蔽
時逐浪痕移
明滅原無相
色空從可思
任渠頻浣滌
光徧大須彌

徐震亨詩
夜色展空明
映徹天與水
臨池話淨因
月在老僧指

釋能潛詩
種竹梳清風
開池滌皓月
藍浪展銀塘
練影生林樾
人吟金波寒
魚聽華鐘歇
獨立空明
中有法向誰說

周台孫臨江仙詞漫說滄浪清與濁且來滌月池
邊好風吹破隔林烟闌干斜倚雲吐桂花妍一
片空明誰得似水晶槃走珠圓夜涼風盡蔚藍天
泠泠清楚不放道人眠以上院志

崇福院在良山門外元係寶壽院祥符元年改賜今
額咸淳臨安志

崇福寺在臨江鄉宋雍熙間建大中祥符間改額大
觀間燬紹興重建元末燬明洪武十六年重建二十
四年立爲叢林歸併于此者曰因果寺曰殊勝寺曰
長壽院萬曆杭州府志

良山雜志卷一

全

在辨利院直北草塘之右自記

吳穎芳重建崇福寺碑記杭州素號佛地伽藍院
寺菴刹之盛甲于他郡鐘鼓之聲相聞金碧相望
名僧碩師代有其人然皆出江湖山野之間其東
則無聞焉城東之古寺有三曰月塘曰殊勝崇福
其一也年月浸久皆敗壞不可收拾基地穢蔓僧
徒奔散名不揚于人爲尋勝者之所不到康熙癸
亥崇福重建至雍正乙巳厥功大成主寺四航和
尚道風嘯咻僧俗一時趨赴恐後近附遠徠罔不
響應士大夫往往從而翱游周覽贊嘆忽若創得

學徒行僧橫擔望東而行如家有歸於是崇福遂
爲名精藍與湖山諸勝剎埒峙東西按縣志崇福
始于後晉天福年中興廢歲月弗可攷最後爲明
永樂時所治迄今三百年矣棟宇不庇佛坐草中
里人吳翁過之惻然心動謀與同志成之會得疾
不起疾革誠其仲子曰吾志欲重建崇福今病如
是已矣爾能就吾願乎仲子曰惟力所能敢不嚴
命是承乃以後三年之冬首捐銀若干視材督工
巨細以躬不懈不苟歷二寒暑成大殿前殿山門
若干楹廊房重屋耳房內宇若甃椽瓦甃堦凡悉

良山雜志卷一

齋

治墻壁悉飭法像悉光朱碧煤聖飛走之采悉新
厨竈圓圍悉潔牀几凭坐爇掛釜鑄箕帚備用之
物悉具旣成而迎四公於福嚴奉爲寺主至之日
城野男女羣集香花塞道梵吹之聲隱振十餘里
登堂說法人人挹光飲聲扶服樹頌皆大歡喜俱
出意望外衆固以知崇福之大有興也居未幾傳
述讚嘆四方傾動時大雄山亦有崇福寺名甚著
人稱小崇福以別之小崇福之名奮起于吳越而
學徒之來者袂接踵及地陔不能容至假宇居習
四公慨然曰茲崇福雖古寺開堂自予始不爲萬

世之業無以報佛祖恩今學徒多借居而遠來之
行僧過者無所專宿法堂禪堂齋堂方丈盡狹隘
不足以發觀瞻迪道德心吾爲始任可辭責乎乃
大會僧俗語之故謀募建造時寺基無餘地附寺
悉諸房僧居有建造必先移諸房功重費大衆咸
驚然素伏師德不敢逆及募書四出衆施流委其
徒某某宣其勞里人吳長公沈居士佐其勸房僧
既徙九宇重建齋堂帶側前起法堂悉爲重屋以
貯徒衆爽亮整淨惟其固不惟其華始雍正某甲
子至某甲子落成於乎非如來之廣大何以新廢

艮山雜志卷一

全

基振法門非四公之道風動人何以誓宏願啟信
心非耆善之至誠亦何以成茲偉功哉二者合而
崇福興豈偶然乎四公諱超源某縣人吳翁諱鈞
其子長諱道深仲諱岐生沈居士諱遇春恐後人
無攷綴緝其事而書之者仲之子顯芳也復系以
頌曰維佛慈悲牖衆生普周四海元教行龍象莊
嚴崇浙杭新標百尺城東鄉瓦礫蔓草今道場旛
幢金朱昭輝光渤海善成施果成大知識來橫海
鯨捧拂宣闡微妙聲法雷一震羣夢驚邪孽苑枯
智性萌百川注壑波瀾清繼功次第構恢宏更千

萬年無地傾踵我道躅堅化城

按咸淳志城東有兩崇福院一云艮山門外一不系某所縣志謂慶春門外難消埠有崇福院卽潛志不係某所之院也蓋一建自雍熙一建自開運縣志並無天福年中之說記所云似誤回龍橋在跨塘橋東自此轉南爲顧家橋路達新塘轉北爲鄭家橋陸路達甘棠村水路達石斗門杭州府志吳錫麒同相圃春漪出城東問黃玉階病卽偕過無不宜齋鄰家橋不遠一棹到幽居徑折蒔桑處凡看焙繭餘故人相問訊司馬病如何強起支吟

艮山雜誌卷一

柒

杖同尋長者廬

菟居小稿

靈潛菴在鄭家橋北數百步順治十五年建

自記

姚元瑛靈潛禪院碑記東南佛國也琳宮梵宇處山水之勝錯城郭之壤而建置者所在皆有然必以叢林爲首稱豈非以規置之美意慮之周能普利于人天佛法賴以振起哉艮山當省會之東北土厚俗淳固選佛場也諸清修淨攝之蘭若武相接矣若建大法鼓吹大法螺闡法王法接引十方爲藏修息游之地者則概未之有仁齋居士姓沈諱智舍世居臨江幼從十信長養菩提比游願菴

和尚之門如龐蘊之參馬祖吸盡西江言下契悟
遍歷諸方機鋒穎徹退老之日常曰武林接眾名
刹遍四境矣而臨江數十里間獨缺如是佛法有
聞于東北陬徒旅之往來無從也于是諸道友咸
爲之謀各捐貲若干賈地若干構禪院曰靈潛以
成仁齋之志前後各五楹左右各三楹中供三世
大雄氏補處普門莊嚴相好伽藍祖師列坐西廡
方丈庖馭等寮繩牀器用諸物靡不備具其旁并
置餘地藝蔬作伊蒲之供以順治乙未正月落成
今垂二十載矣歷援道譽洋溢之尊宿爲院住持

良山雜志卷一

七

歲在甲寅復礮石欲紀其顛末以貽久遠焉余惟
斯院之設眾道友不爲己建而爲仁齋建仁齋不
爲一身住靜之所而爲諸山利益之所意極宏遠
矣然物換時移桑滄代互之後保無有不肖之蠹
蝕豪右之攘奪足爲靈潛慮者乎不知無足慮也
慈氏之旨爲住世法一切惟心所造故心生種種
俱生因思想知覺成國土眾生今世人之處心積
慮不過爲身家子孫私便計耳幻因也孽果也仁
齋一身之心成一寶王刹而昇空王法于無窮道
因也佛果也均此一心所造耳以幻因毀道因三

寶在上必不假之以孽果易佛果不于其身必于其子孫吾知其人愚必不至是矣夫人世有去來而佛法得常住仁齋未竟之設施必有踵仁齋之後而同仁齋之心者矣豈僅僅目前之規模乎一時同力諸道友并爲各列姓氏于左以其誌不朽云石

釋明乾寄跡靈潛暫謝名山侍拂巾浮蹤祇在浙江濱一繩新啟桑間路五里遙辭郭外塵境僻頗供詩料好俗淳多與道情親破鑿穿榻原吾分敢謂幽棲協隱淪二憇道人別錄

良山雜誌卷一

麥莊橋在鄭家園麥莊廟前咸清臨安志

倪宗正麥莊東隴小麥青西隴大麥黃細雨濕柴門鵝鳩鳴野桑天際微風來清波搖麥芒田家午炊熟餅餌生馨香白首歸來後閑情寄麥莊小野先生集

按宋史外戚傳鄭興裔早孤叔父藻分以餘貲興裔因宗族之流寓江南者多未得所請以貲立義莊贍之此麥莊及鄭家園蓋其遺跡園在當日頗大雜藝桑麥果蔬收其利繕莊舍蓋藏以時給贍宗族之餘或亦惠及村里廟祀之設

當卽由茲今里民莫知廟神姓名而以無名王
稱強爲解事者從而傳會之曰無名者吳明之
轉祀號之訛直堪捧腹

翟僕射墓在臨江鄉墳壇厯然隆起仞許周約二畝
餘存古松六七株松下臥片石有刻文曰翟僕射祭
臺旁有小字二行漶漫不辨故老但云宋人莫知名

字杭州府志

吳穎芳晴江聖裁偕尋翟僕射墓詩數畝荒茅埽
天碧指是尙書九原宅當時會葬盛云何人往人
來今莫識見攜好事披棘尋野水荒灣日熏黑石

良山雜志卷一

九

荀己充蕭氏碑游筇但撫周家柏消磨不盡片石
留大刻官名其姓翟我聞僕射唐宋稱家記誰傳
二三策公巽參政南渡來或在行都卜窳窳是耶
非耶難核眞疑以傳疑庶無惑守墳之戶凡幾家
猶恐須臾土三尺狸狐貓貉長子孫差勝東陵逢
老跖君不見長江橫飛鴈翎白白塔冬青兩蕭瑟
西臺人散鐵無聲杜宇年年哭寒食

許峻標同作欲墮未墮白日殘野塘浙浙西風酸
古墳多載穴狐兔老樹僵立荒榛攢此是前朝達
官墓路人指說曾何處短碑蕪泐不書名僕射頭

銜尙如故曲江里人掌故諳山經地志勤稽探與
公同氏復同土博蒐史乘徒再三道旁太息向我
語古來恨事類如許安得起公九原下問公當日

何爲者

茲齋詩稿

圓覺院在艮山門外順治年間台宗禪方法師創建
康熙間法孫宏潤三明重建煥然一新俗呼御方菴

舊浙江通志

御方師塔卽在院後園內

自記

顧豹文御方法師塔銘萬曆中雲栖宏公建大法
幢于東南提唱淨因座下十大弟子弘化諸方再

艮山雜誌卷一

卒

傳爲古德法師益暢宗風御方師古公之嗣也六
歲隨舅氏入雲栖宏公一見識之摩其頂曰是兒
他日必成法器命之名與授皈戒先已親承祖印
矣十歲依舅氏剃落宏公遷化給侍古公左右爲
嘗隨衆能盡學其學自是與首座中明靡役不從
若一車之有二輪焉師器宇冲澹藹如吉人古師
歿後誅茅蓋頭剷削名譽古公之弟新伊公欽其
密行代爲囑累灑灑千百言法苑莫不推服然師
終不以悟自居說法爲人必提念佛法門曰吾雲
栖之裔人也旣而發大慈心結瑜伽壇于虎跑之

右午夜施食風燐雨嘯與梵唄相應和予嘗爲頌
以述之憶先壽承兄卽世延師作利益功德望其
豐頤修髯儀質肅穆微言垂示不落影響自是投
分結契幾四十年康熙丙辰四月善信何爾梅啟
師蒞雲栖主水陸醮事七日而竣時夏日亭午過
予小憇挽之不少留遂出郭返精舍沐浴竟禮佛
辭衆合十而逝夫古之得道以生死爲如幻三昧
謂坐脫立亡尙未夢見祖意在然當世士大夫聰
明負氣節一當出處得失之際顧戀刺促不能一
決生死海中風波淫裔則歿後一著足以勘辨從

良山雜誌卷一

全

前得力處若師者固甚難希有矣雅工詞翰晴日
齋餘好摹古篆隸書特糟粕耳其全體呈露固未
可擬議也師名智帆字御方錢邑朱橋人姓沈氏
世壽七十五僧臘六十于康熙十九年十一月十
八日塔本菴園內其弟子請予爲塔上之文不敢
辭乃系以銘曰師勝衣禮聖幢劍而遊童無雙蔭
講樹泳經江望西日揚宗風闡密行運圓智闢異
道施法味人非人得不二慈雨潤句芒植書晉法
詩唐音寄禪悅舒道心叩斯應酌者樹坐丈室惜
分陰生死途屹重門屈信臂何適然埋空谷相流

泉盡未來師在焉

嚴戒庵在萬盛橋西村始建年月無攷康熙中僧如諸整葺成名藍諸字三如得源于靈峯藕益大師盡通台衡之學兼涉外典精書法諸山仰其聞望每虛席來請以性孤不耐煩雜概謝弗行間惟于鄰庵宣講諸經利益齋者而已晚年貧病獨居湯粥莫具病既篤猶危坐宣佛號不輒口三日寂庵有藕益題白牛十頌圖仇十洲畫小十六羅漢像臨寂以付辨利

院法孫全海

自記

吳穎芳贈嚴戒三如法師講鈔從唐說蓮經祖國

良山雜誌卷一

空

清百年歸宴坐萬里歇經行弟子多人奉諸方半

座迎記投蘭若宿落葉擁蟲聲

臨江鄉人未刻詩

按圓覺院在邵家橋側後沙河水自此過永泰橋轉北至楊嘉橋其萬盛橋則自新塘明月橋支分由豆荳橋以至別爲前沙支流而與永泰正東西相並其去楊嘉橋皆僅二三百步蓋楊嘉橋爲前後二沙河交會處也永泰俗呼沈家橋萬盛俗呼葛家橋

甘棠村在臨江鄉舊編圖籍經界次以周興嗣千文而村直甘棠二字又近里有百年老棠樹遂以名焉

無不宜
齋稿

金志章甘棠村卽景緯蕭門外倚桑梯蠶過三眠
上簇齊十里綠塍陰斷續一聲風外嘯黃鸝
江聲草堂集

楊家橋在永泰橋東北萬盛橋西北地名甘棠村有
明崇禎三年里人翟守信陸大林胡大有等重建石

刻杭州府志

翟灝楊嘉橋讀崇禎三年題名石鴛梁水落魚衣
枯礪磔斑駁排擣蒲尺方片石平似砥刻痕隱見
蠶脚麤我聞掘衣涉水視那計兩脚霑泥塗張脣

艮山雜誌卷一

奎

畫肚誦不出黯淡一面雲烟鋪急呼水洗復苔剔

垢滓落盡分形模休嘉揚挖名所錫俗稱楊家橋刻文作揚嘉

敗壞修妮工爰趨刻記是年重建工成勒石語簡畧粗記

姓字垂昆孥東郊風俗百事陋譜錄十姓九姓無

思陵運逢陽九厄烽烟處處驚萑蒲六親九屬不

暇顧粹棄井里東西逋後來保聚口耳隔父祖名

諱悲模糊鄉中赫奕數舊姓趙周宋陸金王胡摩

挈此石一一在得緣枝葉求根株予家高曾首義

役獨冠羣輩標前臚其間翟氏名列九向未盡見

宗支圖拈豪伸禮恭自錄重此一字逾一珠里中

父老共走看夕陽人影攢菰蘆某賢某孝某才傑
先耆雜事交陳敷或言此橋少迤北更有石刻埋

荒蕪

無不宜
齋稿

翟瀚同作碧流瀉長川一橋氣橫隔偶作濠上游
泛覽得貞石壁立洞門口高約三數尺扱衣越隕
岸締視杳無迹鬢髮石髮肥鬢鬚土花碧挹水自
爬梳依稀呈字畫造次讀一遍蹇礙不成格從頭
細體認渙然始冰釋絜絜皆姓名連行數盈百趙
陸沈金王高胡施宋翟村中幾古姓一一可指索
何以書姓名建橋施錢帛橋建自何時圖經難攷

良山雜誌卷一

齋

覈聿著重修期肇窠字題額今又百二年白駒過
門隙豐碑世多有移取鎮垣宅不然童敲火或者
牛厲駘轉眼幾春秋追討字無隻矧茲混泥沙朝
夕水瀟澹倘非鬼物呵沉湮已在昔對之愛且敬
震蕩肅神魄余族多轉徙維連闕譜籍是中列十
人同里諒同脉更余五代祖褒然名諱赫孰謂片
石微寶重抵珠璧一紙遠鈔藏詩書同手澤採錄
待輶軒千秋表遺蹟

翟澍同作我生足未越田園秦碑周鼓服莫覲里
門求古意殷勤壞礎頽闌各尋究石橋東岍遺片

石急湍頻衝勢傾仆淤泥滅沒菱蒲叢瞻顧時時
勞頸脰偶然攝衣臨水次不憚滂塗足親蹂抓落
別蘇欣見之詳看字跡苦矇瞶呼童掬水手自洗
一一點畫旁搜漱星文磊落列成行結體端莊殊
篆籀首書何事書橋名揚扈休嘉攷不謬乃知近
俗號楊家冠地以姓殊譎陋橋本舊建此重修崇
禎三年誌于後助資姓名次第書間有剝蝕難補
湊屈指數來剛滿百大抵不外鄉耆舊其中翟氏
居十人通我高祖首鐫鏤餘此九人或未詳遠稽
譜錄猶脫漏料昔我族鳩工時聚族不離橋左右

良山雜誌卷一

七

迄今流沿百歲餘東西分散同落宿幸茲殘碣未
銷沉得把芳名傳奕胄對之欣喜復嗟唏急鈔片
紙攜短袖安得更繕一小亭移石亭中示壯幼庶
幾不復混泥沙千秋萬載岡陵壽

無不宜齋灑所居書齋也凡讀書會友理家事課子
孫無不于是梁山舟侍講取宵雅語題爲額

自記

杭世駿寒食日集無不宜齋梅花下用元華棲碧
過翟氏草堂韻平生邱壑愜心期特揀芳辰喚杖
隨臘酒頗宜新雨後探梅已過早春時吟風小鳥
清于笛照水橫枝瘦似詩如此嘉招莫輕負試圖

主客問張爲

桂堂集

吳穎芳無不宜齋咏盆池石筍咫尺方池灑碧泓
傍池一片小峻嶒尖頭虛襲龍孫號強項猶堪石
第稱礙屐有痕苔半破倚牆無影月初維主人未

減寅哥癖移近繩牀對曲肱

臨江鄉人詩

齋之東有軒三楹周列皮閣儲書檢閱餘不暇收拾
橫斜累疊有似乎鵲之巢因自命曰書巢

自記

杭世駿書巢記翟子榜其齋曰書巢規爲圖環堵
之室而卷且盈萬屬余爲記巢之名不在於釋宮
比於燕之壘鷓鴣之房鷓鴣之一枝義無所取取

艮山雜誌卷一

矣

其棲憑焉爾仰而矚巢也俯而窺書也空洞無一
物外戶而不閉義何所取取其貪人之所不爭竊
盜之所不顧焉耳巢則曷以名書示所重也沈遼
雲巢林憲雪巢徐陰海棠巢然且不免乎逐耳目
之好書則居之安樂而玩浸淫焉而益人神智故
重之重其書所以重其巢也書則曷以名巢無翼
而飛不脛而走者書也勞之則聚逸之則散朝斯
夕斯寢斯饋斯若終老之菟裘若栖心之精舍旣
以巢書亦以巢翟子也故曰書巢也翟子無他嗜
亦無他營慥慥乎排纘而編緝之莊莊乎正襟危

坐而雜誦之忘憂忘食勉焉日有孳孳而不知老之將至或曰嘻甚矣乎翟子之愚也翟子耕於東郭之野穫之捭捭積之栗栗發其窖藏可以穀婦子可以徵貴徵賤操奇贏以自饒翟氏世家郭外桑柘繞屋蠶績盈筐抱布而貿響緯雙而紡弄機杼而織可以衣被一屋可以大庇寒士不是之務書積而室不寬書益而財日損雖至愚者不爲而謂翟子甘心而不悔乎或曰翟子處若忘行若遺貌誠類愚徐而察其術壹似夫小癡而大黠者何也翟子所與偕所與遊所與歲時伏臘黨醺而蜡

良山雜志卷一

七

飲者皆鄉之人也使翟子棧齏以架壑澗澌以規陂畜文魚蒔美竹飾犧尊列雁壺絃瑤琴絙寶瑟設百步之幃縣九華之鐙于時鼓鼓于時考考皆鄉之人耳目所未嘗經也視聽眩轉心志迥易不召而赴者且日三四至焉叫者噉者講者踞者號嗽而索飲者跳踉下上獲雜乎斯巢之中翟子力不能禁且將加禮焉而翟子憊矣書則世之人之所不欲觀者也鄉之人以爲獲石田而無所用之也亦旣覲止若鐘鼓之享爰居不驚駭而卻走者希矣翟子從容晏處無應對之煩無絲毫之費坐

享南面百城之樂揖聖賢於千載之上禦流俗於千里之外翟子之書巢成而翟子之計得矣余嘗造焉不知翟子所讀何書也示余詩驚怖其言猶河漢而無極與之言與鄉之人所言頗不類且與城之儒衣而蠶步者所言亦不類則書之所益大也乃知翟子愚於貌而不愚於心愚於生計而工於言也而或人不知或則以爲愚矣又或則以爲狡矣是鄉人之愚且狡者之言也而翟子侗侗乎

遠矣

道古堂文集

吳穎芳書巢銘書也魚食而居巢也卵育之廬贊

良山雜誌卷一

矣

飽終身蟬吾如育及子孫鵲吾如

臨江鄉人文稿

梁同書書巢篇贈晴江先生先生我心儀論交逾

卅載平生無一嗜枕藉書史內晝盡繼之夜燈檠

鎮長對丹黃雜研摩筆末事鋤刈編香動等身伊

嚶欲枯肺前生定衣魚字字百雜碎所居城東鄉

鍵戶謝俗類茅堂開三間以書作襟背左旋而右

抽上睇或旁睇縱之復橫之亂疊棊几礙疑疑兩

孫雛毛羽非凡輩攤書解滿牀有若盤弄晬先生

巢中居暇或示勤誨居然南面擁肯貽金屋穢吾

生眼如月情學淪照海豈無卷五千閣來同捆載

多恐手觸新翻用裝玳瑁少年倏又過炳燭光不

逮對茲巢中人能無生感悔

頻羅庵集

乾隆辛酉灑羈留京師惓惓懷土屬山陰王任湖狀
郊居風景爲圖同里郭准復爲寫圓光戴笠小像聯
裝成帙貺題句者二十有一又轉眼四十餘年諸公
盡作古人矣灑尋從逝保此帙不化烟雲耶悉錄之

著于斯編自記

金虞題晴江戴笠小像撐腸磊落四千載企脚寬
閑五百弓來聽讀書兼讀畫皎如人在月輪中塵
海茫茫夢樂郊橫塘春水半山桃休將笠子尋當

良山雜誌卷一

矣

戴有客乘車下揖勞

鄭江題郊居圖曲江如羅剎靈濤日澎湃夢亭如
高人恒作偃蹇態君居江山間水竹相環帶月榭
挹浮巒風林靜清籟醉耳稱鷗嚶詩腸宜蛤吠柔
桑綠猗那寒梅香醜馥霏雲逐鳥還清暉送鷗邁
灑灑掉塵鞮超超脫天械觴至時澆書朋來或讀
畫吮豪鈔農經披襟悅情話饌設子陵魚園種元
修菜卽事希高尚浮名等織芥余本喬野人林泉
夙所愛展圖神悠然南望發長喟終當躡高蹤我
負期子戴

吳廷華題人是風塵老地是故園好故園不與風
塵期脚下芒鞋殊草草翟生方作少年遊十樣蠻
牋五鳳樓車勞馬瘁致孀媿閉門高卧懷滄洲滄
洲有夢翛然去鄉心一似霑泥絮覺來寫作郊居
圖猶是白雲凝望處白雲不遠葛洪川江流一曲
山一拳良山之趾布新綠梧桐影落東籬邊眼前
風月吟詩路樊川輞口詩人住入山不用買山錢
幾載掉頭不復顧老夫身是西湖隣客途回首成
迷津欲招谷口鄭子真恐君不是蓬蒿人作簡與
君期汗漫杜鵑催去春光半行行直上第一峯擡

良山雜志卷一

百

頭認我青芙蓉

周長發題我愛翟夫子秋林坐晏如江聲翻岸濶
山色入窗虛草護康成宅蒿深仲蔚居高吟長抱
膝風展讀殘書天寒手補屋一徑滿烟蘿沙鳥隨
波澹汀花拂檻多烏皮憑短几白紵聽清歌著作
名山業居然安樂窩

陳兆崙題君在皋亭山下居東湖一水映林於花
枝拂帽客攜酒嵐翠滴衣人讀書布穀聲催行樂
後春鋤影傍落帆初杜陵老爲浮名絆晚遂郊扉
計未踈

齊召南題窗中峯影翠如積窗外江聲飛霹靂
底蕭然坐讀書幽人知是潯陽翟蒼官青士森萬
个梢風嘯烟秋四壁郊居會多得意時看君連蜷
賦雌霓

金牲題吾家水觀樓東望皋亭麓擬辦草堂資綠
坡藝桑竹山中讀書客相逢在京師名韉自纏縛
未有還山期如此好家居真宜畫中看彷彿屋三
間東偏割其半嗟我倦遊人烟霞感深痼何日託
比鄰誦汝郊居賦

戴廷燁題郭外人家山下村桃花水長浸籬根卽

良山雜誌卷一

直

看摩詰新圖就羨爾盧鴻舊業存君家兄弟擬慈
明紙閣聯牀雜誦清只合鄉園作清受曉沾山翠
夜潮聲已拚漁釣老閒身未拂京華蓬勃塵他日
一颿過赤岸綠陰門巷訪詩人

沈廷芳題軒窗過涼雨翠蔭散詩屋懷我古東田
不異王官谷亭臺夙幽暢樹石互回伏時有流泉
鳴清音勝琴筑悠然送日月野情渺拘束胡爲緇
塵中頻歲事馳逐適觀郊居圖快意豁心目誦我
遠祖賦更羨園林福江聲流浩浩日夕萬馬趨巖
壑競蒼秀環繞明聖湖我友翟子超高居勝蓬壺

詩傳四世遠品與西隱俱俛仰無不足嘯歌聊自
娛榻來客人海洵美非良圖好鳥亦求友巖猿豈
愁孤山深長薇蕨水澗多莼鱸幽境堪入畫偕子
歸來乎

姚大呂題東臯君子鄉俗尙頗淳美居民半種織
文采數翟氏翟氏累葉相因依瓜屐綿綿聚於此
前引大江後臯亭枕上潮聲快奔駛危樓一角矗
青山隱約峯鬢見梳洗數椽鄰屋接樊籬熹微日
出炊煙起衣冠樸遯饒古風雞豚馴熟有生理吾
友夙具麋鹿情獨立叉手日凡幾尋詩多在巖壑

良山雜志卷一

一

問陶謝風流差自喜好景况迺紛眼前不費平生
蠟屐子我來每值春夏交鳴鳩初過吳蠶市犢牛
眠處枯棹閒針樣勻出畦十字桑陰無路有僧行
冉冉綠雲墮襟屣幾點踈雨蹙魚鱗一段斜陽明
雁齒短牆低護讀書聲兒童隔水猶能指排闥卽
出蒼頭奴置酒還煩赤脚婢興到未覺狂夫狂如
癢欲搔逞小技鬪句近復招白鷗各吐心花開意
蕊清歡難再迹已陳飄瞥雙九脫手矢君今二載
滯長安南北相望嗟岵岵金猶舍礦錐處囊滿鬢
無端堆塵滓余髮種種鬢鬢鼓瑟吹竽兩何恃

人生遇合信有神乘流則逝坎則止誰歟活筆寫
新圖茲樂時時來夢裏回首依舊隔天涯抱卷彷彿對井里浩然忽動故園思躍馬抽帆從此始君
才澄絕正妙年姓名早溢人口耳只愁捉將官裏
去竹杖芒屨竟已矣

萬光泰題城市多物累野田寡游交植樹映流水
開戶臨長郊秋觀稼穡實春識草木苞松篁旣琴
瑟蒲魚亦哉肴斯圖在原隰斯士非衡茅誰歟下
白屋莫作由與巢余生麋鹿性少日多田居蛙鳴
知蓄水麻菩知荷鋤過談皆農叟呼叫無里胥客
披圖不可至撫卷空躊躇

艮山雜誌卷一

三

行易荏苒晦朔屢布除豈無溪畔屋亦有堂上書
邵雋題皋亭一帶白雲遮髣髴柴桑處士家相訪
不須頻問訊沿流處處認桃花櫺籬錯列粉墻低
一室琴尊自品題最是好山看不厭推窗吟到夕
陽西桑柘成陰遶屋廬山堪樵者水堪漁可能結
箇吟詩侶日檢牛腰讀異書十晦閒閒夢亦安人
生無過買山難如何撇却家園景只當尋常繪事
看

金文潛題我家城中吳山麓山色湖光映茅屋雨

時閉戶晴出遊卅載煙雲饗清福居家隔城絕煩
喧清江繞郭山圍門落花流水自籬落平原彷彿
桃花村年時樂事誰堪互菜圃桑畦足官賦與君
況是不羈人詩酒相從朝復暮一從襍被來京華
矮房敝屋多泥沙三春渡口冷遊屐半山脚下空
鳴蛙鄉思撥觸紛無已十笏描摹富隨喜埜桃含
笑沙柳青短籬曲徑眞如此看君圖畫識君心幽
居忽夢山之岑生絹須攀圖舊雨請君爲我還題
句

陳皋題東郊土閒曠水木相因依菜畦布方罫桑

良山雜志卷一

高

陰濃打圍故人結衡茅兩版迎朝暉隔鄰事臺笠
繞屋勤梭機耳無雜喧到心與世味違叢書坐終
日客過忘言歸花看馬塍勝筍挑桐扣肥逍遙十
畝間此樂誰能希竭來京洛遊緇塵化素衣茫茫
入海中日月雙丸飛家山勞夢寐渴思如調饑可
知豐草閒不換黃金鞮東風門外綠杜宇啼林扉
孫宗溥題我愛東皋路蕭然遠市闌村墟多負郭
戶牖恰當山徑繞春桑曲橋連秋水灣斜陽漁唱
晚細雨犢畊閒有客耽爲圃經時靜掩關落花香
冉冉老蘚翠斑斑隣樹虛檐出江湖夜枕還泉聲

清醉夢竹色冷吟顏古調心偏賞殘編手自刪開
軒同鶴瘦臥石看雲頑好景真如此幽懷孰與攀
披圖神欲往待訪翠微間

毛元存題夙多郊野興未息城市緣矧乃苦行役
碌碌車塵間今朝從儿案短紙開邱園茅茨帶喬
木籬落臨晴川野田錯締繡遙峰露烟鬢畧約小
徑外笞箬輕舟前想子居此中樂事難具言苔磯
觀撥刺深樹聽聞關吟耽涼夜寂眠愛朝日暄如
何久拋擲風塵日暄闐觀圖橫感觸川路長漫漫
有志同未遂重歎還累歎

良山雜志卷一

三

吳穎芳題遙遙江郭外西舍接東邨溪水清同汲
春桑綠到門古風留草野高趣寄琴樽不爽平生
志從君老灌園

周大樞題翟君有宅臨江浸萬个琅玕敷綠蔭蕩
漭文心湧汐潮青紅精氣浮雲漫迥然舒嘯足寬
閒有石可漱流可枕蕭疏籬壁見精神得當豈惟
履屐任三間老屋東西頭兒能勤書婦工紉豐歲
時羸百斛收醇醪常得三年甯卽今蹉跎任京雒
十日梳頭塵細滲輕拋邱壑狎緇衣高名何地堪
沽賃我亦羈愁四載餘入春彌覺思歸甚生平西

笑信人言止渴何殊勸飲鳩裘做空憐十上勞寂
寞無聲類寒噤草木扶蘇憶做廬柴扉曉色河漁
絲臨流無事照須眉林外峯巒頭競闖地偏心遠
俗滄古落落交游絕諛讚有時東臯歸荷鋤跨犢
風前放長吟與君相去百里餘江隔錢塘竿可探
他時叩門不待速莫怪狂呼急索飲

翟濤題東臯地平衍至樂饒禽魚誰繼隱者風或
數燕山居余家儻老屋絲絲五百餘臯亭良其背
浙水縈如裾左右植籬枳春秋足園蔬小時不違
境散罷齋中書爾我或連臂遵武下階除門前富

艮山雜誌卷一

真

幽覽竹樹紛相於干指點未了一碧合成虛瞥眼
幾鷓蟀樹不改密疏爾我各長大腰圍勝當初作
計胡不審相繼拋田廬我遊先五載塵土盈衣袂
侵晨陟岵岵向晚思門閤金盡裘復做悵焉賦歸
欺近書三紙券得買長安驢我歸爾猶戀欲別先
躊躇開囊出所有故園形宛如知爾亦懷土清夢
常郊墟家山可望洛待我青眼舒望洛山在
臯亭山北盼爾
策高足遠突從風車他時老歸隱相偕事耕漁
胡天游調倚沁園春何處郊居山色悠然江聲快
哉憶當年萬馬如雲北至新歌白雁成陣南來潮

水無靈桑田忽變今古皋亭感客懷却依舊春還
風景花柳相催 看君結構茅齋好軒檻江山面
面開更竹樹臨秋烟雲得地琴書暇日風月追陪
殘照吟成白鷗飛破誰記興亡一夢回且須喚溪
南詩老縱酒良佳

金煨調倚如此江山詩人列舍三間屋郊居自饒
佳趣港曲橋橫花疎徑闢不是尋常村戶朝朝暮
暮對紙帳筠簾儘消幽素酒熟茶香有時留客聽
春雨 料量家具何有祇琴牀筆格水經山疏俗
事芟來塵心浣去滋味不求人喻潮回極浦望水

良山雜志卷一

一

立樟亭雪濤爭赴一笑江橫畫船狂欲溯以上俱
墨蹟

灑既作郊居圖復綜輯舊聞爲東皋雜事詩一卷董
浦杭先生首錫以序自
記

杭世駿東皋雜事詩序自宋楊蟠次公倡爲五言
百首以歌詠兩湖之盛繼是以往代有作者友人
趙谷林兄弟相率爲南宋雜事詩多至七百餘篇
然其於城東之勝槩以天水爲限斷或不能無漏
遺焉翟子晴江家良山門外聚國族者幾百年樂
其土風既輯良山小志如千卷客邸多暇復成雜
事詩百二十首里中賢達咸謂足以媲美谷林余

嘗第其工楷則晴江所處較谷林爲難錢塘山水
甲天下都城內外廣衍幾百里坊巷之櫛比花柳
之靚麗朋筵酒座文翰四飛谷林悉得取而彙之
晴江所采南不越白石湯村北不過皋亭臨平荒
塍廢刹流連憑弔其蹤跡無幾論其地則廣狹不
侔其難一矣小山堂圖籍埒於秘省益之以四明
范氏廣陵馬氏之借鈔加之以吳君繡谷亭之飲
助窮蒐博討傾筐倒篋而不惜晴江索居京國所
謂殘圭斷璧者多得之於借瓶閱市之餘論其采
輯則勞逸懸殊其難二矣谷林兄弟清才交擅沈

良山雜誌卷一

頁

吳符厲諸君以比事屬辭爲長技出奇制勝因角
逐而愈工晴江么絃孤韻獨寐寤歌論其興寄則
因創各異其難三矣備此三難然猶其辭爛如鋪
列錦繡其旨鑑如均調玉石或一詩而綴以數事
或一事而繫以諸說比之於谷林若東廣徵之補
亡若呂紫微之續派其用力何專以勤而其才又
何宏以肆也余於家鄉逸事十不省一二晴江不
自滿假猶復以拾遺糾繆之事相責余何如哉厲
君太鴻吳君西林皆余與晴江畏友也試歸而求
之必有以益子矣

道古堂
文集

周天度跋僕先世故城居自大父避地棲水去北
郭半百里而近兒時往來城中則取道皋亭由桐
破而南蓋既樂其山川之清衍且終日遠市喧也
吾友晴江翟氏家良山之壩頃留都下繫懷鄉土
作東皋雜詩百廿篇凡篇中題詠所及半吾昔年
游覽絕勝地雲光鳥語忽忽在目於此而不動旅
人之思非情矣晴江學瞻而文詳近方輯東皋志
未就僕久客思歸期與君作望衡之約期願倘遂
則柴門野艇把卷詠詩豈復以京華塵土爲念耶

十誦
齋集

良山雜誌卷一

頁

金志章題東皋雜詩後山經地志費研求客裏閒
吟當卧游不是清詩消旅况軟紅香土可勝愁平
皋如畫竹籬斜菜圃桑塍近幾家料得春來遊屐
滿暖風吹綻小桃花薄宦辭家二十年乞歸仍少
買山錢微吟掩卷真愁絕歷歷鄉關到眼前雄邊
風景莽蒼茫鞍背圖經載滿箱時輯宣
化志今日對君
還自笑枉拋心力紀他鄉江聲草
堂集

汪沈題東皋雜詩後吾愛詩人翟仲子清詞百首
光熊熊體裁雖異董嗣杲妙句不減張元同水經
山志細搜剔甲部乙籤悉貫通何日皋亭放艇去

雙鬢聽唱月明中
槐塘詩稿

艮山雜志卷一終

艮山雜志卷一

三章

艮山雜誌卷二



里人翟灝輯

志地二

走馬塘在艮山菜市門外地平坦可馳馬故名舊有

花柳號城東新路

咸淳臨安志

自艮山門外二里轉塘頭起東過諸葛廟石陡門祠堂坂姚陡門柯橋街齋僧館遂家亭繭橋喻家街至茶花村止約共十里凡蘇秀各路緊急郵遞暨販馬官商悉自臨平驛路抵赤岸更自赤岸橋楊家橋下橋沙田畝以抵此塘入城俗呼馬路又與慶春門外

艮山雜誌卷二

一

大路對言謂之北塘此塘祇屬艮山門外潛氏兼菜市言者以菜市門外嚴家街進草塘一路亦達此塘故耳潛氏石陡門橋繭橋皆云艮山門外走馬塘的

然無疑

自記

陳芝光詩五柳園前柳綫低新開門外草痕齊若

從新路看花去一片紅隨碧玉蹄

南宋雜事詩

翟灝走馬塘春行路旁花柳更誰栽舊路無人走

馬來茅屋竹籬畱眼處野桃還賸數枝開

無不宜齋稿

城東九里松南宋做城西靈隱天竺路栽植西自諸葛廟至繭橋七里與走馬塘合繭橋東側為應家橋

過橋少南一里爲朱婆橋再一里合于南塘大路合
路處爲樟木廟橋咸淳臨安志云蔡官人塘河通九
里松樟木廟橋在城東九里松大路又諸葛廟石龕
鐫字稱其地爲城東新九里松據所說則諸葛廟爲
栽松所始而東迄於樟木廟橋計其道路恰合九里
之數路口舊有一字門見咸淳臨安志卷首浙江圖

自記

吳穎芳步松塘分韻映竹幾家分寒沙起雁羣村
依數點樹山隔一重雲曲路穿之字枯藤挂篆文
策子衰蹇步吟去送西曛

臨江鄉人未刻詩

艮山雜誌卷二

二

金海步城東九里松城東舊路選遺蹤南宋曾栽
九里松擊鼓喧闐來白雁風雲消散失蒼龍修途
薄蔭餘桑柘遲日閒懷寄笠筇勝蹟漫惟鄉里惜
行春橋亦減陰濃

四餘吟稿

按走馬塘賴存馬路之稱里中耆彥或亦謂是
北塘惟因潛氏艮山菜市語未能指實城東九
里松潛氏志僅以橋道附見今更莫聞其名明
初迄今府縣志各經數修悉惟承襲舊文模糊
了事歲月寢久別無旁文可參攷矣是卷地較
偏僻闕略尤多如石龕蹟及鄭家園蔡官人塘

官園吳知閣園防風廟詔息湖明聖湖等均一方古蹟之最近志並無一語申說湮沒殆盡至其東西方位道路往復益莽莽無所稽今特親歷周訪質之士人驗之往籍以著于篇覽者幸無以瑣屑嗤焉

真武廟當轉塘頭之衝廟前分三大路一東南由曲尺村過鄭家橋楊家橋等處一直東由崇福寺過麥莊夏韓村等處一東北爲諸葛廟爲走馬塘俚俗謂之三條鎗廟舊有碑刻不知何時被移今現臥廟西北半里許吉祥院前路上額篆真武廟碑四大字甚

良山雜志卷二

三

明記文悉漣漫

自記

吳廷華記看優鉢羅花事康熙乙亥外父張石湖先生遊良山中表兄穉登及余侍道出走馬塘過真武院間土人相傳院有優鉢羅花盛開外大父遂率余及穉登入視花在殿左草本高二尺許葉如蕉而尖小花大如盃作金紅色檀心深紫光采焜耀二樹樹各三四花香氣郁烈溢於戶外外大父作詩以紀余及穉登各有和句據岑嘉州集云佛經有優鉢羅花目所未見天寶庚申歲忝領伊西北庭支度副使自公多暇于府庭內栽樹種藥

交河小吏有獻此花者云得之於天山之南又有北戶錄云唐初伽失不國獻泥樓鉢羅花乃中國所無泥樓鉢羅卽優鉢羅梵語無定字也花在人難得如此余竟以無意得之可謂曠遇惜年幼學詩不克曲盡形容于今幾五十年回首舊遊恍如昨日

青芙蓉山房雜存

聞聞菴在真武廟東半里鄭家壩北

自記

釋顯鵬過聞聞庵有簡悵望東西路馳驅柰爾何不驚花影薄只覺鳥聲多苔蘚封行迹神光起綠蘿翻經無定數時聽撫雲和

嘯翁村居以後詩

良山雜志卷二

四

諸葛明王廟在良山門外官園路神乃蜀之南陽人未知何故得為斯地土神攷宋高宗會要杭之廟食隸祠官者十三其四原在汴京畿內曰忠清祚德神應通惠予因思之蓋其自汴南渡建都于杭凡汴京素奉香火悉立廟崇祀或者神之後裔隨駕南渡因亦立祠祀之未可知也

嘉靖仁和县志

道出良山東麓巍然有諸葛武侯廟在焉當三分時武侯相蜀錢唐為吳地安得以上神事之意必諸葛

子瑜訛而為臥龍耳

歲寒堂集

廟廡有石龕一座高廣各五尺餘佛像三身並香爐

燭錠通以一石刊鑿像左刻文四行曰臨安府城東新九里松下菩薩廟焚修香火善友係嘉興府行孝里人募建刊鑿圓通聖像一龕并重建施水一所祈求豐稔國泰民安上達四恩三寶嘉熙元年四月初八日嘉興府行孝善友義庵周覺圓謹題共計八十字辭雖質樸而城東九里松等蹟頗足以資考證六百餘年舊物不可忽置也

自記

按廟額題曰諸葛里人稱說則皆曰下菩薩廟愚素不解其何因觀刻文知其名已傳自宋也文又有施水一所語刊像時蓋兼鑿一井今廟

艮山雜志卷二

五

門外現有石井父老云此龕于明季濬井由井下昇奉於廟下菩薩之稱其卽以原在井下故耶然潛志有張家菩薩二橋在五里塘路口今橋俱存菩薩橋上舊建有廟所奉神亦諸葛明王或當時以兩廟離郭遠近分稱上下亦未可知耳諸葛之爲武侯本無明文宋登科記嘉定十六年進士有諸葛寅錢唐人寶祐元年進士有諸葛鳴鳳仁和人諸葛氏之居杭者宋頗繁顯其建家廟于此而俗傳爲土神無庸多惑

棲禪院吳越王建於艮山門外初名觀音院建炎間

改額棲禪元至正十二年僧時俊作雪洞移額爲棲

禪雪洞院季潭泐公止菴祥公俱有題雪洞詩

成化杭州

府志

棲禪菴在諸葛廟北淺里近鄭家壩一稱棲雲菴康

熙初僧顯鵬駐錫於此鵬字彬遠號嘯翁著有村居

棲禪二詩集

自記

徐介用沙河行韻贈棲禪院主彬公消愁不覆杯
中綠邀懽肯顧筵前曲拂紙濡毫興趣來半生吟
咏噴珠玉蕭然幽刹東城東西湖休憩將母同竹
動偏口風裊裊花開乍覺雨濛濛攜瓢挂衲聊復

良山雜誌卷二

六

爾塵根淨業皆由己靈奇辨惠昔紛紛圖澄羅什
都非是漫從僧臘笑蹉跎少壯行遊浪迹多杖飛
擬築山中寺杯渡須衝海上波騷客詞流滿鄉國
逃禪爲汝翻憐惻甘向空門老異才年貌將衰暮
景仄枯坐清齋其厄貧徐生儒服倍酸辛慣聽曉
鼓發深省茫茫人世總迷津

狷菴遺稿

金涵過嘯翁居近識棲禪處松筠一徑深秋風振

喬木落葉響空林竟以浮屠老誰憐志士心居然

塵俗外感激動悲吟

嘯閣餘稿

王德璘春日棲雲禪院訪彬公不值繞郭水潏潏

桃江村落閒野橋橫竹渡僧院隔花關飛鳥行將

盡孤雲去不還憑高時極目斜日下空山

梅林集

釋顯鵬次韻毛稚黃過棲禪奉答漸覺村聲暮飢

鳥下竹林香臺寒影碧石鼎晚煙深訪古來幽徑

畱春漫苦吟笑看塵劫裏得句自無心

棲禪集

按棲禪院宋志云艮山門外半里元展城後約
已圍入城內矣仁和縣志武林梵志俱云在平
安坊宋時平安坊本屬城內則又與門外半里
不合似舊院已廢今城內外所有乃續興新刹
各移其額者耳王文白訪彬公詩題作棲雲菴

艮山雜誌卷二

七

里中亦間稱之而棲雲不見前志馬氏府志有
棲賢菴云在艮山門外而今無其庵附記之俟
更考

九曲真覺尼院乾道元年建元係隱靜菴慶元四年

移請今額

咸信臨安志

真覺院在艮山門東三里久廢順治戊戌僧於天卽

其舊址創建更名影菴

仁和縣志

諸葛廟東有三里亭乾隆二年新建以距艮山門三
里立名真覺院卽近在亭側宋時本尼院建錢唐門
外九曲城下故冠九曲二字其自錢唐遷艮山門前

志未著年月自記

周之麟九曲真覺院記由艮山而東可三里許有刹名真覺院其來久矣宋乾道時曾名隱靜菴陵谷變遷已爲執壤今順治戊戌秋有臨濟宗於天和上復草創更名影菴中龕佛像黑金所成里人稱爲鍊佛菴欽編梵刹冊則更名止水菴從宋迄今名不一而九曲真覺院者請敕於慶元時故額存其舊詳考故址在仁和太平五圖地當九曲黃龍港南宋時最著御舟曾泛於此前臨大道夾植松楸所謂新九里松是也於天披縮靈鷲受法南

艮山雜志卷二

八

屏兩山皆天下甲幢何患無幽巖邃谷爲片席安禪地而顧卜築荒邨於焉卓錫嘗閱禪史見闍黎機禪師淳熙間載赴隱靜慨然謂古蹟所存而芟之闢之構之片瓦寸椽皆由自具今於天亦如是豈其後身歟於天禪教兩通復徧參諸方南屏豁堂和尚機最合提唱皆爲之後先三十三代之傳久焉欲昇唯性孤邁口訥不耐酬應特辭南屏棲真覺蓬門蔭蔽鏡一龕香一縷鳥啼花落神會自遠如是者十餘年南屏屬意愈切平時不輕泄涅槃之日發鼓集眾手筆累紙使不得辭而於天始

受囑既受復寂處如尋常噫異矣夫法門受囑所謂證名位者也或居名山上建大利設座南面受護法宰官禮因刊語錄及著撰睥睨教乘者宿非所稱博大神明如是哉於天乃必謝聲華遠物色落落真覺院中日與黃面老子相周旋得無有憚其孤峰獨宿類非大來者所爲哉然於天靈爲此而不爲彼有非時師所能窺測者院名真覺五百年前早爲影菴印證也予誌其地并誌其人使後世有可考焉

石刻

黃順之題九曲尼院曾是霓裳第一人曲終認得

艮山雜誌卷二

九

本來身多年不作東風夢閒卻薔薇一架春

前賢小集

按周密武林舊事錢唐門外有九曲城咸淳志

九曲福濟院九曲寶嚴院九曲昭慶橋皆以在

九曲城下得名九曲真覺院亦然周氏撰碑記

未知其由乃云地當黃龍港南宋時御舟曾泛

於此乃無稽之談也三里亭傍雖有跬步小瀆

其水係諸畎畝所匯與沙河蔡塘河俱不相通

潦則盈溢數日不雨卽乾煖烏得有御舟經泛

哉黃龍港名亦從未見舊集蓋閩鄙僧徒造作

以傳會九曲二字而周氏誤聽之耳黃氏題舊

尼院詩與此稍不涉今恐黃龍港說惑人附錄之以備其證

三里亭北爲花園村有一松老幹如鐵約數百年物居民耕村地稍深往往得玲瓏殘石相傳南宋達官園也攷咸淳臨安志麥莊翁塔姚店諸橋俱在鄭家園後麥莊此去稍遠翁塔姚店則距村南北半里許耳又村之西有鄭家壩東里餘盡麥莊處有鄭家橋此數里間想皆宋鄭家故園而今所指稱其一隅也前卷麥莊下愚已據宋史斷鄭爲鄭興裔其園因藝麥莊族里而設不沾沾於花石流連在此一隅或亦

艮山雜志卷二

十

小葺治爲賓朋觴詠所故園名特傳著於此耶宋嘉定閒黃巖戴敏有鄭公家詩詳詩語似此鄭公自記

戴敏鄭公家門牆多古意耕釣作生涯菽米散魚子蓮根拔虎牙弄孫時擲果畱客旋煎茶頗動詩

人興滿園蕎麥花附刻戴石屏集

翟灝訪鄭家園四首走馬塘邊徑花園兜裏村耕墟巉石透禪舍古松存虹展修甃影萍浮小堰垠鄭家呼賸在往蹟略堪論活港支支繞低橋段段通麥莊旋步履姚店引飛蓬數里知寬仄多年任晦蒙東臬吟徧否贈此主人公故景依稀在滿園

蕎麥花琴尊歸寂寞水木減清華風磴遊何氏星
堂宴左家一般名字佚詩好蹟傳誇外族賢聲起
行都寵秩膺未經官第賜曾請義莊興貯麥情剛
準栽花事亦應堅傳吾未敢取缺爾游朋無不宜
齋未刻
稿

吳錫麒無不宜齋談鄭家園事賦呈先生東郭隱
能識鄭公家松色閱千古麥陰明數花何年歸野
鶴幾處有棲鴉莫話咸淳事原陵芳草斜勉居
小稿

因果院晉開運二年錢忠懿王建舊名崇壽大中祥
符元年改今額咸淳臨
安志

良山雜志卷二

七

因果寺在良山門外元末兵燬明洪武初重建尋併
崇福寺萬麻王子僧月明璽重建仁和
縣志

宋有義澄明慧大師於此闡佛因緣請額因果明萬
麻聞桐城吳用先興起宗教清梵志修名剎而因果
得以重新主山僧明璽道力克荷吳公更題其結趺
處曰深靜禪林丙辰七月武林崔嘉爲撰記文刻石
今不全錄右其大略也里人但以僧字稱月居菴今
譌六居菴南抵真覺院半里東抵金獅子街一里自
記
釋顯鵬因果寺偶來因果寺池水出空中寺有大
放生池
日月穿籬曲龍蛇隱梵宮香花猶在樹鳥語不因

風那得閑愁絕長歌滄海東

又過月居菴題藍田叔畫壁此翁之石今絕無隱
公好事藏其圖迴飈倒影鬪寒碧石根墨迹半模糊
浮煙積雪兩奇絕精光往往出林樾崑崙一片
落君家狂呼欲訪蛟龍窟頻頻葉落霜天空細觀
此石真玲瓏亂點蒼苔無不可宛如天際驅神工
縱橫起伏筆力健二十四種無一同楚訥兩師看
不已騷壇畫苑誰相似摩挲顧我但咨嗟安能移
置茅堂裏日送飛雲不可留石屏遠接雙龍湫黛
色蒼蒼元氣裂攀奇何必登浮邱明朝更踏東林

良山雜志卷二

三

道此畫由來世所寶眠雲嘯月幾春秋願持片石

從吾老

棲禪集

楊博羣花朝扶病遊因果寺門掩蒼苔白日幽殘
梅開向破牆頭冷香故故催人醉瘦影離離動客
愁華屋而今生蔓草荒池依舊漾輕條祇因佳節
翻多病半里尋春便當遊

偶留小草

石陡門橋在走馬塘東石陡門前鋪

咸淳臨安志

在麥莊橋北半里自陡門以南爲後沙河以北則蔡

官人塘河也

杭州府志

吳穎芳偕漁公石陡門訪潘煉師不遇歸途聊趁

夕陽遲雲洞招邀世外期未返清溪道士鶴且看
水月老人碑撥醅綠泛鷗邊影黏粟紅留竹外枝
春鳥也知來客好數聲相送出疏籬

臨江鄉人
未刻詩

按沙河水視菜市蔡塘諸河高下不等明初設
會安壩界其北俞家壩界其東宋元時未有二
壩則于今艮山清波漫間橫截一大壩以分沙
河爲二稱其南曰外沙北曰後沙後沙河較低
於外沙河水勢遂不與菜市蔡塘懸殊而古人
治水之法必相其勢以遞殺之慮其壅而潰也
後沙雖低於外沙較之他河尙未能一平如砥

艮山雜志卷二

十三

菜市河由德勝東新二路達上塘運河長流演
漾復得雋堰皋亭閘等分泄下河不愁其勢不
漸平後沙河自壩子分截後別無他隔河身之
廣無過二三丈而傍無分泄之道倘遇上水驟
溢急湍奔赴其能悉容之乎此石陡門與姚陡
門所以設也二陡門舊有壩有閘沈氏縣志水
利傳尙載其目近時修橋見橋下石猶多有閘
板痕前人之智慮周詳斯可仰見蓋凡水之委
欲其有泄源則欲其有蓄視水盈縮以時啟閉
惟閘之爲利溥也後人不察乃以目前水勢不

甚高下廢之以與蔡塘河渾達爲一漏卮直泄無所搏節今後沙河泥高水淺天十數日不雨舟楫輒阻乾隆三十一年曾合衆力疏濬數年後仍沙壅如故蓋其河身本高于蔡塘河不能強之使一也由是觀之閘之廢不可惜歟

百步塘在石陡門東偏 國初有水月老人隱居於此多梅花號曰梅園有放生池有義井皆老人經置康熙初瀋陽范公承謨撫浙視政偶暇屏騶從過訪老人極禮重之爲其放生池前建築石塘百步自爲記刻石於園杭人自聞中丞至競訪焉老人厭之避

艮山雜誌卷二

齒

迹之他不知所終所遺梅園爲僧徒占居俗謂之水

月菴

自記

范忠貞承謨撫浙日杭之西溪有虎攫人遣卒往捕自詣水月老人卜之告以故答云山頭大蟲任打門內大蟲休惹范不悟未幾遷閩督遇逆藩之變竟以身殉始悟門內大蟲之語

池北偶談

水月住杭城北人不知其年形如七十左右人及范撫軍蒞浙太夫人謂曰當日在遼陽有一老人號水月年已八十餘對汝祖曰我家有孫巡撫浙江彼猶及見之今汝撫浙其言雖驗但又隔四十餘年不知

此人果在否撫軍訪造其居談昔年在遼陽事甚悉
撫軍老僕皆識之云其容如昔言禍福亦時有中者

徐季方
聞見錄

杭城艮山門外有老人孫姓年二百餘歲本成化間
餘姚縣人少時在京都被掠至邊外今歸在此自云
屢濱大厄有異人教之誦呪持齋併導引之術自後
能知未來事浙省制閩撫軍以下來者必訪拜之贈
之粟帛不受叩之禍福不應問有問導養引年者但
以靜慈樂儉四字示之都無異旨特性畏見人貴客
往不過迎送禮所在供佛一龕但食淡衣絮蕭然一

艮山雜誌卷二

圭

身慶符堂聞
見厄言

范承謨百步塘記百步塘有屋三楹老人水月所
居也老人姓孫名文號水月一字文石越之會稽
人問其年默不對人有與雖一介不顧食惟脫粟
衣惟苳布聽其言論娓娓不倦然與人少拂意亦
終日無一言且好爲長短歌詞落落自喜舉世莫
知老人老人亦竟不令人知也所遊幾遍天下今
卜居仁和垂四十年余向其爲人而未得一見
自己酉膺 天子寵命來撫兩浙兵民雖已安戢
然天災頻仍憂勞成疾屢疏請休不蒙 俞旨復

力疾視事一日偶暇過水月所居進與之語嘉其
真樸無僞翛然物外吾莫得而名老人矣詢其居
地知一屋一瓦皆由自具得尺得寸悉自價售余
爲之捐俸薪築石塘百步名曰百步塘便行旅也
徒爲水月哉今予復承 簡命督八閩 主眷彌
增冰心益惕因疏請入覲以申臣子依依之慕行
將與老人辭矣爰勒數語以誌不朽康熙壬子嘉
平月瀋陽范承謨撰并書石刻

翟灝題水月老人故居耳邊蒿火發門內 蟲蹲
抗節真無朽知幾亦有神式廬遺石徑題碣護苔

良山雜志卷二

六

茵讒讖吾姑置交游信絕塵蹤迹初無定悠然水
月痕馬牛生任喚釋老死爭援名未隨身隱風堪
敵齒尊祇宜高士傳畱載此邱園無不宜
齋稿

按水月隱士也范忠貞公知之深矣記中敘姓
名行迹頗詳並不言其爲僧而池北偶談稱水
月爲和尚見聞錄稱爲老僧二公但得耳聞不
若范公之親交也右所錄均爲改正先曾祖思
銘先生嘗與老人往還言其冠服不循時制後
老而禿人或以僧呼之老人笑曰我固牛馬任
呼耳此又傳聞所由誤歟范公詣老人問答先

曾祖述其答辭曰耳邊火發時須有主意耳邊
火蓋謂耿逆須有主意謂當不忘君上詞正
義切較偶談所載似尤得其真僧徒既改梅園
爲菴竟肖老人爲僧像奉菴中未幾僧敗其故
業過半爲里人擯去別延道士居之恢復放生
池稍稍整葺愚因訪錄碑記與道士李貞素茶
話李又甚稱老人乃仙者愚忽忽未暇辨論但
口占二詩紀之後杭堇浦吳西林相繼有作今
別列志人卷中

永惠祠在石陡門東半里祀明浙江巡按監察御史

良山雜志卷二

七

龐公尙鵬少保兵部尙書謚端敏胡公世宣以仁和
令樊公良樞何公光儀配志乘闕載祠亦未有碑記
不詳其並祀之由父老相傳皆謂以改折地糧一事
爲胡公所奏請而三公均預有力也胡公首事奏請
里民尤感其惠因亦專稱之曰胡端敏公祠 國朝
雍正十年巡撫程元章奉 敕查先賢祠墓以此彙
題於應修祠中胡氏後人呈請於橫塘別建專祠
而寢自記

翟灝謁永惠祠名德有胡龐賢侯又得雙民功昭
折地廟貌肅臨江祭俎支蒼石靈旗偃翠杠巴謳

春社集底僅闕新腔無不宜齋未刻稿

翟瀚同作渥澤嘘咻徧叢祠報賽隆神靈依故土
享祀配羣公苔碣斑紋繡煙幃篆影籠民瘼今孰

問倚徙夕陽紅文江詩稿

按仁和縣每地一畝徵銀五分六厘三毫徵米
六升八合惟安仁臨江大平廉德等鄉有明嘉
靖間改作折地者凡爲里四十有七每畝只徵
銀九分六厘七毫不復徵米此實一方大計而
陳氏馬氏府志沈氏趙氏縣志均未敘錄其由
惟今乾隆三十七年橫塘胡氏刊端敏祠記云

良山雜志卷二 支

公告休陞辭賜資甚厚力辭曰此民脂膏臣何
敢當賜蒙諭朕知卿清貧而卿不爲子孫計耶
公對以臣不爲子孫計敢爲桑梓計臣居仁和
砂磧旱土不產米粟鄉民遠赴吳江買米完漕
艱苦之至若可邀恩賜以改折勝於臣之子孫
萬萬矣世宗欣然允請敕著浙省牧司查明回
奏由是巡按御史龐公楚飭屬查勘仁邑沿江
砂磧旱土四十二里有奇盡行改折瘠土之飢
恩無旣公及龐公力也是說也灑嘗疑之諸鄉
里雖不產禾粟而桑麻之息儘堪易米杭州米

市頗多何必遠赴吳江砂磧旱土不過數里何至四十餘里之多且以君賜爲民脂膏以桑梓計辭少乞多皆大失對君之體而嘉靖時巡撫浙江者並無龐楚疑田野閒人所傳說未可以深信者矣攷趙氏縣志有云康熙十年大造司詳仁和江坍患里四十七里內二十五里係嘉靖時潮水衝坍應行除去則此四十七里夙謂之江坍患里不謂砂磧旱土也又吳瓚武林紀事云嘉靖二年七月處暑日狂風暴雨天開河等處海水湧溢漂流廬舍數百家八月風潮再

艮山雜志卷二

七

作衝去太平門外沙場廬舍則嘉靖初瀕江數里之爲患尤亟也胡端敏公於嘉靖元年父憂歸里天開河與太平門外漂衝之事乃所目擊時公得馳疏議禮則爲地方據實疏請折地以舒民困又奚待告休陞辭日哉蓋折地實胡公所請而其請以嘉靖二年江患故也龐公名尙鵬廣東南海人嘉靖四十四年任浙江巡按御史時胡公卒已三十五年不應與查勘浙地事明史言尙鵬按浙江民苦徭役爲舉行一條鞭法萬厯時撫福建又推行之浙江福建民皆以

徭輕故德尙鵬徧立祠祀是龐公之祀別因一條鞭法與折地無相涉也樊公良樞萬厯三十年爲仁和令何公光儀無考據進士題名碑錄仁和職官志有吳光義萬厯三十年由辛丑進士任仁和令至三十六年去卽樊公前任也吳何義儀當以音近傳訛二公去胡公請折地時益遠府志言萬厯戊子水災樊公議蠲賑民得全活無算其祀永惠當又因於此吳公記闕有閒在當時要亦別有惠政不必盡關折地之事

良山雜志卷二

三

大佛院在良山門外十里松城鋪宋南渡時有小庵內有井薦起黑氣瀰漫一方不辨彼此須臾收入變爲白光父老奏聞高宗敕造大佛井上以鎮壓之嘉泰三年敕建爲大佛院

嘉靖仁和縣志

院在永惠祠東一里近姚陡門咸淳志寺觀卷中未著而浙江圖內有之松城名今不聞義亦費解城當爲塘字訛蓋卽九里松塘之省也近時院僧成蠹字厂阿湖南衡州人清介苦硬有明教嵩之風佛舍側縛草閣二楹曰四今閣爲梵放吟詠所其詩老健尙骨學者稱之

自記

翟濤松城精舍訪上人初春曾訪松城老飛錫
江干待不回去日無多梅盡落渴塵未慰我重來
妙香幸獲沾經案戒律還期恕酒杯藉卻此心雲
水淡廬山社得附宗雷錢江存稿

釋宗悟大佛院訪阿尊宿遺迹松塘雪霽漬冰
苔竹杖招攜記昨來金色巍峨參佛過寒香漸次
見梅開四今高閣詩還在一昔閒雲屢不回悟卻

此中真義諦茶煙縷縷出林隈江村小草

姚陡門在石陡門橋東嘉靖仁和縣志

新塘橋在姚陡門鋪資福橋在姚陡門屠家村咸淳臨安

良山雜志卷二 三

志

姚陡門橋在白石寺橋北乾隆三十七年重建自陡
門以南為後沙河以北則蔡官人塘河也資福橋今

呼跨塘廟橋杭州府志

按新塘橋即姚陡門橋也塘即走馬塘宋亦號
城東新路新塘猶云新路也跨塘廟去姚陡門
僅數百步舊稱橋曰資福橋廟亦稱資福廟也
廟跨走馬塘上俗因呼之為跨塘廟也今新塘
橋資福廟絕不聞於人耳馬氏府志有新塘橋
在干墩村路上去此已七八里不相涉也

張娜兒橋在走馬塘范家村

咸清臨安志

翟灝城東風土詞乃淘曾是土音操掉舌翻嫌客

戶嬌若道爾橋官話陋行都為載娜兒橋無不宜齋稿

按女兒謂之娜兒城東方語通然今橋名村名

皆不聞惟跨塘廟西北有張家橋或疑卽此橋

也

延壽白石寺在良山門外臨江鄉白石村建隆二年

建咸清臨安志

宋建隆時建於良山白石村故名元至正閒燬洪武

三年重建二十四年立為叢林永樂十二年移建慶

良山雜志卷二

三

春門外

武林梵志

寺舊在慶春門外永樂閒潮壞其址移建良山門謂

自良山遷至慶春者誤仁和縣志

按寺在姚陡門南半里其地屬太平鄉潛志云

臨江鄉白石乃謂其舊址所在為白石浦也浦

屬慶春門外大路所經而按其方位則為良山

門之直東故潛云良山門外吳氏梵志因文誤

認以舊址為新基遂云自良山遷至慶春田氏

游覽志沈氏縣志均先作如是說卻是大謬趙

公糾之良當

仁和有枸橋街市白石廟市沙河沿市新塘市彭家埠市俱在艮山門外所聚食貨亦不亞於沙田夾城

杭州府志

枸橋街與姚陡門聯為一市市稍轉北為街舊產佳

枳藥品以此地為良自街北行為教場坂有文橋武橋嘉靖仁和志文橋武橋近大佛庵謂此其教場疑

南宋禁衛軍教練之所攷行在所錄未見明文

自記

西方庵在艮山門外五里餘雲棲寺僧廣明卓錫於

此飯僧十萬復捨已地以擴充之本師手書其額書

夜持佛號不輟口四方衲子藉為依焉

武林梵志

艮山雜志卷二

三

在枸橋街內俗呼丁家菴與跨塘廟南之極樂院姚

陡門北之淨土菴皆為雲棲下院

自記

釋超遠九日遊西方菴又是登高會尋幽興自饒

黃花開石徑紅葉隱溪橋樵語空山應秋深古木

彫主人多野趣畱我話深宵

柏菴詩草

淨業菴即開化寺在原德鄉宋治平三年蜀僧定公

建其徒思淨乞食飯僧收埋遺骨行感十方遂成叢

席宋末兵燬惟存張浚碑記元元統庚辰德祥禪師

重建明正德火燬萬麻庚申僧無可僅披茅構數椽

後有里人捨地遂擴充殿宇郡紳俞之琰撰碑記今

僧履仁住持

仁和縣志

枸橋街東一里爲雙涼亭又半里爲齋僧館館卽淨業菴俗稱也岌岌待壓僧徒散盡乾隆初城西金鼓洞道士安飄於此稍改葺爲道院額曰願真觀自記

按思淨出世於宋宣和寂於紹興張九成撰其塔銘云初禮開化定公爲師與縣志言合杭之開化以今六合塔院爲著而其興建之始時與人皆與此不同蓋定公所建開化北宋時原在廉德鄉也思淨飯僧三百萬行感十方創大刹於城北曰妙行寺今現開堂接眾縣志謂成叢

良山雜志卷二

五

席於此未必然然其新刹未成食堂萬指要己先聚席於此矣今張浚碑固不可見俞之斐記亦化荒煙寥寥縣志難以核實

淨業菴東一里爲逸家亭舊額書此逸字相傳元末遂西舉居此至今有後裔存焉據田汝成游覽志餘沈儀西湖塵談西舉本女真人其先俱仕金元之世西舉任浙江行省都事因家於杭工文翰有雅趣年八十五卒子宏年十八上書論時政明太祖召見試新柳賦稱旨賜歸卒業尋以鄉貢歷教諭致仕孫端宣德庚戌進士改翰林庶吉士授刑部員外郎正統

十四年扈從北狩死土木之難實杭州文獻之卓卓者而其居於東城前記無文惟槎溪張行中與常與倡和往還槎溪去此地僅六七里略可參證而未爲的確附記張詩一首俟君子定焉自記

張輿贈逢西舉冠製黃楊小巾裁阜葛寬仙衣新鶴擎吟杖小龍竿日短棋消暇風高酒禦寒興來

書數紙釋子已能看聯輝集

地藏尼寺嘉泰二年建咸淳臨安志

地藏院在廉德鄉宋嘉泰間建後燬於兵火明崇禎

十五年僧意海重建仁和縣志

良山雜志卷二 圭

在繭橋新廟之東自沈家壩阮家廟經此爲白石至

繭橋之別路初本尼寺今仍尼居之自記

繭橋在良山門外走馬塘咸淳臨安志

繭橋一作筧橋去城東北十里自新廟迄長佛寺列

肆二里有奇四近物產殷充縣繭藥材麻布尤所擅

名客賈多於此居積致遠杭州府志

繭橋藥品之專著者牛膝千金草生仁和繭橋蛇床

子生繭橋旁地白石皆見潛說友臨安志地黃仁和

繭橋白石種白芷繭橋生皆見吳自牧夢梁錄麥門

冬筧橋所產爲佳見趙士麟省志元參出筧橋者勝

見馬如龍府志鹽消出仁和縣東十里有通透光明者藥中用之爲元明粉見姚寬西溪叢話又唐書地理志杭州貢乾薑木瓜太平寰宇記云杭州出蜜與乾地黃皆歲貢韓保昇本草重注云今黃連與秦皮出杭州者佳李時珍本草綱目云大戟以杭州紫大戟爲最陳善杭州志云枸杞子大麻子旋覆子產仁和最多且及遠沈朝宣仁和縣志明代土貢有紫苑十斤吳茱萸二十斤甜葶藶十八斤續隨子蘿蔔子草決明各五十斤凡是諸品悉產自繭橋左近爲多外若元胡藁本益母草車前半夏香附栝藹薄荷青

良山雜志卷二

三

蒿紫蘇象貝枳實桑皮之屬不在道地列者更數十品垣陰圃隙勤於種溉者落其餘利歲亦不貲卉織之產則惟麻布有名旁郡悉取給於此趙氏縣志謂

蘇布多出笕橋蓋傳誤自記

蘿蔔多產笕橋有紅黃諸種仁和縣志

王蔭伯作景隆八發以誚景隆觀道士謂可發笑者八事耳內云果則蘇州之核蔬則槌橋之筍自注云

槌橋之筍蘿蔔也七修類稿

鄭景會重過笕橋憶向長途覓酒尊橋頭瞥見黯

消魂重來寂寂柴門掩雨過殘陽花滿村劍鳴集

王曾祥過繭橋丁氏別業留飲一徑穿墟落閒園
一寸畝寬入門經墜葉隔竹響飛湍漫興詩無盡延

歡酒不難平生愛荒率適意此杯盤

靜便齋集

翟瀚繭橋藥市何用靈山采村墟藥品稠絳芽和
露摘紅甲帶泥收梅福里相似桐君錄可修無求
身自健橋畔漫優游

文江詩鈔

翟振繭橋採藥翦帽椽鞋野趣饒自攜筠籠問河
橋行逢潑火雨初歇漸識緣江路不遙小圃漫教
分土種短鋤閒許帶香挑茅堂歸去還蕭散鄰火
村春破沈寥

西離存稿

良山雜志卷二

三

釋智蘊臥病篔簹橋髮長欲剃又蹉跎久病身心事
事譌服藥每嫌靈驗少杜門常怪應酬多霜寒午
夜然蘆荻日暖清朝枕薜蘿只麼隨緣銷歲月人
來不必問如何

巢梅集

釋篆玉篔簹橋道中冬瓜稅罷路蕭蕭黃鶴峰青是
篔簹橋最愛此閒無俗韻酒歌時復雜村謠

話墮集

按橋左右並未有篔明成化府志尙稱繭橋自
嘉靖縣志以下並訛爲篔矣郎氏類稿又作樾
橋俱但以音發之不足據也今俚俗以菘菹爲
繭橋人參燭豆爲繭橋瓜子與王蔭伯所云繭

橋筍正同

繭橋北有相婆衙明宣宗時畫士戴進居此故業現存里中人人知之進事見雜籍頗多率稱錢唐戴進蓋仁和舊屬錢唐畫家欵識每習用古郡縣名而人遂謂其實居也沈朝宣云進居城中安國坊姚靖云西湖石佛山有進別業皆誤指其適館授餐所耳進居有竹雪書房在京師嘗自繪圖楊文敏公榮爲之

記自

楊榮爲戴文進題竹雪書房圖戴家舊業家錢唐幽齋剩種青篔簹冰玉□□□□佩珂時動音

良山雜誌卷二

三

鏗鏘一林遙接淇園綠萬个如臨渭川曲涼宵白晝風月清翠影重重覆書屋四時佳致迥不同況茲清絕當嚴冬朔風吹雪滿空下凝梢綴葉相玲瓏素娥冉冉來雲表皓鶴翩翩舞林杪是時掩卷一憑闌高興滿襟應不少恍如玉壺照人窗牙籤玉軸生輝光開徑便宜同蔣詡映書翻覺慕孫康一從寄迹京華地翹首山房想初志陽春桃李任紛紛勁節貞心自無異何人爲君寫此圖故鄉風景渾不殊興來輾轉對坐久一點塵埃窗外無

公集

應家橋在繭橋東成化杭州府志

去繭橋約僅二百步自此東南一里許為朱婆橋又

一里為樟木橋自記

樟木廟橋在城東九里松大路咸淳臨安志

按今所謂北塘至此則與南塘路合北塘之長九里宋時栽植松樹正就此一道也樟木廟今不存所存惟橋而橋已屬南塘路茲以九里松

界別特表之詳見後卷

一自繭橋東北一里為喻家衙又一里為山茶花村宋祥符圖經載杭州歲貢之物惟山茶楊梅甘蔗三

良山雜志卷二 五

種是杭之土性素宜山茶此村所栽或尤繁盛因即傳之為地名歟村有茶花廟廟側數百步為霍家橋成化府志謂霍家橋在繭橋北也嘉靖縣志作郝家石橋橋為郵遞所經里俗猶稱馬路自橋而北為沙田坂坂長約二里本田間小徑近因郵遞繫築成道而馬路之稱不復聞蓋宋時走馬塘至茶花村則止矣自記

杭世駿霍家橋道中安穩籃輿上城東路易尋斷崖低樹亞荒徑伏流侵曙色分茅屋寒煙散竹林南莊招隱處知是閉門深寄集

蔡官人塘河在艮山門外通九里松塘姚陡門何衙

店湯鎮赭山

咸濱臨安志

西南接後沙河東北達赤岸河

嘉靖仁和县志

蔡官人宋里人蔡汝揆也水自泛洋河東分由張家菩薩二廟至打鐵關為河受源之所故統一河被其名東北流過豬坊姚店炙魚全厦馮家俞齋郎諸橋抵橫塘四隅匯為其經流自姚店南邈為石陡門全厦南邈為姚陡門二陡門所在即故九里松路逾陡門則與後沙河會自四隅匯而東達於丁橋則與赤岸河會其於湯鎮赭山今皆受赤岸施何兩河以達

艮山雜誌卷二

三

本河無可通路恐因明以來江患變遷故也

杭州府志

鄭江蔡塘河舟行出郭霑微雨清川盪小舟鳥棲原上樹人倚水邊樓徑草通春畝籬花媚素秋沙

河塘稍北最稱結廬幽

筠谷詩鈔

蔡官人塘在艮山門外

咸濱臨安志

宋太平鄉管里凡四曰華林曰石塘曰永安曰太平石塘即古蔡官人塘也今打鐵關之西南現存塘基

自記

古木娘墓在艮山門外太平鄉華林里蔡塘東里人朝奉大夫通判瑞州蔡汝揆庶母沈氏卒汝揆尚幼

父霖用浮屠法火之汝揆既以父澤入仕每傷無松
楸之地言之輒泣刻木爲形具衣衾棺槨擇地而葬
仍置贍塋田建菴屋命僧守之鄉人呼爲木娘墓

臨安志

此係相傳古墓潛志不著時代省志及神州古史考
列劉宋時舊府志縣志又以汝揆入明代孝友傳中
據其事已見潛志則不爲明人無疑謂在劉宋亦未
有明徵也今因潛志編載附於宋代末焉

太平石塘之東有潭曰鉢孟

咸淳臨安志

鉢孟潭在楊墅之北焦家橋之南潭側有荒地畝許

良山雜志卷二

三

相傳古木蘭菴址木蘭當卽木娘之訛

自記

張元輿鉢孟潭上寄西林蔡公木娘庵潭邊魚梵

靜當年寸草心波月炯孤映石蘿風自颺浪浪雲

不定止水居自知直鉤我何競

定夫遺稿

張家橋在五里塘路口菩薩橋在張家橋側

咸淳臨安志

張家橋今呼爲太平橋菩薩橋上有諸葛廟今呼廟

橋蔡塘河自此二橋受五里塘水爲源

自記

張家橋東北爲打鐵橋有打鐵關

仁和縣志

打鐵關在太平鄉西接東新關置立木柵看守盤驗

早晚啟閉以便農船

北新關志

六小關內東新打鐵觀音三關因在各務之中稅俱報過止收料銀其料不論船之大小按稅起料卯給單簿差役徵收每五日各役將收過銀兩赴內櫃完納呈繳由單牌簿

浙江通志

豬坊橋舊志稱芝坊橋者誤在打鐵橋北明洪武三十年重建

仁和縣志

宋有官園在城東豬坊鳴舍等橋間咸濱臨安志云豬坊橋在城東官園裏金家村鳴舍橋在城東官園裏孫家橋在城東官園北嘉靖仁和志云諸葛明王廟在官園路今橋廟猶存園可按地測也前漢書循

艮山雜誌卷二

三

吏傳有大官園種蔥韭菜茹或覆以廡事杭城東產菜最美見稱宋人此官園定是南宋掌供菜茹之所其豬坊鳴舍當亦被官令畜收豬鴨以備祭祀交聘之採取者

自記

翁泰橋翁塔橋並城東鄭家園後

咸濱臨安志

翁塔在豬坊橋東因果院之西翁泰未聞恐泰塔音轉誤分爲二橋耳鄭家園在今三里亭北其去此橋不半里也近橋民家有古桂一本高可十丈餘密如翠葆花開時香聞里許相傳裁自宋時其或鄭家園

中舊物乎

自記

翟壽翁塔橋看桂小橋流水占居幽桂樹螭蜨老
作虬萬斛香乘清露晚一株高倚碧雲秋影團樂
下客周坐風動搖時花亂投要是鄭公親手植閱

年五百尙延留

錢江存稿

姚店橋在城東鄭家園後

咸淳臨安志

在翁塔橋北橋岸輳成小市河道中漁舟駢集入夜

燈火交映頗成勝矚

自記

黃槐晚過姚店橋橋邊水添三尺強漁舟泊集宛

成鄉空罾挂月人何處入市將漁換酒嘗

植堂詩鈔

徐家橋在豬坊橋北更北爲范家橋宋志徐范二橋

良山雜誌卷二

三

皆與錢下廟橋並載云在城東胡陳阪等處今去阪
稍遠矣蓋數百年人煙漸盛而阪地多變爲村也明
末有施汝進居徐家橋榜所居曰東郊小築與進字
子野別號古狂有古今體詩八十二首雜文九篇傳

世自記

施汝進題東郊小築修原帶流水復嶂枕平皋芳
香馥孤嶼嘉樹蔭彌高春菘支徑軟秋菊引泉遙
荷月青鞋健栽雲紫笠驕點易乘朝露長風激暮
濤叢薄容蝸築居諸趣自饒惟存白雲志仙躅不

寥寥

古狂遺稿

城東太平鄉有范家橋傳是南齊范元琰故蹟元琰
灌園爲業有涉溝盜其筍者因伐木爲橋度之自是
盜者大慚一鄉無復草竊卽此范家橋也村塾紀聞

按范元琰字伯珪南史傳稱錢唐人仁和爲錢
唐析縣似范居此可信然前人已指江濱范村
爲古范氏聚族之所區區小橋恐未足奪其幟
范本錢唐望姓代有顯人列傳在晉宋梁書者
尙有范平范叔孫范述曾等愚因屬疑似閒概
不欲援以增色

范家橋少西爲焦家橋橋北有萬壽禪院明崇禎七
年創建

良山雜誌卷二

三

國朝康熙閒僧通毅駐錫於此毅字宏仁
自號玉峰道人得法于棲水三昧豁公繼其席尋開
堂於皋亭佛日刻有語錄二卷湯吏部右曾作序院
有樟樹大合數圍者十餘株蓋數百年物自記

符曾遊萬壽院修竹成圍養子孫輪囷老翰擁籬
根久無客至參禪味時有僧來破蘚痕荒寺聚將
頑石語夕陽引動亂鴉翻葛藤斬後無他事笑折

荷花禮世尊

春鳥小稿

釋通毅萬壽十詠之三禪房翠竹云幽篁籠月照
窗疏一榻寒光浸碧虛坐愛晚風來殿角鬢髮么

鳳綠毛梳祇園灌木云古木葱龍衛法筵白雲深處不知年靈根自蘊菩提澤盡學生蛟是碧天焦市晴煙云芻尼聲恬曉簷頻野色初開景象新一望晴煙焦市近不聞車馬動喧塵語錄附刻

明保安州知州傅潤墓在焦家橋僉事王琦為銘和

縣志

潤曾孫鉞曰宋南渡時杭人士著皆遷城外汴人扈蹕來者留城中鉞先世居仁和良山門外太平里至

曾祖保安州知州潤始遷褚塘中洲集

按傅公之先自宋建炎時居太平里公仕後始

良山雜志卷二 三

遷入城焦家橋正屬太平里也公之葬其即故

居為丙舍平傅公實里中人物冠冕生平行業

別詳志人卷中

南京刑部郎中項公墓在良山門外永福橋嘉靖仁和縣志

按趙氏浙江通志陳氏杭州府志皆謂項公墓

在城西馬婆嶺下趙氏縣志兩載之而永福橋

作永福寺寺與橋皆近焦家橋訪之士人則皆

未聞此墓嘉靖志不載傅公潤墓豈誤指傅墓

為項墓耶項公字文祥褚塘有揚清祠專祀公

與王公琦高行不下於傅今以疑誤略之

苔廬 國初顧錫九書廬也在焦家橋南方家街自記

釋顯鵬同黃無傲過顧錫九苔廬題藍田叔山水

顧君荷鋤好種花繞門四面多桑麻白日陰森萬

壑靜堂中時見生煙霞細看此幅僅數尺一徑幽

深苔蘚積屋頭倒挂兩禿松叢花雜草真狼籍厓

根翠竹騰雲氣平坡坐對自朝夕此翁筆力頗疏

健素壁波翻樹影碧拄杖行吟東郭途白頭覽畫

真狂夫客至顧君隨挈壺花閒醉飲時歌呼眼中

何必真山水適興旋看堂上圖玉洞丹邱何處無

白石青桑感我徒君不見出池水照雙眼白林風

良山雜志卷二

三

忽動啼晚鳥肅翁村居以後詩

糖餅橋一稱小木橋在太平鄉仁利縣志

吳穎芳木橋楊庵小庵風雪凭闌干蠶豆花多白

眼看鎮日水煙籠靜意大千輪與草蒲團臨江鄉人詩

鴨舍橋與焦家橋各港而東西相並由橋北過靈德

廟轉東為澗梢橋通于墩道中之雙木橋自記

按俗音訛鴨舍為壓殺里人忌之造言曰昔岳

武穆嘗居此因稱岳帥橋也此俗情不足論而

澗梢橋亦以音近火燒為忌改曰虎嘯別指一

橋配之曰龍吟舊地名之變亂難稽未嘗不由

於此等

八字橋在鴨舍橋西永樂二年重建

成化杭州府志

本名安樂後以其旁建小橋成八字形改稱

杭州府志

自姚店橋支北一里爲鴨舍橋又西北半里爲八字

橋橋側有淨覺庵雍正七年三月村民鑿井得石穴
啟其封滿中皆古錢幕悉篆五銖二字大小與今錢
相等輪廓多完好見者爭取散約數十斛未盡藏鄉
之父老曰此必古厭勝具竭當有患勸復掩藏其餘

自記

按日知錄云今世所傳五銖錢概云漢物非也

良山雜志卷二

七

南北朝皆鑄五銖錢隋書高祖以天下錢貨輕
重不等乃更鑄新錢背面肉好皆有周郭文曰
五銖而重如其文每錢一千重四斤二兩今之
五銖大抵隋物四斤二兩千分之每一錢當重
六分六釐茲八字橋所發輕重正與相等或隋
時初築杭城以之鎮壓江湖理所宜有父老之
言殊爲有識自此橋西北陸行于三百步至東

新關

魚橋在姚店橋東一里南流與石陡門相直乾隆
初道士潘素真建乾元觀於橋前並以橋改名曰保

真自記

小馮家橋在炙魚橋東其南有吳家石橋北有全福

橋杭州府志

按橋東里餘別有馮家橋俗因以橋製大小各

呼實則此橋之建在前咸淳志有馮家橋云在

鄭家園後蓋指此橋而其去園已二里餘若彼

橋則更遠矣

錢下廟橋在城東胡陳畷

咸淳臨安志

橋在太平鄉洪武十一年重建

成化杭州府志

錢下廟與全福橋相望舊志或作斜下廟或作翔鶴

良山雜誌卷二

三

廟皆語音訛

杭州府志

廟額書全厦字其神全姓里老云全故鄉之大族廟

即全氏屋宇改建故名太平寰宇記載錢塘郡姓三

全居一焉其說不為無稽然則錢下廟亦語音之訛

也自記

周家橋在錢下廟北旁有姥墩

杭州府志

按橋與姚陡門南北相直東至全厦百餘步即

由支巷北汎半里為此橋自此北三里餘為干

墩村東二里為將軍殿殿北二里為長雲村其

閒浜港四達略約無數為蔡塘河道中最幽折

處

姥墩高約三丈餘平原邇迤中隆隆數畝形家謂皋亭山來脈所呈露也或云姥卽晉裴姥寰宇記所稱阿姥墩乃此自記

按寰宇記載阿姥墩在餘杭縣以葛洪神仙傳有王方平過蔡經家就餘杭老姥市酒之言故謂姥餘杭人也續仙傳乃云姥嫁西湖民家名勝志云仙姥墩在清波門外依此則姥所居特古杭郡通稱之餘杭耳施肩吾詩酒姥溪頭桑裊裊錢塘郭外柳穆穆路逢鄰婦遙相問小小

良山雜志卷二

五

如今學養蠶唐時仁和地統錢塘其郭外惟東北爲蠶桑地又葛澧錢塘賦如臨平山石鼓嘗出如仙姥墩裴姥嘗居以仙姥墩臨平山並列則或以姥墩爲裴姥故蹟固亦有端緒然神奇之蹟多屬子虛仙子所居素無常定蔡經家在括蒼而就餘杭市酒已若恍忽不可詰況更欲屬之錢唐東北郭耶存其說而勿論可也

大馮家橋當枸橘街之北明胡端敏公母馮太夫人乃馮家橋馮瑜女而姜南胡氏家傳稱太夫人出仁和全溪蓋自全厦廟經橋以東當時有全溪稱也橋

南數百步亦有小墩曰水墩自記

· 關鍵半山看桃花歸道宿水墩莊紀事行遊徵前期中路戒止宿村舍面水開垣墉通卉木先有鹿門人汎家此休沐懽懽素心來山穀備不速擇帷桃滿谿俯檻椒連綠接席旣以欣宵分情更促沈夢破高譚巢禽驚出谷明發赤霞平命夫駕蘭糴

送老詩鈔

俞齋郎橋在馮家橋東南二里嘉靖仁和縣志云宋時有太廟齋郎杭州府志

按唐書選舉志有齋郎八百六十二人韓昌黎

艮山雜誌卷二

學

文云齋郎奉宗廟社稷之事士之賤者也齋郎不僅宋時有矣而宋亦嘗設宋史選舉志云紹興初有司請募民入貲補官帝難之參知政事張守曰祖宗時授以齋郎卽今將仕郎也蓋此事非高宗本意故尋復禁革陸游詩有京都新口舞齋郎句

普濟高橋在俞齋郎橋東北支港中由繭橋達橫塘之水道名見成化杭州府志今俗但稱曰高家橋又曰啞巴橋以舟過橋下忌言語也自記

西向庵在橫塘卽無量壽院舊址明洪武初僧止庵

重建萬曆閒僧大澄再葺更命名

仁和縣志

按橫塘南有支港西達將軍殿中閒村落曰秧田頭西向庵在焉其去橫塘市一里許矣無量壽院見咸淳臨安志但云淳熙閒建而不著所在以與徧福妙果並列度之則當近于赤岸與此庵基別也福濟寺有無量壽佛閣庵爲止庵祥公重建祥之居在橫塘輾轉推之似所謂無量壽院實卽無量壽佛閣而閣本在寺中豈止庵移其額于寺西一里耶若是則不當云舊址矣

良山雜志卷二

聖

橫塘市在良山門外東北十二里居民饒庶土物彙聚俗有小金陵之稱明洪武十四年設有橫塘臨平稅課局

杭州府志

橫塘惟在金陵者最著崔顥詩君家何處住妾住在橫塘吳均詩妾家橫塘北花發豔闌干皆是也他若嘉興澎湖有橫塘爲劉長卿詩所稱見至元嘉禾志蘇州盤門有橫塘詞人賀方回所居見中吳紀聞杭之橫塘獨未見前人稱述宋史河渠志云熙甯六年杭州於潛令郊亶上言古人治水之法縱有浦橫有塘七里爲一縱浦十里爲一橫塘杭有橫塘其始於

是時乎自記

釋德祥與姪自京還橫塘故居桑麻田在水村中
千里歸來共阿戎春水野航天上下石橋林木岸
西東階除點火兒童善兄弟開門笑語同二載客
塵如夢事明朝溪上看飛鴻桐嶼集

張昱寄橫塘祥尊師覓船直欲橫塘去船去橫塘
爲訪誰白首正慚元度老碧雲曾與惠休期山林
此日多高士風雨聯牀可論詩入社既能容載酒

陶潛無復更攢眉

張光弼集

陳之遴橫塘尋菊菊候遲霜月林客肅野塘共攜

良山雜志卷二

三

秋興出不覺晝懷長一徑踏幽翠數株霏靜香重
尋恐蕭瑟鄭重把斜陽

素庵詩鈔

張競光橫塘晚渡蹠足橫塘對夕陽差參樓鳥噪
垂楊數聲短笛歸南浦幾度疏鐘出上方向晚那
知流水急臨風但覺浣花香孤燈明滅村墟近莫
惜餘光照路旁

龐壽堂集

虞黃昊橫塘雜詩散髮到村市霏微晚氣奇禽銜
山果去雲入洞門遲隱隱旌旗動茫茫竹樹披空
懷彼美念鳳鳥竟何之水壑殊幽渺河流此地分
蘆中人不見鷗鳥自相羣草蕩流晴雪橫塘帶夕

曠是閒堪避世取次莫論文

西陵十子詩選

汪霖橫塘阻雨急雨忽西下狂飈散墊陰一溪添夕漲萬木發哀吟馬倦迷歸路鴉飛失故林幾年

湖海客偏自放懷深

東山集

吳應本贈橫塘李翁橫塘一曲水雲閒小隱何須更買山霜落獨看黃菊豔渚清常對白鷗閒書從鄴架時開展酒向鄰牆數往還聞道南枝初有信

青鞵不惜踏屣顏

續武林耆舊詩選

張奕光汎舟橫塘回文黃葉村鄉幾遍游細香飄岸稻花秋茫茫水渚連雲白小艇橫塘立鷺鷥

東亭

良山雜誌卷二

三

別集

符曾歸自橫塘浮石環溪水半篙淥鱗鱗動散魚

苗歸來滿地夕陽影知了一聲鳴柳梢

賞雨茅屋稿

王曾祥秋日閑步新塘堰水次遂至橫塘秋思澹無豫起行水木中水木發爽籟遠近交回風因之引興長遂以尋源窮橋痕宛相接林影開復蒙不覺溪脈轉乃與津頭通橫塘名甚古南北多花宮昔遊我未徧今過誰與同迢迢聞經鐘思過淨名

翁靜便齋稿

汪沆題晴江村居圖四首之一我年裁總角讀書

在橫塘居民頗近古村舍鬱相望言念暮春候高
原動晴光睨院啼好鳥沃若弄柔桑柴門當晝掩
雛燕飛低昂此時手一卷白日到羲皇

又過橫塘胡師張書齋題壁卯角讀書處依然舊
草堂琴尊想遺迹花木剩餘香卜築初心負重來

幽趣長還城三宿戀生計羨耕桑

並槐塘詩稿

翟灝赴東山約經橫塘良伴挈齊一葦杭陡門直
下到橫塘桑林接岸蔭無暑荷葉霑波翻有光舊
苑已迷吳知閣短橋竟過俞齋郎雲山隱見一桁
碧想得此中迎鶴昂

無不宜齋未刻稿

良山雜志卷二

四

釋顯鵬橫塘道中望半山作桑柘空蒼壘不聞車
馬聲煙隨孤嶂淨村與暮雲平獨往非無感閒行
亦有情斜陽兼遠眺清興惜浮生

嘯翁村居以後詩

宋吳知閣園在橫塘五良鍾氏世業堂園之西鍾氏
自元前至元二年占居橫塘因能熟悉其園明景泰
時猶存有蓮花池池畔立巨石丈餘曰觀音石鍾願
嘗設與石問答賦詩十章今池與石皆湮沒知閣吳
公亦無從放其名

自記

鍾願問石詩五首并序予家之東有一巨石長丈
屹立於蓮花池東畔世稱爲觀音石乃故宋吳知

閣所建園池亭榭燬於兵燹矣惟此石巍然獨存
至今二百餘年予因戲作問石詩并代石答詩各
五首以俟同志者和焉時景泰乙亥臘月也試問
池邊石移來閱幾年堅難施斧鑿穩自占林泉苔
蘚何侵蝕藤蘿漫繞纏觀音名號在想像不虛傳
試問池邊石經今幾百秋良工能樹立妙手解雕
搜風物依然在人情似舊不自從吳氏後誰復繼
遨遊試問池邊石名園幾度新繁花空滿眼明月
滿閒身寂寞荒村路栖遲野水濱□□□□□□
□□□□人試問池邊石橫塘古迹奇止菴遺翰墨

良山雜志卷二

聖

知閣舊園池想象當時事淒涼卽事詩幾番遭劫
火何爾獨無厄試問池邊石歸然獨爾存風來搖
竹影雨過長苔痕汎汎鳧鷖浴啾啾鳥雀喧詩成
因未穩吟到月黃昏

又代石答五首歷久更朝代從前不計年自來居
勝地老去閱清泉最愛松篁伴何愁草蔓纏佛名
非浪得父老世相傳年深經雨露不解記春秋竹
友相依立詩翁細問搜前朝能好事當代頗知不
風景還如昨誰人續舊遊老我身盤固莓苔印面
新雪融光露頂雲過影隨身疇昔園亭畔於今泚

沼濱此生無輾轉羞見往來人頑鄙何勞問曉巖
未足奇離離禾黍隴菽菽菱荷池世換多新樣時
還起舊思冰霜容不改安敢遽忘危喜君頻枉顧
著意慢溫存黯黯煙薰色斑斑雨溜痕禽魚還自
聚車馬久停喧往事徒惆悵浮雲翳日昏春雨軒集
息耘軒明初處士全斯立隱橫塘里以東田翁自號
以息耘號其所居之軒杭州府志
釋德祥雨中宿息耘軒話舊宿雨春林裏青燈白
髮前老交無幾幾別話有千千坐久清生草聽多
夢入船直須開酒律相醉盡餘年

良山雜志卷二

吳

又訪息耘不遇語聲了了出溪灣只隔桃坡一步
閒自愛黃鸝春後至多愁燕子雨中還坡晴細草
平如翦花曙閒門半不關欲覓行蹤雲滿地人言

采藥在他山桐嶼菴集

又貽息耘隱士二首鬣鬢多花雪交情百煉金青
山樓上坐白鳥樹中吟得路畏相識尋僧說此心
欲將白雲畫歸掃草堂深三五樹蕭蕭幽居稱寂
寥去年存菊本來客問松苗挂夢寒山寺尋踪野
雪橋一枝棲息穩分得與鷓鴣五良詩集
鍾有言慎與從兄有文篋友愛肄習一室旦夕不

相離取蘇長公詩意名其軒曰聽雨並題所著詩曰
聽雨集慎旣卒三子頊頤頥克承先人志行燈窗聚
首夜雨重闌捧聽雨詩讀之儼舊日之聯侍左右也
更書顏其別室曰舊雨軒曰春雨堂皆所以誌永思

云
橫塘鍾氏譜

徐遠題聽雨集後憶昔交游日童年至壯年論詩

逢藥肆談笑會茶筵飄泊西飛葉悠揚東逝川賢

郎捧遺稿一見一淒然

聽雨軒集附刻

項麟題春雨堂卷谷風靄而至靈雨忽已濡有生
各自適色澤添華腴哀哀林居子感愴獨歎歎伊

艮山雜志卷二

七

昔蔭桑梓菽水歡相娛色養有餘力委懷琴與書
傷哉遽孤露集蓼仍茹荼永懷罔極恩涕淚空潛
如蒼天莽悠悠日月遞居諸秉茲追遠心垂老終
不渝豈徒慰冥思足爲來者模小子慕孝德申章
亮非諛因之愧惡薄拊膺重嗟吁

鍾氏譜

按鍾頊詩曰舊雨軒集頤曰春雨堂頤曰友蘭
齋先集爲聯牀詩刻項麒復取祥公桐嶼庵慎
聽雨軒二集合刻之是爲五良詩麒乃慎壻項
儒子也

胡祺號耕樂處士平生樂耕因自號樂耕而築室以

居曰耕樂軒構梁以濟涉者曰理耕橋

橫塘胡氏家譜

理耕橋在橫塘普安橋西明正統時里人胡祺建祺

字文祥端敏公曾孫也

杭州府志

鍾頤題耕樂軒粉壁畫梅康侯華胄居吾鄉無心

軒冕勤農桑翛然自得田園趣流風不減鹿門龐

素懷愛客如孟嘗精軒盡日羅壺觴坐中有客文

獻裔胸襟洒落鐵石腸興來一掃歲寒本貞姿勁

質凌冰霜恍疑蛟龍出潭底乍窺文牖鱗甲張復

訝前村雪中樹移植一枝在高堂含芳未吐足生

意枝枝活動神飛揚毫端佳趣奪造化四時粉壁

良山雜誌卷二

巽

生春光

友蘭齋集

橫溪書舍橫塘胡暹齋所居室也暹齋名昇耕樂處

士姪自記

鍾頤為胡暹齋題橫溪書舍卷集陶句之子白玉

溫由來積德門少小愛文辭高義邁等倫卜此林

泉勝而無車馬喧地僻日夕佳書籤映隙曛古來

賢達士無心恥賤貧顧我蓬室姿情親獨有君平

生感意氣題詩好細論令人發深省萬古重雷陳

舊雨軒集

按橫溪即橫塘河道別稱夏節撰胡璞庵墓志

云處士遷居橫塘里構宅一區左環橫溪右掖
皋亭遠岫姜南撰胡氏家傳亦云璞庵居占皋
亭橫溪之勝皆以橫塘河爲橫溪

胡端敏公祠在橫塘楊家橋東岸許相卿胡公神道
碑已表公爲橫塘里人而自公卒後百八十餘年里
未有祠 國朝雍正十年巡撫程元章奉 敕查各
先賢祠墓以走馬塘永惠祠應修彙 題 恩給帑
銀興修胡氏後人呈請頒帑於公故里擇地鼎建專
祠每春秋遣官致祭自記

胡國信等端敏公祠記雍正十年二月欽奉 上

艮山雜誌卷二

兕

諭凡往聖先賢祠墓應修應建之處著各該督撫
查明 題奏等因檄查我五世祖端敏公歷仕前
明事實以憑 題奏奉此我宗後裔十二世海霖
澄漢暨十三世士傑士鼐等呈爲敬陳祖德籲邀
錫典事竊惟我五世祖諱世甯字永清前明由進
士出身歷任宏治正德嘉靖三朝晉秩太子太保
兵部尙書卒贈少保謚端敏諭葬於錢唐五雲山
麓公在正德中任江西兵備時甯藩宸濠肆橫江
西潛謀不軌公卽疏劾甯王自增衛兵以來威勢
日盛改護衛稱侍衛誘官弁爲家臣數假火災佔

奪民地採辦遠至於外府騷擾徧及於窮鄉箝制有司惟意所欲問刑參吏受成而行禮樂政令漸不出自朝廷臣下懼有隱阨多懷二心地方之事益有可慮者矣臣請戒諭甯王遵依祖制止治其國內官僚凡地方有司不得鈐束乞飭鎮巡以下等官王府有所委任必須奏可方行庶幾小民有再生之望地方無意外之虞宗社有磐石之固九重抒南顧之憂疏奏報可宸濠大怒誣奏公罪徧賂權倖必殺公章上都察院右都御史李士實濠黨也兵部尙書陸完與左都御史石玠指摘疏中

良山雜誌卷二

辛

禮樂政令漸不出自朝廷爲離間親王罪當死幸臺諫程啟元徐文華蕭鳳鳴邢寰等及大學士楊一清皆極言論救得廷杖謫瀋陽越四歲而濠果叛逆黨李士實潘鵬陸完劉養正等皆伏誅詔起公爲湖廣按察途次卽陞四川巡撫公在蜀三載撫定吐蕃西境以甯蜀人感戴立祠報德尋蒙召擢御史中丞訓飭僚屬不畏強禦興利除弊切中時宜不爲毛舉細過以應故事百官咸相謂曰親藩尙被彈劾何況臣僚由是貴戚斂迹京師肅然尋陞大司寇又轉大司馬明世宗以公深悉兵機

勦撫咸當凡軍戎之事獨任公將大用而時宰桂
萼以議大禮得君從中阻撓公卽稱病告休凡六
上疏始蒙俞允陛辭賜賚甚厚公力辭曰此民脂
膏臣有何功敢當重賜乞畱賜勳賢蒙諭朕知卿
清貧而卿不爲子孫計耶公對以臣不爲子孫計
敢爲桑梓計臣居仁和沙磧旱土不產米粟鄉民
遠赴吳江買米完漕艱苦之至若可邀恩賜以改
折勝於臣之子孫萬萬矣世宗欣然允請敕著浙
省牧司查明回奏由是巡浙御史龐公楚飭屬查
勘仁邑沿江沙磧旱土四十二里有奇盡行改折

良山雜志卷二

五

瘠土之沐恩無旣公及龐公力也公卒諭祭葬建
祠於仁和之故里鼎革之際我祖祠宇禍被白蓮
教妖賊所燬僅畱基址猶幸尙存祀產歷年恪守
烝嘗勿替今沐 皇恩查及先賢祠墓海等敢不
凜遵於雍正十年十月叙明事實呈叩督憲程公
元章據情題奏恩蒙我 世宗憲皇帝 敕建專
祠賜給帑銀二百五十兩春秋遣官致祭每祭給
帑銀四兩但祠基寬敞所給不敷所費爰有大支
十二世裔孫宗濤宗洛捐資數兩踴躍子姪亦各
竭力捐助始得告竣其時卽擬勒石於祠緣祀儲

不充中輟歷今年久尙未舉行辦理六人已故其
五惟士彛尙在年逾八旬若非亟爲勒石則後世
何從稽考是忘 皇仁憲德也僉謂宜記諸石以
垂後世云乾隆三十七年孟夏立石

孫驥謁胡端敏公祠浙榜三英傑南都四偉人微
忱鑒天日隻手逆龍鱗簫鼓春秋永祠堂俎豆新
孤忠當日恨懷古淚沾巾

晴川詩鈔

按碑額書重建端敏胡公忠鯁祠記記中諭葬
五雲山麓下亦有勅建專祠於仁和之橫塘錫
祠額曰忠鯁數語祠實鼎建而謂明原有之且

良山雜志卷二

三

嘗賜額意豈以 題請之始但言重修而欲以
掩其迹耶不思以 本朝盛典還之前明爲罪
斯大也今爲節去復又有鼎革際舊祠被燬等
語其謬蓋亦由此姑存俟識者定之所言折地
一事前已於永惠祠下辨論茲不重贅

南園 國初橫塘沈文焱園也文焱字羽經著有南
園集錢唐孫宇台爲之序

自記

孫治南園集序歲甲午余初下帷褚里門人有自
橫塘來者曰沈承爵其尊人則沈先生文焱羽經
也羽經數過予未嘗不談談未嘗不心醉而予亦

數至其家門庭樸藪有古賢之遺風堂有叢桂可
蔭數畝而旁則所謂南園也修竹萬竿諸果駢羅
亦幽居之至勝者矣沈子出其南園詩若干皆澹
宕幽折有韋蘇州柳柳州之致而又多見道之語
每披吟其作若飲醍醐而饗太牢也夫羽經爲諸
生貫穿六經百家之書說豈非儒者然而不可謂
之儒者也茹素習禪已數十年每豎一義緇流歎
爲不及可爲學佛者然而不可謂之學佛者也昔
歐陽子喜梅聖俞之詩樂其爲人而又因石曼卿
以交於僧惟演故序其詩而歎之今予一交沈子

良山雜志卷二

三

兼而有之是何予之大幸也嗟乎予讀南園詩可
以不見儒不見佛矣予讀南園詩亦可以見儒可
以見佛矣

鑑菴集

蕉陰書屋橫塘胡稔占讀書所也稔占字逢年近數
十年來橫塘閒究心詞章者僅逢年一人

自記

王曾祥過胡逢年書齋訪秋無定迹秋在柴門裏
憐君獨住房境與僧廬似墻影出花梢簷風落藤
子孤懷若爲開妙語紛未已雖乏觴絃樂頗饒清

淨理興盡盍歸乎斜陽明遠水

靜便齋稿

釋篆玉題胡逢年蕉陰書屋入野見茅屋蕉陰尙

覆牆那堪愁裏聽最是雨聲涼綠暗橫琴石清分
看月牀結庵如許我得句願書將

話墮集

胡稔占蕉陰書屋自題何處堪銷夏蕉陰書屋宜

夢來誰得鹿客至且行棋轉午天逾綠絕風涼獨

奇暑光應更遠葉葉似龍皮

蕉陰書屋稿

福濟院在廉德鄉之橫塘錢氏時朱可榮捨地建名

資福利濟治平二年改今額理宗皇帝御書無量壽

佛之閣

咸淳臨安志

元至正間燬明洪武初重建二十四年立為叢林

嘉靖

仁和縣志

良山雜志卷二

書

洪瞻祖福濟寺重建無量壽佛閣彌勒天王殿記

略福濟寺在廉德鄉之橫塘初名利濟院初自石

晉盛於趙宋蓋東鄉一巨刹云寺有無量壽佛閣

為理宗皇帝御書宸翰佛光輝映累葉厥後以兵

火燬國初止庵禪師錫遊兩京大被寵遇歸纂堂

宇重新道場赤髭白足之侶咸誓皈依聚落甚盛

獨佛閣遺址尚沈荆莽中歷數傳未有復者比邱

廣真鑑恭稟教義口然矢念捐貲勸募揆日庀材

鳩工建閣既落成遂以餘財構彌勒天王殿數楹

欲其降伏四魔常為梵帝家金湯也始於萬曆乙

卯四月八日竣於十月二十五日舊觀悉還新規
增拓因伐石以記其役石刻

釋德祥橫塘寺杪羅園裏好僧坊兵火年來事可
傷白髮老人知舊迹繞塘樓子十三房桐嶼集

翟灝橫塘寺十三樓子水村中禪老能持郢調工
得句屢呈無量佛同聲來應可閑翁鐘魚幾度興
衰迹瓶拂誰追大雅風日暮蒼涼苔砌畔碧雲冉
冉望遙空無不宜齋未刻詩

按寺當橫塘孔道俗但呼橫塘寺據祥公詩在
明初已然也寺前有橋成化杭州府志載名安

良山雜誌卷二

畫

樂俗亦呼橫塘橋又或以寺名名之曰福濟橋
橫塘塔似元以前福濟未燬時之僧塔今不知所在
自記

釋德祥次韻福無受過橫塘塔短籬依舊逐溪開
小竹從新繞塔栽燕子歸來春已去藤花落盡水

滌迴桐嶼集

防風氏廟在廉德鄉朱奧村父老相傳鄉民祈求田
蠶之所不知何代所立咸淳臨安志

吳越間有防風廟土木作其形龍首牛耳連眉一目
祭其神奏防風古樂截竹長三尺吹之如隳三人披

髮而舞述異記

今廟在橫塘寺橋西祝號稱防風大王與尋常土穀祠了無所異朱奧村名不聞自記

釋永祖防風王廟萬國方尊禹防風殞殿趨應憐

舞干戚獨不礙唐虞祭俎侵田鼠靈旛觸井烏椒

漿春奠罷簫鼓舞村巫雲泉集

張綱孫防風氏 防風後至者何意廟崔嵬古殿

蒼松嘯頽塘黃鳥哀骨傳吳子使魂泣夏王臺此

夕瞻遺像楓林日暮催西陵十子詩選

按郡國志云防風氏居金鷲山山屬今餘杭縣

艮山雜志卷二 姜

故至今杭地有其遺祀潛說友不知此廟由立

而任昉已詳言之蓋自齊梁舊俗沿及于今廟

之古無踰此矣頤公詩簫鼓舞村巫則防風古

樂之習在宋時早已更變

華林禪院貝葉庵俱在橫塘北舊杭州府志

釋成蠹過橫塘貝葉小院橫塘北悠然隔水偏塵

氛鐘磬外花雨鉢餅前霜老禾先納梅欹籬自編

此問堪息影何用別安禪四今閣橋

四隅滙在橫塘北以四流會合于此為名南流自俞

齋郎橋過福濟楊家普安里仁等橋抵于滙西流自

干墩村過三橋長雲村查工橋抵干滙東南流自義
橋過霍家邱家丁公三橋抵干滙東北流自九曲觀
音橋過丁橋抵干滙其南流西流屬蔡塘河東南東
北二流屬赤岸河青烏家謂之四水上堂云當出大
貴人明成化初篤生胡端敏公其言乃驗自記

王曾祥坐四隅滙石上作一水滙四隅灣環護磐
石我來石上坐落葉敷茵席遙山間修林隱見一
寸碧鷗鳥意相狎去來矜野格晴空度蕭雲清淺
見銀礫炊煙遠岸斷人語叢蘆隔吟望入蒼茫領
略足幽寂暫畱息塵機長往羨漁伯靜極生孤愁

長山雜志卷二

七

振衣隨所適

靜便齋稿

胡璞庵處士迪墓在四隅滙東迪端敏公世甯五世
祖也明洪武初遷至橫塘起家永樂十五年卒初葬
黃鶴山同邑夏節撰墓志銘既而遷耐于其考妣墓
所是爲四隅滙嘉靖三年孫世甯謀諸兄弟子姪共
置墓田十畝奇以永祀事自撰墓田記立碑墓前里
俗稱碑牌墳以有此碑故也歲久摧仆今子姓重刊
其記樹置祠內自記

夏節故安定處士胡公墓誌銘予客金臺寓舍同
里胡政披衰麻造門請曰政素與先生同里閭相

知爲深今吾父不幸卽世願求先生銘以誌其墓
死者當有德色于地下矣予不得辭按處士係出
安定先生後其父諱惟字用和世籍錢塘太平里
隱德弗耀娶宋氏生處士諱迪字彥吉質樸淳謹
不尙浮靡早涉獵書史精隸首九章學意泊如也
人樂與之交焉兄眞童觀童相繼早逝與弟彥德
事父母盡孝父卒相與竭力營葬事母備至迨卒
哀毀踰禮人益重之屬元季兵燹徙居城東橫塘
里構屋一區左環橫溪右掖皋亭遠岫後圃植竹
干挺有田百餘畝畦畛相連每春夏時負杖闢耕

良山雜志卷二

妻

優游自得以樂太平嘗喟然曰吾忝安定後今老
安田里豈非命耶因取爲號娶沈氏諱妙善亦知
書不憚勞苦訓子女以助內政積厚業爲鄉里最
後其弟彥德以才譖推擇爲郡掌故吏被譴謫景
州旣撫其子女且歲餘衣食之費使不匱乏人嘉
其友愛之篤永樂七年有司選閩右以實北京處
士名在選列而政力請代行卽命二弟侍甘旨遂
挈所親往家焉永樂丁酉十一月三十日處士以
疾卒於家壽六十五政聞訃將奔喪以終襄事明
年戊戌四月二十有四日卒於安定關居其弟祺

載其柩以歸卜以永樂十六年十二月初九日與處士同葬黃鶴山之原處士生三子政其長也次祺次禎孫男八曰晏昇暹騫曰斌敏敬敬於戲人之生世果不可必也方處士無恙時用安定爲號以自慶將與其子若孫盤桓鄉里以享太平而人莫能奪其樂安知其後嗣著藉安定關至處士歿始符其讖云銘曰善厥初德弗孤子孫相承賢且都黃鶴之原營爾墓安定之號皎若符百世以祀肇此圖刻石紀銘垂後謨

武林書舊集

胡世甯胡氏起家之祖墓田記民生一也其先有

艮山雜誌卷二

五

家則繼述易而恢復也亦易其先無家則興創難而奮拔也尤難夫有家匪善而敗絕者多矣其善者亦不能久而無廢雖其易世子孫勢同貧下然有能自力多克復樹家業或更顯揚於時者由其習聞風教才志有所啟發而又有積善餘慶以爲之根柢也無家者子孫世習庸下目不知書甚或棄爲傭奴失其祖姓流爲勾竊轉徙餓孳者矣雖有才智特出其間必先多歷艱辛而後或乘時依附有所成立其能驟力詩書以致通顯者蓋亦鮮矣然則人生起家之祖其烏可忘也哉昔賢程子

以冬至祭始祖立春祭先祖子朱子後嫌其僭而不敢行乃謂始基之祖只存墓祭而無害故其著於家禮謂始祖親盡則藏其主於墓所而大宗主其墓田歲率宗人一祭百世不改此其以義起禮蓋凡子孫報本追遠之誠士君子睦族敬宗之義可槩盡而無嫌於僭矣惟我高祖璞庵經元末亂離當我國初乾坤再造之時始居仁和橫塘立業爲起家之祖今我子孫百五十年日就蕃衍雖其閒人品家道不一而皆無流落下賤以不齒於鄉里者皆我高祖暨妣沈氏之德也然考璞庵生元

良山雜志卷二

李

未癸巳正天下大亂人類幾絕之時至洪武改元年未弱冠則其自幼保育成全以不絕胡氏致有今日者又其考安定暨妣宋氏之德也今安定之祠親盡已祧璞庵之祀亦難再世子孫義有不忍而其墓在河東者昔年宗子家微墳木盡爲家奴所盜墳堂閒爲野獸所穴居遠子孫略不一視甚者貧富相嫌不相往來識認一如路人世甯早歲竊嘗痛恨乃不恥貧陋遍謁同族而拜其父兄友其子弟幸蒙不棄遂相往來繼蒙德蔭叨入仕途因事閒歲一往祭告又幸祖居宗子兄弟復興爲

之補植樹木驅獸塞穴修葺完茂良足爲慰然計
吾兄弟年旣耆艾世甯又不幸久嬰弱疾恐後子
孫興替炎涼不一而祖德之忘祖塋之廢親族之
疏又昔如也乃告諸兄弟子姪各量家道助金共
一鎰有半爲置墓田十畝有奇付宗子掌之每歲
收其租入於冬至前後約日會諸同族祭於墓所
祭畢徹饌旅酬會飲聚談一日以敘同族之情而
相告若曰吾儕今日得齒於鄉者皆我二祖之德
今雖各立門戶苦樂賢愚不一其初蓋皆一人之
身也今而後婚姻死喪必相慶弔貧窮患難量力

良山雜誌卷二

空

所及必相救恤其有爲不義玷族者必相戒勸其
有如前凌偪父母輕棄祖墓或兄弟叔姪相侵害
者則共質於官而懲治之其有一人不從公議者
非吾祖子孫也敘畢而散歲以爲常其祭前期三
日宗子不行遍約及已知約而不來會者各罰有
差有故不得已者宗子許移日餘告則免僉謂世
甯宜記諸石以圖永久世甯百拜謹按吾先祖安
定諱惟字用和世籍錢唐太平里祖妣宋氏子男
二璞庵其長有季曰德以事謫景州安陵後歸卒
於家子孫復家於彼璞庵諱廸字彥吉性質朴淳

謹早涉書史精算學其起家有道治家有禮事父母盡孝居喪哀毀逾禮弟謫遠方歲時供送不匱且撫愛其子女尤篤嘗以閭右選實京師得其長子代行祖妣沈氏亦知書勤內助嚴訓子女高祖起業初因其家子男三諱政諱祺諱禎孫男八諱晏諱昇諱暹諱曷諱斌諱敏諱敬諱敬曾孫二十諱璉諱瓚諱璵諱璥諱璦諱璪諱璣諱璘諱璠諱璡諱璢諱璣諱璤諱璥諱璦諱璪諱璣諱璘諱璠諱璡諱璢其存者曰珏立孫曰鑒曰世昌曰世南曰譽曰鎮曰鉞曰鉉曰昂曰釗曰世隆曰綱曰世康曰昭曰濬曰

良山雜誌卷二

空

昊曰世甯曰世忠曰濟曰旻曰世賢曰世臣曰銓曰暉曰曠曰世良曰鑾曰鈞曰昂曰旦曰晟總三十人來孫而下多弗能紀政祺暹曷璵皆恭孝有德昇璵璦皆通達好文自政及晏及璉及瓚以及於濬世爲宗子守墓祺年九十有一以壽冠帶曷及璿皆贈通議大夫吏部右侍郎則吾曾祖祖父也濬及弟濟皆孤貧自立世甯幼極艱苦長由進士釋褐十二轉階中遭舉謫今爲吏部右侍郎世臣司訓廣東程鄉縣學墓地三畝有奇初棄一畝二分今復之其首穴則璵庵初葬其考妣於此或

言其一柩者傳或誤也其次穴乃璞庵沈氏初葬黃鶴山而遷祔者也餘穴附葬者別列碑陰墓田坐落四至亦列碑陰其田暫附世甯戶下而賦役責辦於得業者二家子孫俱不得以私有而典鬻諸人田租歲收十石二斗除辦祭公稅外餘積以備修墳或宗族甚貧者婚喪患難之助以後人多費廣量增置田或添造饗堂祭器等項則深有望於後人云嘉靖三年歲次甲申冬十月來孫世甯百拜謹記

石刻

按廸號璞庵安定則其父名惟者所自號也夏

良山雜志卷二

奎

氏撰廸墓志而額書故安定處士志末復以安定字發論使無端敏自記人將孰知其傳聞誤耶端敏記爲置墓田立規訓作今重刊改目曰墓祠記意蓋以新立祠記有明建專祠語而強傳之耳茲爲校正讀公記者是祠是田當悉能審辨

四隅匯而北里餘有西湖廟所祀神爲水仙王蘇長公詩一杯當屬水仙王施氏注引圖經云水仙王廟在錢唐門外二里而此地亦祀水仙王且榜之曰西湖廟不可詳也咸清臨安志云仁和縣東北亦有明

聖湖豈以湖與西湖同號而遂設其祀歟自記

西湖廟西半里為長雲村地最幽寂居者種蒔為業

無一商賈雜其閒村北為東草蕩蕩之東為長河塍

泄蕩之餘流北達於上塘歸錦橋自記

草蕩屬廉德鄉七圖係橫塘之西北南距西湖廟一

里有奇西達干墩村東帶長河塍其北則東蕩近歸

錦橋西蕩近金家堰西蕩縱橫各二里許周回可八

九里中分處隔一寬港其腹皆窄港縈回漁舟農艇

窈窕四達巨舫則不能任也東有五橋西有四橋人

煙各六七十戶星散洲渚港上皆圍埂為藕蕩埂植

良山雜志卷二 畜

桃李花開時彌望如繡自記

張遂辰草蕩道中瘡痍方滿眼落日況孤征野屋

茅成路湖田潦廢耕有懷嗟聖代無補愧儒生願

寫流民奏三都未重輕衰晚編

按張詩作在鼎革之際故其辭如此

去邑十里有詔息湖故老相傳昔秦始皇巡狩經途

暫憩因有詔息之名太平御覽引劉道真錢唐記

浙江北台詔息湖湖本名乍湖因秦始皇帝巡狩所

憩故有詔息之名也水經注

御息湖在仁和縣東北十八里周回五里祥符圖經

仁和縣東北十八里亦有明聖湖

咸清臨安志

湖則御息明聖陽陂臨平

葛澧錢房賦

按錢唐記謂湖去邑十里乃是晉邑與今邑治不侔難以憑索宋既分置仁和縣而兩湖並屬仁和東北十八里方位道里均了然可憑按地追討不更患儻莽矣自仁和治東北行十八里正今所謂草蕩在焉古湖本二而其道里相同草蕩亦有二而東西相屬圖經稱御息之廣周四五里明聖未有明文草蕩合東西二所周共八九里數亦約略相符草蕩之卽古詔息明聖

良山雜志卷二

奎

二湖不嫌於武斷也至其孰爲詔息孰爲明聖則不可知矣史記秦本紀始皇三十七年至錢唐臨浙江水波惡乃西北二十里從狹中渡陸羽武林山記稱今西湖大佛石爲秦皇纜船石謂西湖舊通江海故有纜船之事茲詔息湖正與波惡纜船事脗合蓋西湖通江海故道不在於南在於東北今自赭山約十餘里爲臨平湖又十餘里爲槎瀆又十餘里爲詔息湖又十餘里爲汎洋湖又十餘里爲纜船石以上五處在今猶爲大澤在古則聯貫成一其水波之洶湧

可想也水經注云浙江東經靈隱山下又東合
詔息湖又東合臨平湖可以證愚言之非誕

干墩村與西草蕩左右相並其南道由周家橋銅錢
橋新塘橋三橋姚泐橋以達村有大石高六七丈橫
廣畝許卽所稱干墩村也相傳舊未嘗有之自明季
忽自地出初僅二三尺今漸增長如許里民詫其神
異就墩上建廟宇祀石號之曰干石侯此地與皋亭
山相距甚近山趾石含餘氣漸長要是常理今墩南
豐禾橋水口現猶列活石無數無足怪也村人多種
桃李爲業花時游船鱗次士女駢羅較皋亭山塘爲

良山雜志卷二

五

盛 國初陳秀才芳生居此所著有干墩讀書記自記

去東郭二十里餘曰干墩村有豐禾橋明天啟中或
見橋畔地勢搖動童然塊石出地尺許有頭陀過之
曰此謂陰氣不襲陽氣不藏天地否塞五行亂行故
木生壞枝地長桀石禍亂之徵不足取也七年而羣

盜起

耕玉堂
雜記

張遂辰看花皋亭村落皋亭山下綠溪斜纒上香

船又酒家二月韶光誰不惜雨中村巷看桃花蓬宅

編

王嗣槐皋亭竹枝詞女兒家住半山頭日對門前

溪水流忽見桃花溪口落無心更上半山樓

桂山詩鈔

周京甘墩村看桃花用杜少陵江畔獨尋花七絕句韻湖上桃花開已亂溪上桃花發更狂句引春光太無賴籬邊直欲坐人牀樹樹桃花壓水濱千枝萬朵不勝春可憐雨後東風歇碧水青山紅向人一灣一簇倚人家不是桃花卽李花料得城中四五月滿筐桃李是生涯小雨濛濛花似煙深紅淺白要人憐野外春風倍惆悵問誰折得舞當筵李王塘北皋亭東已愁春雨愁春風明朝花落漫無主一任亂溪流水紅甘墩屋舍盡花溪水邊竹

良山雜志卷二

七

裏茅檐低桃源人家在何處村雞一聲當午啼花深溪迷村路杳水昏煙暝舟人催老翁歸去日日

醉桃花到處年年開

無悔齋集

厲鶚同作逞晴預作看花約無奈一宵風雨狂司家橋頭進船路三尺水滿上漁牀天桃穠李上河濱霏霏濛濛溼好春雨師若借霜威避東道應知是主人村迴港曲見漁家帶雨飄來幾片花盪槳應知有春色打篷幸不在天涯半山山半出雲煙無處花多不可憐七娘子廟何人到折取繁枝供几筵不辨花源西復東年年花事雨兼風鴨頭依

舊十分綠人面可如前度紅柴門臨水自成蹊吹
溼青青酒旆低柔眼含時蠶未浴花枝重處有鳩
啼莫愁衝雨回船早明朝看卽落紅催老夫一春
好懷抱不向花開何處開

樊榭山房續集

梁啟心同作年年二月爲春忙一笑今年老更狂
共約看花兼聽雨庫篷船作對眠牀紅影參差傍
水濱花源九曲好藏春鬢絲吹作風前雪怕問當
時洞口人尋春日日愛浮家風雨由來解妬花溼
盡青衫君莫笑明朝鶯燕各天涯嫩白輕紅鬪煖
煙自開自落有誰憐算來落處隨流水勝似開時

良山雜志卷二

矣

傍舞筵路出沙河東復東豆花雨逐菜花風到頭
一片桃花水潑得皋亭山影紅花開斷岸總成蹊
無數游船繞樹低最愛洗多紅不淺枝頭血認子
規啼清明未到爭先放風雨依然抵死催寄語小

桃須解事明年珍重莫輕開

南香草堂集

張湄同作聽徹五更檐際雨雨聲猛絕興逾狂白
頭愛結看花伴侵曉先辭夢虀牀一篙水長東湖
濱鴉軋鴈枝攜好春未到桃花最深處小紅籬落
早窺人著色橫圖做李家青山如睡墮繁花尋花
雨底渾忘雨返照遙烘水一涯瀾漫錦浪細疏煙

白白朱朱俱可憐
添卻嬌鶯林外語
恍依紅雪坐歌筵
水挾飛英盡向東
未妨醉面受斜風
舉亭一帶春蕪路
都作秋原野
燒紅無言芳樹下
成蹊竟日游
篷六扇低誰共
劉郎憶前度
亂蛙愁傍菜花啼
昏黑城闌首重回
玉壺酒盡暮笳催
帽簷不插一枝去
須籍餘花空復開

巽恥集

施安同作今年嬉春興
轉劇日日預愁風
雨狂扁舟出郭僅五里
已有飛花逐鵬牀
連畦芳草傍河濱
禮李天桃競一春
乍雨乍晴天氣好
白頭拚作乞花人
鮑婆橋外野人家
高下荒塍盡種花
擬向園

艮山雜志卷二

突

官乞方法明年抱甕作
生涯青篷載雨一溪煙
荒塚啼鶉春可憐
記得章郎三月句
桃花飄俎柳垂筵
枝港鸞環西復東
曉寒一陣酒旗風
尊前漫唱吳娘曲
樂府新翻休洗紅
小柴門外桃李溪
春流三尺野橋低
回船更穿修竹去
勸酒不待幽禽啼
屈指東風上巳來
黃雞唱曉苦相催
主人有酒且盡醉
值得芳時懷抱開

舊雨齋集

金焜同人泛舟甘墩看桃花
討春攜酒喚篙工
村落全憑小舫通
新漲煖生前夜雨
哨帆飽受滿溪風
山當野岸迎人笑
花壓篷窗映面紅
最愛半開

顏色好清霜休墜月明中

妙明書屋遺集

戴清干墩村訪翁野君路迷返棹結棹泊煙渚過
雨春林濃欲訪花源深隨路尋山農路盡隔紅樹
渡口無遺蹤悵望獨往來前溪餘萬峰

南樓吟稿

汪沆甘墩村看桃花用梅宛陵和楊直講夾竹花
圖韻清明乍過檐柳綠廊處書堂類空谷嬉春久
歇少年心咫尺暗門禁兩足李家表弟慰我老邀
我看花簡一幅野航扶上躉躉翁小港沿迴八九
曲花光夾岸望不通誰道漫山總粗俗平生我苦
羈異縣纔喜今年復邦族此閒種植足生計擬學

良山雜志卷二

卅

將花課童僕茅宇三閒田十雙不貪負郭千金贖
朝餽軟嚼桃花飯夕餐香煮桃花粥每逢花發載
酒遊長對青山展畫軸不知奢望幾時酬今朝且

騁花前目

槐堂詩稿

沈大成方春同人曾有甘村看桃之約以雨不果
今綠陰子滿枝矣感賦斷句畫船載酒水之涯一
色紅鬐十里霞苦恨羈人緣獨淺三春風雨失桃

花

近遊詩鈔

龍池墩在干墩村北相距僅數百步

自記

孝廉柴世堯墓在龍池墩西南當春月桃花爛熳杭

人出游半山者每於柴墳停橈焉仁和縣志

景星杓柴墳看桃花花滿郊原合放愁布帆攜上

武陵舟不逢漁父尋溪口大有烏啼在隴頭草木

多情能寄傲林泉無稅任追遊清尊在手應須惜

明日殘霞一水流勸堂集

汪筠柴墳看桃花雲鬢煙鬟沐雨千枝萬朵烘霞

烏啼樹頭天冷水去人閒路賒謙谷集

城內鹽橋河小河清湖河出自天宗餘杭二水門合

於北郭稅務前由清湖堰閘至德勝橋與城東外沙

河菜市河泛洋湖水相合分爲二派一出東北上塘

良山雜誌卷二 圭

過東倉新橋入大運河至長安閘入嘉興曰運河一

由西北德勝橋過江漲橋北新橋以北入安吉州界

曰下塘河咸清臨安志

上塘河自德勝橋東至長安鎮又東抵海甯縣城百

有餘里沿河築塘以障運河無源之水仁和東境與

海甯縣治之西一帶土田水利俱賴此河以有此塘

巨之也歲久失濬河底沙壅漸高而隔塘諸窳低入

河內天稍不雨水即涸竭天順間知府胡濬計民田

起夫開濬旱乾獲濟舟行通便成化杭州府志

下塘之水仰視上塘其高下相去或七八尺蓋總繫

一塘爲利害而上塘諸圩之田惟藉河水爲命脈邇數十年來塘岸淺薄一值水溢卽有盜決之患長流百十里數日可以徒涉究其故蓋緣近塘蓄魚諸戶懼水溢則魚逸一也渡子藉以邀利二也三老儕類乘役夫修築之頃相比爲姦三也以故歲數崩潰而通塘土石駸就減損視昔年五馬並駕之途不啻失半矣是以上恆苦旱下恆苦潦其爲一方之患害匪細也往昔所置七笕四閘取以洩水然笕底過深漏卮易盡閘門太狹橫流致阻宣導之法似尙未周謂宜自沈塘灣迤北至長安壩相度形便更置大閘十

良山雜誌卷二

三

所擬議水則中立滾壩俾水溢則行踰則止如此則盜決之謀旣已默杜而且分里授傭增築塘岸務令堅厚行見上塘數十里內俱成沃土卽恆暘無憂誠百世利也

陳善三塘論

上塘河舊名運河一名夾官河西自德勝橋東抵長安壩南通外沙河菜市河蔡官人塘河東達赤岸河施何村河方輿河兩岸田土何止千頃

嘉靖仁
和縣志

自錢塘至鹽官界應漑夾河官田須放湖水入河從河入田準鹽鐵使舊法又須先量河水淺深待漑田畢還卻本水尺寸往往旱盛則湖水不敷今年修築

湖隄卽不啻足矣脫或不足卽更決臨平湖添注官

河更有利矣

長慶集錢唐湖石函記

杭城西南山多田少穀米蔬果之需全賴東北其上塘瀕河田地自仁和至海甯何止千頃皆藉湖水以濟亢旱若西湖占塞則上塘之民緩急無所仰賴矣

濟復西湖錄

西湖接濟運河并溉上塘之田由來如此白蘇諸公頗言之近雖淺塞猶未全廢明李旻作濬西湖說謂昔人未攷地勢而孟浪言之西湖石堰所泄但入新河有清湖三閘兼阻二壩不知何以接濟運河之用

良山雜志卷二

畫

又上塘比之下塘以豬圈壩視之高幾一丈不知湖水從何處逆流入河以溉夾河之田李旻乃不攷地勢而孟浪言也

舊杭州府志

江陰葛書舉字宣德熙甯三年進士調餘杭縣主簿時朝廷興修二浙水利議者欲廢北關長安二壩上塘之渠以與下塘相通又於餘杭之南股引苕溪之水達於漕渠穿錢唐市而入於江以紓吳興水患時多以爲然部使者邀行視君謂溝瀆之流不足以比古三江之任只益紛擾耳且錢唐二壩其來久矣大役之興古人所重固執不可議者不能奪其事遂寢

隆慶中大納言周公詩議開上河中河爲一中河約五里開深五尺上河約十里開深十尺可廢永昌德勝二壩其言大利有六百物省舟壩之費價值平減一也使客無淹二也德勝壩夫吳山水夫可裁遞運以減十五三也武林日費大省四也米舟入城五也風氣融暢六也說者或欲開通天宗水門中河開深五六里舊河開復二三里合上河之水直抵下河之壩壩上之水可抵江上之塘其利大約與周公議同第上河高於中河不下六七尺中河高於下河亦如

良山雜志卷二

書

之卽所云開通五里十里之說量地平準尙未相稱其費當不下數萬然其說行則闔城無不虞之憂國課有數千之節亦一奇也

運河議略

周詩所議以地勢揆之萬無可行之理永昌至德勝經十里水勢高下幾及二丈永昌廢已合上河中河爲一併廢德勝竟與下河合矣千里一瀉伊於何底所云大利殆索諸枯魚肆乎大約德勝一壩利在果開必先自司家橋西北迤至東新橋右築成高塘合良山水門合會安壩所洩之水迤北而東至五里塘過東新橋循故道次自城中白洋池開河出小北門

浚之極下與市河運河深廣相符然後開德勝壩而
通之則上塘無驟決之慮而湖墅市河移入城內轉
輸之便亦可云利

舊杭州府志

范成大暮春上塘道中店舍無煙野水寒競船人
醉鼓闌珊石門柳綠清明市洞口桃紅上巳山飛
絮著人春共老片雲將夢曉俱還明朝遮莫長安

道慚愧江湖釣手閒

石湖集

曹勛上塘值清明客路逢寒食划船開水干嬌雲
易得雨暴冷不成寒白水連天去繁桃觸目看朝
來有家信稚子報平安

松隱集

艮山雜志卷二

七

許棐夜泊長河黃帕貪程夜泊遲市樓燈火歇多
時滿懷風月無分付卻借漁翁短笛吹

梅屋詩稿

吳龍翰夜舟泊長河詩客行裝少孤舟一葉輕寒

鴉隨日落秋雁破霜鳴山色攢心事江聲咽世情

故鄉無百里酤酒話歸程

古梅吟稿

周詩城東泛舟同朱二守張節推作嚴城霜入夜
荏苒歲華闌此日長濠泛何殊曲水歡登場千稼
稔倚棹數楓丹莫遣行杯緩東來海氣寒

與屏集

金張從上塘歸窗開一面入山青十五年來記此
經不是避喧歸計決桃花忘記看皋亭

吟老編年詩鈔

厲鶚北郭舟中同丁敬身汪西顛王麀徵作扁舟
望皋亭淺絳色漸分回顧稽留山餘雪黏空雲迺
知向背殊諸峰若離羣松陰結春靄冷趣彌氛氲
同游得三子勇若張吾軍遙拜杜子恭棲隱尊昔
聞不測古人意豈異今所云清言各未已村鐘殷
微曛樊榭山房稿
汪沆上塘行上塘河水百里經西仁和接東海甯
夾岸腴田三萬頃禾苗灌溉長青青我昨扁舟出
北郭道逢田父泣相告縣符火急催新糧起視田
無一粒穀年年五月梅雨多小浜大港接官河懊

艮山雜誌卷二

美

恨隄堰私盜挾尾閭泄盡成枯禾方今官長比召
杜哀爾農人勤作苦眼看畚築急修防河水瀾瀾
盈上塘滿篝滿車慶豐稔明年飽飯肩粟輸官倉

槐堂詩稿

按上塘河爲南宋運河相近諸河道以此行地
最長故亦稱長河明人或謂之中河以對清湖
開水言也河藉西湖水濟亢旱今道由湧金關
進水入城自西而北而東而南而復北出艮山
水門合會安壩俞家壩水入上塘河康熙二十
二年開河循此貫輸勒碑載志嗣後屢舉行之

悉見成效明李旻云城東大河名菜市河者本從臨平湖來經百餘里入艮山水門至城中斷河止謂之上塘河因謂湖水無濟上塘之理旻既誤認此河爲菜市河又誤其水自東北逆溯西南入城本河源流尙不知一察致謬亂如此他水接濟之道復何怪其不知哉周詩議合上河中河爲一與宋熙甯時所議相類而河高下六七尺度難施行卽不惜重費仍如葛書舉云大役之興古人所慎也已

北郭稅務在餘杭門外淳祐六年趙安撫與憲重建

艮山雜誌卷二

七

咸淳臨安志

按天宗餘杭二水門所出城內諸水合此務前由清湖堰閘至德勝橋爲上塘河受源清湖堰咸淳志云在稅務東清湖閘有三上閘去餘杭門二里中閘去三里下閘去五里三閘又各有泄水陡門周必大歸廬陵日記云北關解舟至閘下謂此閘也今上閘存中閘惟一石柱下閘無可指索相傳在枯樹灣南而已宋時泛洋湖南受鹽橋大小二河東合外沙菜市二河西合清湖河一湖五河統爲一流皆由清湖閘抵

德勝橋故設三閘以漸殺其勢明洪武三年築豬圈壩於武林門側以泛洋湖東西橫截僅留清湖一水赴閘餘流皆不復通水勢不大閘乃不必多設泛洋湖別自覓渡橋下支分一流北由潮王橋抵德勝橋其流亦微二水但能至德勝橋耳今橋北更遠以壩則古所稱過東倉新橋入大運河之源絕矣泛洋湖失西泄之過勢改東趨遂合外沙菜市二水由五里塘出東新關以注上塘河夏時正嘗謂上塘爲無源之水李旻謂上塘運河卽菜市河有以哉

艮山雜志卷二

六

德勝橋在糴場後舊名堰橋因韓太尉掩擊苗傳於此故杭人稱之

夢梁錄

在府北五里其處亦曰枯樹灣宋建炎中韓世忠用

兵處也

讀史方輿記要

德勝壩在東北五里其東有石灰壩

大清一統志

壩在德勝橋北明洪武五年建置公宇門房一間左右側房各一間廳房一間左右附屋各一間寢室二間廚房二間職制壩官一員壩夫四十名宏治十八年工部郎中臧鳳儀奏准事例裁夫二十名只存二十名兼管豬圈永昌會安三壩存留壩夫因地衝要

近實接應不敷碑亭一座具載欽奉聖旨事例嘉靖

縣志

枯樹灣巷通石灰壩仁和縣志

由夾城巷轉東直抵石灰壩其街南為枯樹灣為南

塘路南通艮山門嘉靖仁和縣志

杭世駿五月四日江立招同人集枯樹灣寓舍作

夏木陰森綠似苔瓶廬如畫枕城隈輕舟慢水灣

環去短策寬鞋次第來喜借僑吳高士宅深支隔

日午筵杯明知遠恨重門鑰不逐昏鴉不肯回送老

集

艮山雜志卷二

堯

下陡門橋在德勝橋西北咸淳臨安志

陡門閘有五莫詳所始其一近德勝橋潦漲河溢皆

由此殺泄下塘天順間知府胡濬重修成化杭州府志

夾城巷北為通市巷橫衝為陡門巷為德勝河涯嘉靖

仁和縣志

章文昭陡門春漲崖瀑三千丈飛流下陡門春雷

翻雨腳晴雪灑雲根同上

王洪陡門春漲調卜算子驚雪噴高厓雷響青天

曉剛道吳胥駕海來勢壓滄溟小兩岸走漁舟

潑亂飛青鳥誰信神魚去不留五色祥雲繞西湖游覽

志餘

按明人以陡門春漲爲湖市八詠之一成化志明言近德勝橋今乃絕無知者據嘉靖志所詳道路似爲新馬頭處豈自馬頭築而陡門廢耶端平倉在德勝橋東端平元年浙帥趙與簾創以儲漕羅嘉熙三年歸之大農洳以京局官而領於宰士如他倉淳祐十二年咸淳五年皆重修有水榭扁曰介然蓋取太倉箴語而并箴刻石其中爲菽五十有

六

行在所錄

按此閭今有儲鹽所地頗寬疑卽宋端平倉基

艮山雜誌卷二

卒

天妃宮在德勝壩北奉順濟聖妃創建於明洪武壬子重建於成化辛丑嘉靖十八年鄰火延燎住持鄭

景隆遍募善緣現已訖功

嘉靖仁
和縣志

毛牲募修德勝壩天妃宮碑記古以得勝厭北字京之門北關之壩皆是也特京門迤北直抵塞垣故舟車絕少而此則臨安以北通路以南水陸並發然且水倍於陸相傳洪武間祠水神於壩以爲官艚估舶禱賽之所意甚善也乃未幾而稍圯矣成化辛丑鎮守浙江司設監太監張君實始捐資恢拓高其殿櫺而擴其垣廡使當日之奉觴獻豆

灌薦拮据者坦然可效駿奔於其側然猶貌神立
嘏按簿勒石今列朝鎮巡以下凡仕其地皆得補
苴焉以傳於勿替而後且陵夷而莫之顧也夫捍
患之祀急於祀功今天下河防爲留耗內府金錢
不減疇昔至官輅往來若冊封贈弔通使溟澥者
日賦波滔坎出入瀕洞以濱於不測此非神保不
爲功况商船峨峨其爲越三江而跨九河未有量
也曩時經理之費仰之在官故順而易就今大吏
小僚率皆躬勵廉潔朝不謀夕而踴躍好事曾無
多金如中官者以爲之領袖則苟且補苴非合并

良山雜志卷二

全

羣力曷其有濟因具疏設募各爲小效使微塵杪
末積爲銖兩是修是葺以稍遷故觀不可謂非眾
擎之有埤也若夫神名天妃舊傳秦時李丞相斯
於登封之頃出玉女於岱山之巔至今祀之所稱
神州老姆是也時以地祇主陰故妃之而以所司
河海爲職土之雄逮宋元祐中俗稱莆田女子契
玄典而爲水神此則後人所附會者因於其饗祀
而續爲之歌歌曰翠羽帔兮雞翹駕靈蚪兮渡洪
潮青山作幃兮碧煙爲旂神之來兮雲旗飄吹簫
兮擊鼓南塘風兮北湖雨明柔在豆兮穀在俎靈

巫酌酒兮醉代神語舳艫兮相催官艚既濟兮商
船後來沙蟲遠避兮鼉鼉回負檣銜楫兮鳴鉦以
隨浪不使湍濤兮風不使喧與應鴉不噪兮人不

笛神降嘏兮福孔偕

西河文選

佑聖庵在德勝橋東堍宋紹興間創立建奉眞武聖
像安鎮風水庇佑居民洪武甲子重修今成化庚寅

又重建聖閣煥然一新

成化杭州府志

金剛庵在德勝壩之左順治二年上乘禪師創建以
處流寓康熙元年七月六日有僧圓融積薪龕下自
放三昧火竟從烈燄中解脫一時千人羅拜無不驚

良山雜志卷二

全

異

舊浙江通志

王曾祥過金剛庵感圓融大師事寒風颭颭動檐
宇寶像數軀共塵土靈鷲不下蝙蝠飛法鼓無聲
鈴鐸語行行小憩得橫橋殘僧幾輩屋幾柱爲言

國初圓融師杖錫遠來從蜀土早年辛苦事戎
行便以慈悲勸徒旅軍前不殺一平民馬後放回
于婦女中歲披緇淨六根參徧諸方識宗主默然
無言盡日間暇則焚香還閉戶一朝起別善宿男
端坐禪龕日正午須臾火自口中出化作金光千
萬縷但畱一偈辭世人已空四大歸何許我聞斯

事驚且歎海眾何緣有佛祖昔傳佛有智慧火能
解眾生障礙苦又傳性空真火現周偏法界誰能
禦可惜俗子競浮埃日惟心火相煎煮不見牟尼
大寂時舍利燭天三昧舉惟師顯迹在化期惟師
觀心在獨處於今誰復嗣家風橋下溪流自終古
靜便齋集

興隆橋舊名潮王廟橋在德勝橋東

成化杭州府志

石姥祠在縣東北晏殊輿地志祀唐石瑰瑰嘗築隄
捍海潮功未就死於海咸通中立廟封潮王大清一統志
石姥潮王四字因見空中旗幟所書世遂稱之卒未

良山雜誌卷二

三

致何以謂之姥也

嘉靖仁和县志

潮王廟記元釋本誠撰廟在仁和縣一都自唐咸通
立廟屢有靈嚮後爲釋氏所有建昭化寺而廟反附
於寺今德勝橋東潮王橋是也

成化杭州府志

釋本誠昭化寺潮王廟記杭昭化院創於唐舊在
芳林鄉北河中界紹興二十二年官建倉乃遷於
茲地院有潮王廟按晏殊輿地志古有石姥祠舊
碣載石姓瑰名生於唐長慶三年生時靈異錢唐
古稱濤江强弩未射時江沙漲陷無節或風怒湍
激自城東彌望皆海民苦潮害王奮力築隄以捍

水勢祁寒劇暑不輟功未就竟死於潮後爲神咸通中官爲立廟封潮王宋宣和間睦寇犯順時朝廷以韓世忠禦敵陰雲四合聞空中叱咤聲仰見旗幟書石姥潮王之號軍士奮勇大破寇兵嘉熙閒潮水復作潰隄觸岸漂蕩民居人力不能禦京尹趙公與憲躬禱祠下潮復故道有司叱其事加封顯德忠惠王皇慶二年主僧宗禮率其徒卽寺剏毘盧閣廟之北河路當衝要民以爲艱乃竭已帑合眾助梁以巨石修廣砥平今咸以爲便禮嘗謂余曰聞耆宿言昔遷寺建倉時舊碣仆於基五

艮山雜誌卷二

齒

六年未及昇置而吏曹之後至者見所述疑故遺以蓄乃陰碎其石迄於今未有記神之勛業雖見於志書又略慮久而泯焉幸銘之以補其闕文余謂古者禦菑捍患有功生民則祀之神勇於義捐軀救民功可謂烈矣去今五六百年聰明精爽凜然如生水旱疾疫禱之輒應廟食以享其報宜矣謹撫其事書於石

石刻

按潮王廟橋跨水南北水自覓渡橋北流二里經此橋側北爲德勝橋東轉則由橋達東新關道中又有支水北流乃爲石灰壩也廟與昭化

寺今惟一垣之隔

昭化院顯德二年吳越王建舊名龍龕大中祥符中改今額紹興二十年改造省倉中界徙建今處有石

姥潮王廟

咸淳臨安志

昭化寺在潮王橋東南唐長慶三年建吳越王復建於周顯德二年舊在芳林鄉河北中界紹興二十三年官以其地建倉屋遷寺於茲地旁有潮王廟元至正十九年兵燬洪武四年重建二十四年立爲叢林永樂九年復燬十年重建松江府推官段天祐撰碑記成化十二年少保于公給事張晟捐資重建隆慶

良山雜志卷二

全

二年張中復張一陽重修金臺王玘書昭化二字殿後存唐朝松柏三株

梵志

錙英題昭化寺風軒話久覺清涼白藕花開近石塘老去詩名慚沈宋古來佛法重齊梁坐臨流水心方淨吟愛青山夢不忘休得沈酣便歸去欲將小品問支郎

沈宣和韻六月野風村路涼小橋行過又陂塘人懷淇澳居栽竹僧污袈裟燕度梁共說五湖閒更好豈知一醉慮俱忘俞君寫得坡仙句只恐當筵

笑郭郎

武林梵志

俞珩和韻紫棟輕風白苾涼短輿催我過南塘面
承翠雨穿松徑背負青天石梁半日閒情今遂
得百年塵慮此消忘舊遊寄壁多新句半是劉郎

半沈郎

嘉靖仁
和縣志

陸廷玉畱題昭化寺重來忽是五年期翠竹黃花
記往時水石依然江上路風塵不毀壁閒詩功名
羈絆慙空寂林壑優游已自遲回首斜陽分袂處
泥途驥足又追隨

履齋
詩稿

張丹同章士麒趙佳璜遊昭化寺古寺深幽碧蘚
封炎天瀟灑一支筇百年色老湘妃竹六月寒生

良山雜志卷二

全

羅漢松誰說雨花飛佛座尚聞珠閣報山鐘追隨
喜有嚴顏輩落日歸遲草露濃

秦亭
集

王蔚章題昭化寺梁朝古松幹挺青蔥皮潤蘚梵
宮老樹舊相傳秦皇泰岱封高爵天監南朝種少
年蕭統讀書花始發曇摩汎海蓋初圓只今蜿蜒
猶龍狀幾鼎神膏助列仙

消盤山
人集

蔣漢紀坐昭化寺雙松下夕照遲蕭寺雙松勁歲
寒蒼煙籠翠遠宿鳥落枝殘月映虬龍影風翻天
漢瀾坐來深古意梵唱起蒲團

秋水
堂集

省倉下界在東倉鋪剏於紹興八年舊址極廣袤景

定三年朝廷給緡錢更修乃析三之二建敖屋八十而垣其餘廢屋地於外行在所錄

按潛氏志河道云諸水至德勝橋相合東北過東倉新橋入大運河東倉新橋即東倉鋪所在也時有儲豐倉在左家橋北號曰西倉因號倉下界為東倉也昭化寺以建省倉遷移所建乃是此倉潛志及本誠記均訛為中界據行在所錄省倉中界在東青門外菜市塘豈昭化遠自東青門移至此乎未必然也中與下祇一字訛前條中字當定正為下

良山雜誌卷二

全

老人倉在一都東新橋西總收罰贖稅穀以備凶年振濟嘉靖仁和縣志

按疑即宋省倉下界基

東新橋在五里塘大路口咸清臨安志

東新關在縣東北良山門外十里有橋舊建敵樓為

扼要處大清一統志

橋下即為關橋之東有敵樓舊杭江通志

關屬仁和一都七圖去大關東南八里北通海甯蘇松等處南通省城商船自長安鎮入者由此而達省城自回回墳良山門陸家蕩德勝壩等區出者由此

而至長安鎮設關以稽查商稅並取船料

北新關志

朱南杰東新橋值雪閒關入帝鄉飛雪出餘杭天地皆明白山川忽老蒼柳眉遮舊影梅額點新妝客裏急先務橋邊問短航

學吟

方回舟出東新橋市聲巷語笑連歌客舍喧嗽奈汝何才出城闔愁眼豁適逢秋霽病身和力行官道於時背心感皇天所相多鴻雁稻梁焉用足政須寥廓謝虞羅

桐江續集

史元中出東新關十年西度水雲東三徑非無舊菊松客夢入秋驚落葉交情計日候晨鐘扁舟暗

艮山雜誌卷二

全

識曾來路短劔長隨未定蹤試問尚平家事了幾

時杖笠許相從

甬上耆舊詩

吳本泰東新舟次出郭殘梅半面妝搖空新柳鬱

金黃孤篷短劔東西去慣是春風惱客腸

吳吏部集

沈謙東關曉行及關猶未曉行李去恩恩水涵人

趨陸天寒馬畏風日生鄉樹外春動客愁中於役

何時已飄飄類轉篷

東江集鈔

諸壁發東新關詩并序關在艮山門外五里餘從前行旅頗濡滯自撫軍徐公兼攝之後陋弊剔除往來稱便予自海昌歸過其地喜賦一律小艇如

蟻聚雞鳴關早開
櫓聲隔樹響帆影
逆波回稅
商情樂官清役興
灰輕裝吾竟渡長
嘯醉餘醅硯
香

齋詩

張錢灑出東新關
獻歲發征棹春風
動千里冥心

逐歸鴻北游從此
始斷岸蒼煙沈人
家在遠水雨

氣滿前山寒生短
篷底

壽平堂集

厲鴉晚泊東新關
解纜細雨吹煙昏
叢蘆高柳搖

空村晚泊沙汀見
燈火田家笑語生
春溫我生梗

沉遽如許難得扁
舟同舊侶休憎一
夜風打頭明

發青山堪與語

樊榭山房稿

良山雜志卷二

完

金志章胡炅齋招
傅玉笈喬瓶城集
東關竹居青

瑤落落繞精廬小
隱真成靜者居石
鼎茶香清午

夢蜃窗花韻映晨
書嘗新蒜顆駢黃
雀佐飲銀絲

鱸白魚夜鑰漸催
歸棹晚嚴城燈火
動寒虛

燼後集

汪沆過東新關訪
胡炅齋不值官橋
斜繫纜一徑

入林隈報道謁醫
去空勞裹飯來野
梅吹作雪新

水綠於苔幽意無
人賞真成剡曲迴

槐塘詩稿

汪泰來晚出東關
家食經時嬾束裝
恩恩迫暮上

輕航青螢度水爭
星燄紫氣沈山送
夕陽節物驚

心秋漸老風塵著
我鬢將蒼客程今
夜從頭記燈

火人聲五里塘 半舫詩稿

施安晚出東新關五里橫塘外橋邊尚見城樹陰

交水綠野色就船明物候蠶門寂人家槐夏清無

端動游事尊酒話幽情 舊雨齋集

陳鑑出東新關曾憶春風唱櫓枝垂楊蘸水綠絲

絲如何畫裏漁舟客折葦枯蒲又一時上下塘看

聚野鳧村醪攜配四腮鱸莫嫌蕭瑟無情味烏桕

紅添一兩株 遠村吟稿

按顧氏方輿紀要云城東北八里有城北稅課

司後廢誤以今東新關為宋北郭稅務矣宋務

艮山雜志卷二 卒

近在餘杭門外無一里之隔今關去城或云十

里或云五里約其中八里近是而現在稽查商

稅不廢兩不合也

嘉靖三十六年巡撫都御史阮鶚令於東新關沈塘

灣沈婆橋陸家橋各築敵樓一座 萬曆杭州府志

樓高六丈闊四丈周二十二丈上有雉堞下為門二

舊浙江通志

田藝蘅宿敵樓呈阮中丞百尺高臺百尺樓一天

烽火促更籌元戎號令如霜雪四月江南早報秋

香宇續集

按敵樓之設爲明嘉靖間禦倭寇也時北新關外及江干銀杏步城東月塘寺各有敵樓

王家缺在東新關外上塘河泄水濟下塘高田第一處也南有閘北有壩而其塘路單薄閘底漏水乾隆

三十一年幫修

自記

沈塘在艮山門外又名沈家灣

夢梁錄

仁和縣東北十五里沈家塘卽沈崧宅也

十國春秋

陳常沈塘灣早發酒薄衾寒不耐眠五更風雨夜如年隔塘遙聽傳開柵就枕連呼好放船路轉驚回千里夢櫓長搖破小溪煙起來重認河干景轉

艮山雜誌卷二

空

過橫橋又一天

續武林耆舊詩選

厲鶚沈家塘舟中望皋亭作飽聞皋亭幽梅花若香海彌年扁舟意故人肯相待況多古來迹出郭興已倍密竹沈崧家長川伯顏壘蕭散且同羣興亡渺千載紛吾愁霏霏旭影一峰在頃之風寒霽好事煩眞宰鳥下翠微明林開宿雲改去作詠花人庶無後時悔

樊榭山人房續集

沈廷芳沈家灣吾家灣最好小艇卽爲家一棹煙

波去遙天雁字斜寒松窺野屋殘雪點溪沙夕景

木簾集行人爭渡譁

隱拙齋集

姚家堰在東新關東

李氏西湖志

按今惟沈塘東有姚家閘閘傍有小壩堰與壩通稱耳

雋堰壩在仁和縣東北十五里良山門外有閘

大清一

統志

雋家堰在沈塘灣東二里去城東北十八里

成化杭州府志

減水陡門閘有五俱在運河官塘一帶天順間知府

胡濬重修一在德勝橋一在舊堰一在臨平其二在

海甯地方

嘉靖仁和縣志

運河隔塘寬有七曰雋堰西寬曰李王塘寬曰金家

良山雜志卷二

三

堰寬曰白洋寬曰石目鋪寬曰臨平鎮西馮家寬曰

曹家渠河底石寬俱在運河官塘一帶莫詳所始蓋

以塘下高田不與下塘河接旱無車灌置此諸寬由

隔塘泄運河水漑之而於寬下又各置檢水閘以節

量上流舊置寬門稍高後多盜移低入河底妨損運

河水利天順間知府胡濬相度寬門太低者重砌令

高檢水閘圯者重修之令民不以時啟閉者有罰

成化

杭州府志

鍾慎奉懷伯父憶在雋家堰遲遲發客舟獨憐雙

鬢雪十步九回頭月色他山寺鐘聲何處樓歸期

渾未卜況復又經秋

聽雨軒集

興漢帝君廟在雋家堰圩神爲項羽以秦不滅則漢不興是以有興漢之名

舊浙江通志

按自雋堰沿河北一里爲霸王廟卽興漢帝君廟也又一里正覺菴俗稱佛母菴又一里治平寺其地名永和村自此西北凡其支經著境爲花橋爲梅涇爲吳家墩爲木塘壩爲獨陳村爲錢村爲吳下村悉與皋亭獨山傅近攷是水自謝村新運河分而東支歧不一成化府志統謂之東小河凡土塘各堰閘所分泄水俱入於此

良山雜志卷二

壑

河而河身高下懸別今志西北境水悉以上塘爲經界東小河屬下塘不更汎濫及焉

皋亭閘在雋堰東三里地因設急遞鋪顯著土人凡言皋亭悉指謂此皋亭山但云半山耳

自記

皋亭閘西向稱患塘本里各莊輪年承管苟且目前以致易壞請嗣今著十莊協力共辦庶幾一勞永逸

請興上塘水利圖說

皋亭山麓舊有古亭曰皋亭人謂山之所以得名由

於此今移置李王塘西五里

仁和縣志

皋亭開鋪河濱有大樸焉樸之久數百年垂蔭數畝

堅幹密葉圍合連抱 鴻鳴書屋雜記

皋亭開李王塘之間有跨塘平安二橋其河係前明富人私開河為傅家莊之全利初時石砌堅固視上水之高低設板啟閉今舊制廢壞其水流至土壩與下河僅隔丈許時致坍塌漏為上塘之大害載在縣志可攷今請以土壩改建滾水石壩仍於兩橋設版請與

上塘水利圖記

李王塘在東新關外 李氏西湖志

在皋亭開東三里有二壩曰袁家西壩袁家東壩二壩之間舊設渡船以濟稱李王渡今創建橋矣自此

良山雜志卷二

畜

東二里為金家堰 自記

卓明卿重修李王廟記余往來虎林艤舟北津蓋北津距郡治十五里許輿馬檣楫必止之區喧囂肩摩至咫尺武恆於王廟休焉廟門埒稠居楣棟過首則弗認弗辨也北津芳林鄉故有寶華院乾道六年馬宗浩捨宅肇王廟於院北與藩王園苑相近其時方重宗室聲勢熏灼開館鑿池延拓數里薄王廟不能侵迄今四百餘載藩王園池鞠為茂草乃王廟獨存嘉靖乙卯島夷剽掠北津燔民廬彌望地赤王廟僅十數舍賴以不火夷賊悉為殲

蓋王之靈昭赫爾已廟隘溷漏涇垣積檻圯覲者
咨嗟迺廟祝性月謀咨沈久靈輩各捐緡從廟旁
得隙地廣之爲神門爲殿爲禪室庖湏莊嚴香燈
昕夕禪誦聲傳夏月孔曠行者道暘獲蔭息其中
卽往來過客視廟如歸矣一方以社貿利農穀菑
患咸告王乞王庠腰膺屠牲虔祀鄉井黨類同守
相望毋敢侮亦毋敢悞淫毋逞非惟王靈是懼則
王廟豈爲淫祀哉先是有司以廟罔具瞻毀之卒
徒絙拽王像岫不動益數十徒力益不動貌若加
赫卒徒恐啖愕退有司聞而罷之繇是毋敢云毀

良山雜志卷二

奎

者茲志入額矣北津當孔道悲歌少年趾錯塗
路而歲且游飢里子弟相戒恬然實望王威斂形
避禍也王義興人功疏黃河爵王謚忠正精爽孚
祐所在崇奉則王有禪於民大矣惡可弗祀哉久
靈與若鄉信眾伐石請記余嘗休王所詳厥靈矧
境內販禮王久爰紀其事捐緡姓氏勒諸碑陰

甫集

張颯皋亭渡李忠定祠寂寞皋亭渡欹斜古廟門
閒雲侵幕冷蒼柏覆庭昏世亂心彌切時危身孰
論良謨誠克展帝子詎徒奔正直來羣妬流離戴

主恩汾陽功可就諸葛志空存笛響連清梵樵歌

自遠村檐前山色暮誰與薦芳蓀

雪巖集

釋智蘊李王渡貼岸人家桃李多養花天氣正清

和不須細問漁郎事自趁扁舟入薜蘿

巢拘集

按卓氏記稱神以疏黃河功爵王是世所稱劉

李二王者也張氏又以為李忠定未詳孰是

永甯橋去雋堰東北七里舊為渡曰李王渡 國朝

乾隆三十五年里人王宏緒等創建石梁跨大河南

北杭州府志

急遞鋪一路自仁錢兩界北廓總鋪起至東新鋪屬

艮山雜志卷二

亥

一都皋亭鋪屬二都百家灣鋪屬三都赤岸鋪屬二

十二都桐扣鋪屬十七都石目鋪屬十七都蓮花鋪

屬十四都達海甯縣許村鋪轉達嘉興等府洪武三

年建成化杭州府志

仁和縣衝要八鋪北廓司兵六名桐扣司兵五名東

新皋亭百家赤岸石目蓮花司兵各三名

康熙賦役全書

元至元二十三年雲省平章納逸刺丁上便宜數事

五日戒使臣勿擾民居立急遞鋪以省驛騎此急遞

鋪之始也

兩行齋雜記

按諸鋪所在及其名目 國朝俱仍明制不改

惟百家灣鋪今題爲半山鋪不知改自何時崇禎己卯杭巖兵備道黃鳴俊著武林紀事紀北關東河汎地四以皋亭赤岸寶莊吳家壩與各紀不同此似值兵燹際權宜爲制不足論也上塘河東抵海甯州百有餘里皋亭黃鶴臨平三山駢列河岸各有專卷茲惟敘其受源及所行平陸而已覽者察焉

良山雜志卷二終

翟晴江先生登乾隆甲戌進士第教授金華所著四書考異三十六卷爾雅補郭二卷湖山便覽十二卷通俗編二十八卷無不宜齋未定稿四卷皆板刻以傳獨艮山雜志未經梓行曹氏斯棟稗販云一名艮維雜志稿甫成而先生淹逝書遂流亡近偶閱殘本尤爲神往顧余幼從弼教坊沈雨溥肆中恰得全帙凡志地志人志事志文各二卷寫極潦草亂中失去厥後網羅文獻訪之東鄉覓之故家不能復得嗣見上海郁氏書目有之知歸陸氏存齋特爲鴟借存齋慨然寄贈僅志地兩卷餘雖徧求終杳然也艮山地

艮山雜志後跋

幽境曠桑麻機杼風俗樸醕罕涉文藝志載旣稀見聞彌寡先生擷芳草於十步恭維桑於百年空前絕後撮有斯編兵燹凶狂銷磨未盡若必規其全璧始就雕摹深恐歲月逡巡并已得者而復失之烏可哉因屬張君春岫王君同伯羅君桀臣孫君康侯重加校正更摘先生遺詩之有關斯地者附綴編末倘妙墨通靈延陵劍合不辭頭白誓續汗青敢券微言聊當跋語光緒丙申小春丁丙

艮山雜誌附錄

仁和翟灝晴江

甘棠邨雜詠 并序

予居臨江鄉去城市遠風土幽奧家勤于農桑有
涵人風宜于詩凡觸趣會予一一詠之存如干首
舊編圖籍經界次以周興嗣千字文而予居適直
甘棠二字又近里有百年老棠樹遂以名村後之
按志者知臨江鄉有甘棠邨自予始
傍舍清瑤流浮空光可掇沙雨隔宵添沿花路八達
扒扒蜻蜓舟興至一櫂撥 港

艮山雜誌附錄

鄰界水東西行空一虹貫凭闌俯倒影鬢髮石髮亂
誰某記題名沙侵石未爛 橋

漁火不隔岸密繫柴籬根瓦罏爨荻葉濁酒分兒孫
人家值水缺連補成完村 漁舟

芄桑一色鋪儻莽不知處凝光變須眉綠天迴殆庶
下有竊脂禽翻飛自來去 桑林

桑土亦宜田當年未曾闢舍北頗閒曠一犁試芟柞
雉雥春雨餘顧盼好禾麥 田

町畦縱復橫楸枰畫方罨天晴蚓竅唬風定蜺絲絳
鄰丈共忘機翦蔬約宵話 菜圃

暗脈通遙泉湛湛水花皎比屋動晨炊銅餅出未了
輾轉轉桐牀驚起棲桐鳥

井

笠影覆瀟灑四望碧陰開援琴坐石檻黏破新莓苔
臨風七弦寂美人來不來

亭

市酒紅如血邨酒白如雪只道市酒濃不知邨酒潔
竹外一帘斜試與銜杯說

酒店

茨簷碌碡場小業著方賄晴絲曳長空眾星排磊磊
居然握經綸託術詎嫌猥

錢場

儵魚百千頭淥水四五尺蘋風吹澹沱煙草共一碧
釣魚人不來鷓鴣立釣石

魚池

良山雜志附錄

二

登樓開北檻對面皋亭野淨寒木疏天淡孤雲閒
此中有真得獨坐怡妙顏

遠山

吾愛村夫子敦學存本意不藉占巍科所在略識字
狙公調羣狙慢言莫輕戲

塾

破殿雜筐籬古佛坐逼仄孤棲壞衲僧刀耕自食力
無才掉清機客來相對默

僧舍

倒竹屈成籬籬光仍綠潤作折讓漁磯聯疏借木薜
固藏隱者心野月漫閒進

竹籬

參騰蘿蔦秀卓立風雲高儼然一村霸氣勢矜雄豪
瞻衡作標識遠勝旌與旄

喬木

冥冥風雨宵孤燈一竿揭熒光散空虛燦逾田燭設
夜闌歸人稀隔林自明滅

天燈

寒原雞犬靜幽響出蘿幄天晴孤枕明遠近聲曝曝
懶窳暗驚心起看河射角

機聲

村中晚興

所居地幽寂薄暮客來稀一徑吠寒犬數家鳴夕機
廚煙補山翠林篠暗柴扉踢葉忽聞響鄰翁散社歸

夜臥聞潮

空階白月當中宵寒蛩四壁鳴蕭蕭哇咬入耳細已
甚轉令魂夢思英韶天公解我胸次闊特遣海若揚

艮山雜志附錄

三

秋潮初時但作炊甑響忽然號怒奔驚颺千槌鼓擊
萬虎嘯軒窗戛戛恍動搖我時披衣不得臥寸腸展
轉生憂焦連年江岸苦衝嚙瀕江田宇多傾漂飛章

上請泉府發痾瘵屢慮勞 天朝新塘創築亘百

里千夫日日疲征徭乘秋漲溢潮更猛官立程限誰
寬饒但得魚龍一睡穩長波遠赴歸墟消東鄰西舍
各高枕吾耳豈復嫌清寥

笕橋途中作

淺笠輕衫得自由近郊閒趁晚晴遊翠陰夾路忽成
巷涼氣襲衣先報秋園朵欲攀搖未定井華待汲去

仍留煙邨曖曖遙相引幾處柴扉傍竹幽

抵家喜新居落成

載望衡茅喜氣加入門誤走笑哇哇不知井竈成新
客不作堂基仗阿耶流水小橋詩世界青桑綠竹隱
生涯招攜兄弟沿邨看老屋離來有幾家

沙河隄晚眺

近看惟水遠成煙煙氣空濛上薄天一綫巧將霞氣
劃天工不許水黏連

聚飲蘭陵書屋

傾杯豈必定醇醲開筵何用盡珍美吾家市遠急難

良山雜志附錄

四

謀此日熱奇渴欲死石橋東邊懸稻穰生酒新芻白
如水儒性頗與炎蒸宜入口瓊漿寒沁齒舊年兒子
養花雞昨日鄰家殺肥豕水莊偶問得魚蝦園父相
謀摘瓜李主賓一笑坐團團誓醉如泥呼不起解衣
脫帽未猜嫌戰拇藏鉤各隨喜池中碧筩可代蓋樹
上清蟬還韻耳几簞雖污君莫笑瓶罍不罄吾何恥
七賢八達莫依稀圖醉堯民毋乃是

揚嘉橋望皋亭山積雪

山頭雪霽挑鬟列水際人閒負手行銀島玉樓何處
是里門未出足幽情

惜他粉筆渲彈處尙隔平疇十里偏專待雪消春水
長流雲一直到橋邊

東郊晚行

秋容愛夕佳信步越畦畛荒逕少人蹤屈曲辨修蚓
微風來前林楸葉紛以隕高天氣象嚴雲色釀寒緊
眠情適沙鷗過影疾霜隼度險橋階危穿幽竹蹊盡
間勞亦何爲遠被風物引
橫空縱我眼列岫展天末青蒼一幅披秀色不可割
中有度世人光景坐超忽還欲招之遊山心話饑渴
白雲來悠然高鴻向空沒

艮山雜志附錄

五

好景不肯常況茲桑榆促村厨爆溼薪煙帛起純束
一暝萬形齊何由著間矚巢禽戢動羽途人斷歸躅
清豪振涼葢健語共相助郊路熟可循林黑誤已數
賴有流螢飛高下閃古綠荒涼興未摧寂靜意偏屬
心鏡終澄明行吟多所觸

銀輪轉無聲突自林端推沓來清影眾我影亦同來
萬象復我有眼爲今日開落落秋勢迴納納天宇恢
溪光曳遙帛岫色堆寒灰詩肩聳千尺與月相徘徊
寒淺未成霜灑灑露如瀉芒鞋草閒行沾漉及雨踝
到家近猶疑喬木認里舍鄰機悄已停吠犬鷄籬罅

茅叢何處光破壁一燈射婦功懷土風寸晷惜無暇
向來安眠中妙景虛夜夜

東郊地偏鄉俗異於他所隸其俗事得二十首

騎吹西來巷陌喧扶犁官府出青門隴倉野老初觀

禮十日燈前話子孫雍正四年慶春門外築先農壇置藉田仲春亥日大吏率其屬

行九推盡隴之禮

桑蓄新萌蠖子稀河泥頻罨土膏肥九江舟販魚秧

至五堰人驅鴨陳歸蠖似蠶食桑而桑敗滅其子則免蠶近水田圍取河底泥以糞

村八年年往九江取魚苗五堰瀨江斥鹵地居人多以養鴨爲業

上甲初逢禱祀誠和養強擬日辰名習訛正恐貽優

艮山雜志附錄

六

笑餛飩子生同餅子生清明前甲子日村人搜米粉作六十餛飩子祀土神以祈蠶霏雪

錄載宋優餛飩子餅子皆生之語茲承其訛

糞種分詳九土皆不妨到彥作生涯擔聲軋軋成羣

出陳學昏鴉一字排南史到彥之初以擔糞自給

橫塘春水熨如繪檐齒高低簇繡層一帶桃花半山

路豐華不負小金陵東郊有半山橫塘皆與金陵地名同橫塘民居頗饒裕人呼小

金陵

梓花香散雨淒淒土鴨喧呼稻簇畦溝督邨師頻指

說今年池水又平隄梓樹花落時多雨名梓花雨蛙之鳴色者聲似鴨俗稱土鴨青

烏家言杭州湖水平隄出秀才東郊諺云池水平隄出秀才

忙功價直倍蠶時澆飯頻需酒一甌夜捉眠頭添小
食杭皮鹹子透花餠蠶家呼四月為忙月願賃倍其
直日餉四餐佐以酒蠶已眠一

一急措之燥處
呼為捉眠頭

雕盤露朵摘成堆喚賣聲催曉鏡開別有蟾蜍蘭燭

蛹也隨香菜入街來善菜蠶蛹東郊人率擔入城喚
賣郭璞爾雅注蟾蜍蘭可燭蠶

蛹

鬪取靈荻宿潤含鴉頭鈕荷翠都籃分明采藥圖難

畫絕筆邨中戴靜菴繭橋地多種藥草明畫士戴
進號靜菴居繭橋相婆街

梅子黃酸杏顆肥桃尖紅渥李青衣甘整五月行人

飽似向羅浮頂上歸甘整邨多果樹熟時不禁人噉
陸賈行紀云羅浮山頂楊梅山

艮山雜志附錄

七

桃人登採拾止得於上飽
噉不得持下茲地亦然

夏秋不怕久長晴鹵脈餘滋入夜生眼見龜紋河底

坼紫茄白莧尙縱橫東郊有夜潮地入夜滋潤耐久
旱然不可多得尋丈間土性頗

異

乃洵曾是土音操掉舌翻嫌客戶喬若道繭橋官話

陋行都留載娜兒橋東郊語與城中迥別至繭橋則
愈邨嘲者稱繭橋官話效城中

語者反謂之喬聲咸溘臨安志繭橋旁有
張娜兒橋東郊呼女兒為娜兒當時已然

不藉燕支拂鬢紗西風吹綻碧蟬花儂家赤岸邨邊

住曉擘牽離染翠霞石竹一名碧蟬花赤岸邨人秋
取花汁作藍絲亦名藍燕支畫

家用以染點及彩羊皮燈
牽離繭幕也見劉熙釋名

勞勤煮罷折腰菱夜作高挑嵌壁燈六柱雙輪纖手

轉聲聲勻比擊魚僧諺云喫老菱夜作與雙收絲之器見揚子方言

比合長綸動絞車十弓地拓並開廬祇聞柿蒂綾裝

句不見霞光綫入書東郊五六里間糾綫為業者十室而九天下仰其用志乘闕未

也載

皂衣旁午下鄉行邨犬狺狺未識卿四十七疇江患

里官糧改折白銀輕臨江安仁等鄉苦江湖患每秋款收明嘉靖時鄉官胡端敏公

疏請於朝改徵糧為折銀凡四十七里半著為令

孩兒煙嫩釣盈筐童子魚鮮一尺長好認金獅沽玉

醴更來白石買黃羊彭家步出孩兒煙竿釣得之魚盈尺者俗呼童子魚金獅子衝

艮山雜誌附錄 八

賣無麴酒白石廟前羊脯有名

水落池塘纈趁魚荻花標動晚風徐蒨胡更作蘭陵

面敗笠殘蓑態儼如池中荻竹戴笠被蓑笠如人形以禁纈

蕙臺春暖綠抽心絲菜香蒿次第尋不及紫花來服

美繭橋傳有紫團參蕙臺子可榨油春種最廣採嫩莖為茹名臺心菜俗稱來服為

繭橋人參

水邨多半繞漁汀直埭彎兜逐地形例比冉溪齊帶

姓別無名目載圖經邨居近水地直者曰埭曲者曰兜張姓居之即名張家埭李姓

居之即名李家兜

艮山觀元大德土神廟碑五用前韻

環旋腰鼓城八面啟門十兼山值方位營壘備嚴急
帳旁土礫基一簣肩可及周沿蔬圃寬曲抱沙洲溼
吟徒偶牽邀探古手同執平林引閒步不假層級拾
荒碑臥中斷苔土蒙垢澀劃肚忖銷殘捫爪剔封蟄
識是元代祠軍民聚春汲歌舞奉社翁崇厦蓋天笠
昭昭學錄文筆花粲可裒臺因雉堞餘圖經已失入
眞謂外邏山暄然百妄集據實後可徵賴茲片石立
雉堞之餘築爲土臺碑有明文近志謂南山外邏又云地脈近海所蟠結皆臆說也

艮山雜志附錄終

艮山雜志附錄

九

